

**NATIONAL ASSEMBLY OF
SEYCHELLES**

*Wednesday 2nd October,
2022*

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisyé ki pe asiste nou e bonzour nou bann piblik ki'n zwenn nou ozordi. Byenveni pou nou travay Lasanble.

Nou a konmans avek enn de pti *item*. Nou annan prezantasyon Papye. E sa se en rapor *Women's Parliamentary Caucus – Report on the Visit of the School of the Exceptional Child and the Deaf School of Seychelles*. E *Women's Caucus* ki pou prezant rapor, se Onorab Esparon. Onorab mon donn ou laparol.

HON REGINA ESPARON

Mersi Mr Speaker. Bonzour tou dimoun e tou Manm Onorab. Mr Speaker mersi pou donn mwan sa loportinite pou prezant rapor *visit* fer par

Kokis Madanm Zedi le 21 Zilyet 2022, kot Lekol Sourd e kot Lekol Eksepsyonnél. Bi sa *visit* sete pou etabli en bon korperasyon ant sa de lekol. Pou ganny en pe plis lenformasyon lo sa de fasilite servis ki zot ofer bann zanfan, ki otreman kapab.

E pou konn en pe bann defi e difikilte ki *management*, paran e zanfan i rankontre e fer fas avek. E konman en Komite, gete ki mannyer atraver nou rol *oversight*, vin ek Mosyon e kestyon pou adres sa bann defi.

Kot Lekol Eksepsyonnél, nou ti ganny sans enterakte ek bann zanfan ek paran ki ti la, e osi byen ki ansenyan, kot nou ti obzerv en mankman ansennyman. E lezot personnel kalifye, pou ed sa bann zanfan dan zot laprantisaz. Spesyalman bann zenn ansennyman.

E osi lakantite paran ki ti pe akonpanyi zot zanfan, ti vreman limite. Malgre sa bann ansenyan ti vreman pasyonnen avek zot louvraz e ti pe fer zot mye pou ed sa bann zanfan, malgre bann defi ki zot fer fas avek.

Apré ki nou ti'n fer letour letablisman, nou ti ganny sans zwenn avek bann ansenyan pou ekout zot bann konsern. Enn de pwen ki relye avek ansennyman;

I annan sa mankman dan *training*. Bann kour spesyalize pou bann ansennyman, ki ansenny bann zanfan ki otreman kapab;- ki swa lo nivo lokal ou lo nivo enternasyonal.

Bann ansennyman i santi ki parfwa zot pe ganny kit deryer, aköz zot pa pe ganny enkli dan bann *meeting* ou *forum* ki fer par Minister Ledikasyon. E ni menm lo bann Komite. Sa i osi kontribye ver en mankman kominikasyon.

Bann ansennyman i osi fer resorti ki zot rarman ganny konsilte avek Minister ou menm bann lezot departman ki travay avek bann zanfan otreman kapab, letan zot pe fer en desizyon ki konsern sa bann zanfan.

I vremen annan sa mankman, an sa ki konsern bann nouvo ansennyman ki pe zwenn sa leköl, pou pran sa larelev. Espesyalman bann zenn ansennyman.

Leköl i resevwar bokou pli mwens resours konpare avek bann leköl Gouvernman.

Bann ansennyman i admet ki malgre zot annan zanfan ki otistik, zot pa azour avek bann program e menm okenn aktivite kot sant *autism* i fer, ki ti a'n kapab benefisyè zot plis pou ed sa bann zanfan ki annan problem *autistic*.

Pwen ki relye ek bann zanfan: Ansennyman i konsernen aköz i annan paran ki pa pe servi sa *allowance* ki zot zanfan i gannyen byen. I ti kontinyelman annan zanfan ki ti vin leköl avek bwat vid. E nou'n mazine la avek sa program manze - *breakfast* ki Gouvernman in entrodwir, sa problem i ava ganny rezour.

Lakantite paran ki akonpany zot zanfan leköl i vremen limite, malgre ki i donn en *allowance* pou bann ki fer sa zefor. Zanfan i merit ganny en pli gro bis ki konfortab e ki kapab akomod zanfan ki vin leköl dan *wheelchair*.

An vi ki *VTS Vocational Training Centre* i anba renovasyon, bann zanfan ki ariv laz 16an napa en landrwa pou ale. E bann paran ek ansennyman i konsernen. E la leköl i war li ek bann zanfan adilt, ki zot napa vremen en program pou ankadre zot.

Kot Leköl Sourd: Leköl pou zanfan ki pa tande sitey kot ansyen leköl *Maritime Mont Fleuri*. E i en leköl ki'n ganny administre par lasosyasyon pou bann dimoun ki pa tande, Anba *chairmanship* Madanm Gardener.

Bann ansennyman in ganny anrezistre anba Minister Ledikasyon ki i fer ki zot

selman ganny peye par Minister. *Curriculum* lekol in ganny drafte e plizoumwen parey pou bann lekol Gouvernman.

Pandan sa *visit*, bokou konsern ti ganny leve. Paran pa oblize anmenn zot zanfan laba, malgre ki zot zanfan i annan en problem tande. Napa en Lalwa oubyen en Polisi kler an plas. E i annan sa mank kordinasyon ant sant reabilitasyon, kot i fer tes zorey e Lekol Sourd.

Zanfan ki annan problem tande, i selman tous en *allowance* a laz 14an, konpare ek bann zanfan ki otreman kapab. Zanfan ki Praslin ek La Digue pa benefisye ditou avek sa lekol, an vi ki lasosyasyon napa sa resours e sipor, malgre ki i annan plizyer zanfan lo sa bann zil, ki i annan problem tande.

I annan mankman dan bann ansenyan ki fer *sign language*. E rekomandasyon Mr Speaker, *Caucus* Madanm pou zwenn avek Minister Ledikasyon e lezot *partner* ki konsernen, pou diskite sa bann konsern. Sirtou kot i konsern rekritman nouvo ansenyan e *training* pou tou lede lenstitisyon. E vwar ki mannyer zot ganny plis sipor, pou fer sa de lenstitisyon lo menm nivo ek bann lezot lekol.

E pou terminen, mon ti a kontan remersi Lekol Eksepsyonnel e Lekol Sourd pou akey nou, kot sa de lenstitisyon. E swet tou bann *staff* kouraz dan sa travay nob ki zot pe fer pou sa bann zanfan. Avek sa de mo, mon annan plezir Mr Speaker, pou prezant raport ek Lasanble Nasyonal. Mon remersye ou.

MR SPEAKER

Mersi Onorab. E les ankor enn fwa mon ava remersye *Women's Caucus* pou zot travay. Zot langazman lo bann size sosyal, ki mon krwar i en parti enportan travay nou Lasanble. Mon a demann madanm raporter pou kolekte rapor *Women's Caucus* silvouple.

Bon, avan nou al lo lezot Mosyon ki lo *Order Paper*, mon'n ganny en demann kot *Leader* Lopozisyon, pou li anmenn en Mosyon *Without Notice*, pou *suspend* en *Standing Order*. E sa i kler anba *Standing Order* 42(6). Alor mon pou donn li laparol pou li anmenn sa Mosyon.

Me selman mon oule dir, mon pa tro sir ki prosedir Lasanble i devret swiv pou debat sa Mosyon. Si i devret annan en deba, si tou Manm i devret e kapab entervenir. Oubyen si mon kapab limit deba.

Alors sa ki mon pou demann *Leader* Lopozisyon pou fer, pou met son Mosyon ‘*To suspend Standing Order*’. Me selman pa adres li, nou a ganny li segonde. Apre mon pou demann ou, e osi *LGB* pou donn mwan zot lopinyon o prosedir ki nou devret swiv pou pran en tel Mosyon.

Fodre dir mon’n konsilte *Standing Orders* depi ler ou’n dir mwan ou Mosyon. Mon pa war naryen ki vreman defini lo la. E mon’n menm konsilte Deputy Speaker ki i annan en pe plis leksperyans Lasanble ki mwan. E nou pa’n arive dakor lo ki sa ki devret ganny fer.

Alor, *Leader* Lopozisyon, mon a demann ou, nou a prosede koumsa. Zis dir ou Mosyon san ki ou prezant okenn deba lo la. E ou Mosyon se pou *suspend* a *Standing Order* an relasyon avek en *PNQ* ki ou ti’n deza prezante, apre nou a pran sa prosedir. Apre nou a regarde ki mannyer nou pou *carry on*. Onorab Pillay.

HON SEBASTIEN PILLAY

Mersi Mr Speaker. Bonzour Mr Speaker e bonzour tou koleg Onorab. Premyerman Mr Speaker, zis permet mwan remersye Komite Madanm pou sa rapor ki zot in donner lo Lekol Eksepsyonnel.

Mon krwar i en keksoz ki Lasanble i apresye en kantite e

lo nou kote sertennman, nou *pledge* ki nou pou kontinyen donn sipor sa lekol *as much* ki nou kapab. Pou ede ki bann zanfan e bann dimoun ki travay kot sa lekol, i resevwar sa sipor ki zot bezwen pou zot travay. Alors mersi bokou Komite Madanm pou sa rapor ki zot in prezante.

Mr Speaker, mon Mosyon ki mon pe move ozordi bomaten, se en Mosyon pou demande ki nou sispann *Order* 25, e demann ou anba *Order* 101(1), pou permet mwan pou *move* en *PNQ* ki lir koumsa, ‘Lefe ki in annan plizyer rapor ki en O Zofisye dan Gouvernman ti tap en Zofisye Lapolis avek transpor apre en aktivite politik Dimans le 23 Oktob, eski Minis pou Zafer Entern i kapab eksplik Lasanble ki bann aksyon ki Lapolis pe pran, e eski i annan okenn lenvestigasyon par Lapolis dan sa ka?’

Ou’n demann mwan pou zis *move* mon Mosyon...

MR SPEAKER

Nou a *stop* la. Wi, nou a ganny segonde. Onorab Vidot.

HON AUDREY VIDOT

Mosyon i ganny segonde Mr Speaker.

MR SPEAKER

Mersi. Avan mon met Mosyon parey *Standing Orders* i

demann nou *to move*, annou pas lo sa kestyon prosedir. Mon a les ou adres premye Onorab Pillay.

Mon krwar mon kestyon sa ki mon'n mete i kler lo sa ki mon anv'i fer la. *Ok, go ahead.*

HON SEBASTIEN PILLAY

Mersi Mr Speaker. Ou pe *remind* mwan pou nou pa antre dan en deba...

MR SPEAKER

Wi, non, pa antre en deba la...

HON SEBASTIEN PILLAY

Mon ti a kontan Mr Speaker port ou latansyon...

MR SPEAKER

... prosedir lo ki mannyer nou *handle* en tel Mosyon.

HON SEBASTIEN PILLAY

Mersi Mr Speaker. Mon ti a kontan aport ou latansyon lo *Order 43*, nou *Standing Order*. E *Order 43* i koz lo *manner of debating motions*. I dir ki en Manm i a ganny kriye par Speaker pou *move* en Mosyon. E i ti ava *state term* son Mosyon apre fer okenn remark formelman, *move* sa Mosyon, parey mon'n fer.

I dir koumsa okenn Mosyon. *Including an amendment to a motion*; savedir en lamannman lo en Mosyon, eksepte en Mosyon ki ganny fer dan Komite i bezwen

ganny segonde. Sa in ganny fer par Onorab Vidot.

Trwazyenm, i dir si en Mosyon pa ganny segonde, be nou pa bezwen trwazyenm.

Katriyenm, i koz lo en Mosyon ki ganny segonde par en Manm ki rezerv son drwa. Savedir i pe respekte drwa en Manm pou koze. So ler segonnman en Mosyon i pe dir poudir sa Manm i annan drwa koze.

Senkyenm, ki en pertinan pou nou Mr Speaker, 43(5) ki dir, ler en Mosyon in ganny *moved* e segonde, kestyon i devret ganny propoze ek Lasanble e deba i kapab pran plas lo sa kestyon. Sa sizyenm.

Setyenm Mr Speaker, i bann keksoz administrativ. Vwala ki mannyer mon vwar *Standing Order* i dir sa Mr Speaker. Mersi.

MR SPEAKER

Mersi. Mon a les Onorab Georges adres prosedir la aprezan.

HON BERNARD GEORGES

Mersi Mr Speaker. Bonzour Mr Speaker. Bonzour bann Manm koleg Onorab e tou dimoun ki pe swiv nou. Mr Speaker mon konpran byen sa ki Onorab *Leader* Lopozisyon i anv'i fer, e i anv'i anmenn en *Private Notice Question* ki son privelez. *Standing Orders* i donn li sa

privilez. I pa en privilez konstitisyonnèl, me en privilez Lasanble ki *Standing Orders* i donn li.

Problenm ki mon vwar, se de, enn se en problenm, kan eski *Leader* Lopozisyon in kapab anmenn en *PNQ*? E mon krwar *Standing Orders* i kler. I kapab fer li anba *Order 35, at the start of Question Time*.

Donk i bezwen annan en *Question Time* ki ouver laport pou en *PNQ*. Parey nou konnen yer pa'n annan okenn *sitting* Lasanble, akoz ti en konze piblik e donk *Question Time* ki zeneralman pran dan Mardi, pa'n pran sa semenn e nou pe al direk dan Mosyon. Donk sa se premye problenm ki mon vwar.

Dezyenm problenm se ki Onorab *Leader* Lopozisyon pe demann ou anba *Order 101(1)* egzers ou Lotorite pou, '*The conduct of business of the Assembly*'. E mon pa krwar ki sa i vin atraver en Mosyon. Sa se en pouvwar zeneral ki ou, ou annan.

Kekfwa *Leader* Lopozisyon ti'n kapab anmenn en Mosyon anba *Order 97(1)*, ki permet li - ki permet nenport ki Manm anmenn en Mosyon pou sispann *Standing Orders*, e la kekfwa i ti ava kapab dir mon pe anmenn en Mosyon anba *97(1)* pou sispann *Standing Orders* e pou

ki mon kapab anmenn en *PNQ* en zour kot napa *Question Time*.

Me i pa'n anmenn son Mosyon anba *97(1)* e donk mon krwar personnelman anba sa lafason ki'n propoz son entervansyon bomaten, i napa lotorite. Me menm, annou *assume* ki i kapab anmenn en Mosyon anba *97* pou demann sispann *Standing Orders*, ki pou annan menm lefe, seta dir i anvi demann son kestyon en zour kot napa *Question Time*.

La mon krwar i ti pou *still* annan en problenm, akoz i paret mwan anba *97*, sel keksoz ki en Mosyon i fer se *include a statement of the proposed suspension, ok?*

Donk napa deba. E set enn sa bann kategori Mosyon kot napa deba parey en Mosyon ordiner ki ganny anmennen lo en size zeneral. Sa se en kategori Mosyon ki, en Mosyon i *move* pou *suspend Standing Orders*, en Mosyon i ganny segonde. E nou *go straight to the vote*. Akoz napa rezon pou annan en deba lo en tel Mosyon.

Se pou sa rezon ki *97(2)* i spesifye ki sa *mover* Mosyon i ava eksplike akoz i anvi *move* sa Mosyon. Donk Mr Speaker, san ki mon anvi *curtail*, e i pa ditou mon lentansyon privilez Lopozisyon pou li anmenn en Mosyon, pou sispann *Standing*

Orders dan en fason ki i kapab fer antre en *PNQ* en zour kot napa *Question Time*.

Mon krwar avek tou respe ki mon annan pou li, ki son Mosyon anba 101(1) *is - i pa efektiv*. E okenn Mosyon si ti pou anmennen anba 97(1), sa osi i ti pou ganny limite *to the moving of the motion to suspend seconded vote*. E pa ti pou annan donk en deba lo sa Mosyon. *Voila* Mr Speaker, mon espere ki sa i ava ed ou pran en desizyon. Mersi.

MR SPEAKER

Mon a bezwen prosed dapre sa ki mon'n kapab etidye dan *Standing Orders*. Wi petet *Leader* Lopoziyon tin devret anmenn son Mosyon anba 97. Me selman mon krwar anba 82(6) osi i permet li, alor nou a sanpas sa pwen.

Lo kestyon deba. Mon bezwen retoun lo Lotorite Speaker. Akoz mon pa war, e *Standing Orders* i donn permisyon pou Speaker enterpret *any Standing Order, suspense* i neserer, oubyen donn en direksyon lo la. Alor mon lenterer mwan, nou pa pas en lazournen antye pou debat lo sa Mosyon. *It's a Motion* ki nou bezwen *dispense with*, me selman i demann en lesplikasyon.

Alors sa ki mon pou fer, *the best that i can do* - sa ki mon pou fer. Mon pou permet

Leader Lopoziyon koz lo son Mosyon. E mon pou permet segonder Mosyon koz lo sa Mosyon. E mon pou permet 2 Manm lo kote mazorite pou adres sa Mosyon.

Selman mon a fer ankor en remark, aa Mosyon i en Mosyon *to suspend Standing Orders*. Nou pa pe debat *PNQ* ki *Leader* Lopoziyon in prezante dan son Mosyon. Alor *Leader* Lopoziyon i kapab fer referans avek son *PNQ* parey in fer, me i pa devret antre dan *merits of his PNQ*.

E zistifikasyon, alegasyon oubyen largiman. Nou pe debat *lo suspension of Standing Orders*. Alor son referans avek son *PNQ* i devret *minimum* ki permet piblik e Lasanble konpran son Mosyon. E mon a permet 2 Manm osi adres sa, e apre nou a pran en vot lo la.

Sa *ruling* mon regrete i final. Nou a bezwen prosed koumsa, *for the sake of managing the business of the Assembly*. Onorab Pillay, ou kapab adres ou Mosyon. 15 minit i ava *ok?* 15 minit. *Any speech. Thank You.*

MR SPEAKER

Mersi Mr Speaker. Mersi bokou pou donn nou loportinite pou nou adres Mosyon pou sispann *Standing Order*. Mr Speaker premyerman les mwan met

devan Lasanble, akoz mon'n bezwen prosed dan sa fason. Mon privez anba Lord 35 nou Lasanble ki donn mwan en privez pou anmenn en *PNQ*. I ganny seryezman afekte dan bann zour kot Lasanble pou napa en *sitting* Mardi.

E dan sa konteks alors i en privez ki mon'n ganny donner, me ki sipoze en privez ki mon egzerse zis dan 1 zour. Mon pa ganny drwa demann plis ki en *PNQ* e sa i kler, me mon annan drwa demann en *Private Notice Question*, parey ti mon lentansyon pou fer lo sa enn *sitting* ozordi.

Rezon akoz mon'n sit *Order* 43, set akoz *Order* 43 ki donn lavi *Order* 97 nou *Standing Order*. Ki permet en Manm pou move en Mosyon pou sispann *Standing Order* ki permet en Manm pou *move* en Mosyon pou sispann *Standing Order* san ki i bezwen anmenn en notis. Mon tre kler ki lord 97 i dir nou.

Dezyenmman, mon apresye lefe Me Speaker ki ou note 97(2), i pa fer referans avek deba. I fer referans avek en *statement* lo *purpose* sa Mosyon e 97 pa kapab *supersede* Lord 43 nou *Standing Order* ki dir ki bezwen annan en deba lo en *PNQ*.

San ki mon al dan merit mon *PNQ*, mon *PNQ* parey

mon'n lir oparavan, lefe ki in annan plizyer rapor ki en O Zofisye dan Gouvernman ti tap en zofisye lapolis avek transpor avek en aktivite politik Dimans le 23 Oktob, eski ki Minis pou zafer entern i kapab eksplik Lasanble, ki bann aksyon ki Lapolis pe pran? E eski i annan okenn lenvestigasyon par lapolis dan sa ka?

Mr Speaker, i pa mon lentansyon pou koz lo okenn alegasyon. Me mon ti santi poudir ti neserer pou ki piblik Seselwa e bann lezot zofisye Lapolis i ganny klarite dan sa ka. Kot i annan en zofisye ki'n ganny tape.

Personnelman Mr Speaker, mon'n ganny loportinite pou *visit* sa zofisye e in resevwar pa mal dimal. E ki ti neserer pou mwan lo mon kote, *from* en pwennvi imen, pou met serten presyon, pou ki sa size i ganny en latansyon neserer e ki sa size i ganny trete dan en fason serye.

Mersi Speaker, fodre ou a osi note, ki mon kote dan Lasanble Nasyonal, nou en kote dan minorite. Alors mon bezwen servi tou prosedir Legal ki a mon dispozisyon pou mon kapab fer pase mon pwen, ler mon konnen poudir mon pou annan en difikilte pou mwan fer li.

Ozordi sa ki mon pe fer Mr Speaker. Se zisteman sa.

Se pou montre ki Lasanble i en Lasanble vivan. E dan sa Lasanble nou kapab travay dapre nou bann lord e nou bann prensip, bann prosedir ki nou annan, pou mwan kapab fer monte en size devan nou Lasanble.

Mon dayer Mr Speaker met devan Lasanble si ou a permet mwan. Mon dir byen si ou a permet mwan Mr Speaker. Mon konnen ou *l'eau qui-vive* pou regarde ki mon dir, Mr speaker ki nou'n menm sanz, ou ti devret enform mwan ki nou pe sanz dat ki Minis pe vin prezant son Bidze devan Lasanble. Ki ti le 7 e la in vin le 4.

Malgre ki'n annan bann diferan tapaz, dan domenn piblik ki'n koz lo Bidze pe pas le 4. E en *rally* politik pe ganny fer par *United Seychelles*, son Dimans, mwan sa ki mon oule refer lo la Mr Speaker, se ki desizyon *ABC* pou napa en *Question Time*, ti en desizyon *ABC*.

Me en desizyon pou sanz dat ki Minis pou vin prezant son Bidze, i pa'n vin en desizyon *ABC*, e mon konpran parey ou'n dir...

MR SPEAKER

Ou off subject. Ou off subject Leader Lopoziyon.

HON SEBASTIEN PILLAY

Mersi Mr Speaker, mon'n dir parey si ou ava permet mwan, byensir. So, alors Mr Speaker, sete mon lentansyon ozordi bomaten, pou fer sir ki ler i annan en size pertinan, e en size ki neser ganny latansyon, e sirtou en size ki *involve* en O Zofisye Gouvernman, ki piblik i kapab ganny bann lenformasyon kler;- bann lenformasyon konkret. E ki nou *avoid* annan bann spekilasyon otour en tel size, ki pa fer personn okenn dibyen.

Be dan tousala Mr Speaker, nou bezwen osi montre ki Lasanble, pou toultan fer sir ki tou dimoun i bezwen konform avek Lalwa parey i ete. Baze lo bann spekilasyon, in annan serten koze - mon pa pou al dan plis detay ladan - in annan en serten koze, lo ki mannyer bann prosedir in ganny swiv.

E nou ti a kontan koman en Lasanble fer sir ki dan tou ka, okenn dimoun ki trouv zot dan menm sityasyon, menm prosedir i ganny swiv avek zot. E se pou sa rezon ki ozordi bomaten, mon'n pran sa desizyon pou mwan *move* sa Mosyon dan sa fason ki mon pe *move* li.

Dezyenmman Mr Speaker, rezon akoz mon'n evok *Order* 101, sa ki konsern Lotorite zeneral Speaker, zis parey ou'n donn en *ruling* lo ou

Lotorite zeneral, sete zisteman par pou dil avek sa lenpas ki ganny kree, ki si nou pe *sit* lo en zour ki napa en *Question Time* e ki son lavye i napa en *sitting*, then mon pe demann ou vi ki *Standing Orders* pa koz lo la, pou pran en desizyon lo ou Lotorite zeneral, pou *allow* ou pa *allow* sa *PNQ*.

Lefe i reste Mr Speaker ki malgre ki Lasanble pou decide pou *either* siport mon Mosyon e *allow* mon *PNQ* - pa siport mon Mosyon ki pa pou *allow* mon *PNQ* ganny pran, desizyon final pou ankor reste avek ou, akoz mon'n fer antre dan mon Mosyon Mr Speaker. Lord 101, ki met responsabilite pou desizyon. Lo pran sa *PNQ* dan ou lanmen.

E mon pe demann ou Mr Speaker dan lentere, asire ki Lepep Seselwa i reste enformen, e dan lentere ki Lasanble i gard en lizye lo sa ki pase dan Legzekitiv e dan nou pei. E bann prosedir ki ganny swiv, e pou montre ki napa de pwa 2 pwa 2 mezir dan tretman ki dimoun i gannyen, pou nou *allow* sa kestyon pase. Mon remerci ou Mr Speaker.

MR SPEAKER

Mersi Onorab Pillay. Onorab Georges. Ou ti a kontan pran laparol premye?

HON SEBASTIEN PILLAY

(Off-Mic)

MR SPEAKER

Yes?

HON SEBASTIEN PILLAY

Zis pou klarifye avek ou. Nou annan segonder Mosyon. E apre dapre *Standing Order*, okenn dimoun ki'n *move* en Mosyon i annan en *Right of Reply*. Ou kapab donn mwan...

MR SPEAKER

Right of Reply mon rekonnet. *Right of Reply* mon rekonnet, pa trakase. Mon oule dir poudir sa lensidan i a ed mwan trouv mon konesans, elarzi mon konesans lo *Standing Orders*. Onorab Georges.

HON BERNARD GEORGES

Wi, mersi Mr Speaker, ou'n donn mwan laparol?

MR SPEAKER

Wi, mon donn ou laparol.

HON BERNARD GEORGES

Mersi. Mr Speaker sa size i enn ekstrememan enteresan, e i donn nou tou dan sa Lasanble, e mwan menm parmi, en loportinite pou nou regard en sityasyon ki kapab *arise* ankor dan sa Lasanble. E dan en fason konpletman

neutral, pran en desizyon lo en tel sityasyon.

Akoz la i premye fwa ki in arive, me i posib ki i kapab ariv ankor. E mon krwar i enportan pou nou konman en Lasanble dan en fason san okenn lemosyon, adres sa size ki plito en size legal ek prosedir. E met a kote, kote sansasyonnel si ou anvi, ki motiv sa kestyon ki, sa *PNQ* ki *Leader* Lopozisyon i anvi anmennen.

Akoz annou pa bliye, ki se pa nou lo sa kote latab ki pe rod en leklersisman lo en keksoz ki'n arive avek en Minister dan nou Gouvernman. Me se Lopozisyon ki pe demann sa kestyon. E zot pe dir ki zot anvi fer sa pou anpes okenn spekilasyon.

Mon dir sa dan en parantez, aköz bann dimoun ki pe swiv nou deor laba, ava konpran ki lide deryer sa kestyon, se pa pou anpes spekilasyon. Me set en lide ki pirman politik. E la mon pa pe blanm personn. Sa set en Lasanble politik.

E *Leader* Lopozisyon in fer kler bomaten ki aköz i dan minorite - e mon dakor ki i dan minorite. I bezwen trouv tou laport ek tou lafnet, pou li sey anmenn bann Mosyon e bann kestyon devan Lasanble pou fer son travay politik.

Permet mwan Mr Speaker, o depar pou retourn

lo prosedir. E la mon retourn lo pwen ki mon'n fer, e mon pa pou dakor Mr Speaker - avek tou respe ki mon annan pou *Leader* Lopozisyon. Ki *Standing Order* 42(6) ki donn pouvwar. Non, 42(6) i senpleman donn en lalis Mosyon ki kapab ganny anmennen san notis. Se tou ki i fer.

I pa pe donn okenn pouvwar sibstansyel a okenn Manm pou fer okenn keksoz. Sa pouvwar sibstansyel, dan plizyer sa bann keksoz ki ganny liste dan 42(6), *including* en Mosyon pou sispann *Standing Orders* i depann pou zot lavi lo en lot *Standing Order*.

Par egzanp – *the Motion to suspend Standing Orders*, son *Order* ki donn li sa pouvwar se 97(1). Dan 42(6) i zis ganny mansyonnen ki sa set enn bann legzanp. Si par egzanp nou regard *the Motion to recommit a Bill* anba 42(6)(2), ankor enn fwa nou ava vwar ki son pouvwar sibstansyel i ganny trouve dan *Standing Order* 75.

Se la kot pouvwar i ganny donner pou *recommit a Bill*, eksetera, eksetera. Donk, mon pa ditou dakor ki Mosyon son baz se 42(6). Son baz si i anvi *suspend Standing Orders*, se 97(1). Me sa set en pwen pirman prosedir. I pa afekte

sibstans sa Mosyon ki devan nou la ozordi.

Dezyenm keksoz Mr Speaker, ki fodre zanmen nou bliye, se parey mon'n dir taler. *Leader* Lopozisyon i annan en privez pou li demann en kestyon avek 6erdtan notis. Se tou ki son privez i donn li.

Son privez se pa pou demann en kestyon, akoz i en Manm Lasanble, i annan menm drwa ki tou Manm Lasanble demann o tan kestyon ki i anvi demande. Napa naryen ki dir okenn par ki sel kalite kestyon ki en *Leader* Lopozisyon i kapab demande, se en *PNQ*. *Leader* Lopozisyon i kapab demann en *PNQ* bomaten e en pe pli tar demann o tan kestyon ki i anvi ki pa en *PNQ*. Me in swazir - sa enn *Leader* Lopozisyon in swazir pou demann selman *PNQ*. Sa se son drwa, e personn pa kapab antre ladan.

E sa privez, se pa en privez pou demann en *PNQ*, se en privez pou demann en kestyon avek selman 6erdtan notis. E sa i bezwen antre dan kad *Question Time*. E se pou sa rezon ki, sa *Order* ki permet en *PNQ* - *Order* 35, i dir spesifikman ki en *PNQ* i kapab ganny demande a o konmansman *Question Time*.

Trwazyenm keksoz Mr Speaker, se en *PNQ* i pa devret en privez pou abiz letan Lasanble. Akoz si nou swiv - si

nou swiv largiman Onorab, se ki a nenport ki moman i kapab demann en *PNQ*, zis si *move* en Mosyon pou li sispann *Standing Orders*. E si i ganny bann vot ki pou permet li fer sa.

Dan sa ka alor, sa ki nou kapab antisipe se ki dan nenport ki zour *sitting*, *Leader* Lopozisyon si i annan sifizaman vot, i kapab demann en *PNQ* bomaten. E i kapab demann en *PNQ* apremidi, Mardi. I kapab *move* pou sispann *Standing Orders* pou demann en *PNQ* Mercredi bomaten. E demann en lot Mercredi apremidi.

Annefe dan sa 6 semenn deba lo Bidze ki devan nou, si nou swiv largiman Onorab, i kapab si i annan sifizaman vot, *move* pou sispann *Standing Orders* pou li demann en *PNQ* toulezour ler nou vin en *sitting*. I pa kapab sa ki lentansyon ki deryer en *PNQ*. Set en privez. Se pou sa rezon ki ganny apele en privez.

E sa privez parey mon'n dir se pa en privez pou demann en kestyon. Manm i annan drwa demann o tan kestyon ki zot anvi. Pou vi ki zot swiv lord kestyon. Pourvi ki nou swiv ou direktiv Mr Speaker lo kan kestyon i ganny demande.

En *PNQ* se son sel diferans, se ki letan i ganny

shortened, ou nepli bezwen demann, donn 10 zour notis, ou bezwen donn selman 6 erdtan notis. E sa se senpleman pou *Leader* Lopozisyon.

E sa i anmenn mwan lo rezon det deryer en *PNQ*. E sa *PNQ* ler nou regard *Standing Orders* lezot Lasanble parey pou nou, e la mon'n konsilte plizyer lezot *Standing Orders* an koneksyon avek en travay ki *Standing Orders committee* pe fer. Pa neserman akoz sa Mosyon ozordi. Annefe sa i dat depi en pe letan deza.

E nou vwar ki en *PNQ* i annan 2 kondisyon. Enn se ki i bezwen en *matter of national importance*, e dezyenman se en *matter of extreme urgency*. E i kler, i bezwen sa de keksoz. E mon dir sa akoz pou okenn lezot keksoz. Si Onorab Pillay i anvi konnen par egzanp kan eski en *fence* pou ganny fer lo *court* Glacis, i pa bezwen demann en *PNQ* pou sa. I kapab demann en kestyon ordiner.

En *PNQ* i ganny limite depar son rezondet sa berdtan i ganny limite, akoz en kestyon irzan dan lentere nasyonal fe *arise*. E donk sa *Leader* Lopozisyon i kapab sezi sa Loportinite pou li demann Gouvernman reazir lo sa size.

E la nou vwar Mr Speaker ki dan sa kestyon ki'n ganny formile, sa i *neither one*

nor the other. Napa okenn lentere nasyonal, e napa okenn *extreme urgency* ki'n anmennen. Sa zafer in arive depi, plizyer zour. Depi ki in arive ti annan *sitting* Lasanble. *Leader* Lopozisyon in deside pou demann en lot *PNQ* e non pa sa enn. Sa se son privelez. Sa se son drwa. E in fer li.

Alor nou pa kapab ozordi, zis akoz napa okenn *urgency*, napa okenn rezon pou anmenn sa kestyon ozordi, sanz nou fason travay e vin lo en Mosyon ki nou tou nou konnen i annan en bi pirman politik.

Alor Mr Speaker, finalman, nou bezwen regarde eski dan sa konteks ki mon'n fer sorti ozordi, menm si sa *PNQ* ti'n ganny anvoye pou dan letan normal, en Mardi bomaten, ler ti annan *Question time*, eski i ti pou lafason ki'n ganny formile, eski i ti pou en *PNQ* akseptab?

E la se ou ki deside Mr Speaker. Anba *Standing Orders*. Si okenn kestyon *including* en *PNQ* i akseptab dan konteks privelez ki en *Leader* Lopozisyon i annan. E mwan mon ti a dir ki non. Sa set enn, en kestyon. Pa akoz nou anvi kasyet naryen. I pa dan nou lentere pou kasyet naryen. E *sooner or later, the facts will come to light*.

Me non, akoz nou tou nou konnen. E nou'n aprann

lo televizyon, parey *Leader* Lopoziyon in aprann, ki sa ki pe arive, se ki i annan en lanket ki pe *proceed*. Alor, ki nou ekspekte ki Minis ki pou vin devan Lasanble pou vin dir? Mon pa kapab antre dan soulye Minis, be mon kapab antisipe. Akoz mon annan en lespri dan mon latet, ki ler Minis pou vini pou dir “Mr Speaker mon pa kapab koz lo sa zafer, akoz i ankor dan lanmen Lapolis. Lapolis i ankor pe fer lanket.”

E setou ki nou pou konnen. Nou bezwen respekte, ki sa se sityasyon ki’n arive e sityasyon kot nou ete. Kekfwa - kekfwa si dan 3 mwan napa okenn prosekisyon ki’n ganny anmennen, *or whatever*, ki *Leader* Lopoziyon i krwar ki dan lentere nasyonal, i annan en kestyon pou demande, a sa moman la, kekfwa son kestyon i ava en kestyon apropiye.

Me bomaten, Mr Speaker, pou bann rezon ki mon’n donner, mon pa ditou satisfè ki okenn bann kriter pou sispann *Standing Orders* pou permet *Leader* Lopoziyon demann sa kestyon, in ganny aksepte. E pou sa rezon mon pe, avek tou respe ki mon annan pou li, mon pe pran en desizyon ki lo nou kote latab, nou pa pou kapab siport son Mosyon ki’n anmennen. Mersi Mr Speaker.

MR SPEAKER

Mersi Onorab Georges. Mon a pran entervansyon Onorab Audrey Vidot koman segonder Mosyon.

HON AUDREY VIDOT

Mersi Mr Speaker. Bonzour Mr Speaker. Bonzour tou Manm Onorab e bonzour tou dimoun ki al ekout. Mr Speaker parey mon koleg Onorab, Dirizan pou Lopoziyon in fer resorti anba *Order* 43(4), koman segonder Mosyon, mon ganny sa loportinite pou mwan koz lo la. Mr Speaker, wi pa premye fwa bann tel pratik prosedir i ganny fer devan nou Lasanble.

Si nou bann Manm i rapel tre byen, in annan bann sans kot nou’n war bann Manm ki’n vin avek bann kestyon irzan, kot in demann prosedir pou sispann *Order*, spesifikman pou zot ganny sans kapab demann zot kestyon, menm si i pa’n dan letan *Question Time*.

E si mon pou vin lo sa komanter ki Onorab Georges, atraver ou Mr Speaker, in fer resorti ki napa *urgency*, ti kapab vin petet dan letan kot, menm si nou pe pran Bidze, pou demann pou sispann, mwan mon krwar i pa neserman fer sans. Akoz in arive kot i annan Manm ki’n demann kestyon irzan.

Par egzanp lo mankman latizann. E ankor la, nou pe vwar poudir i annan mankman. Mon konpran poudir pasyan kanser. I annan zot pe ganny difikilte pou gannnen. So, Manm i *still* kapab demande pou sispann *Standing Order*, pou zot kapab demann bann tel kestyon, akoz i ankor pe arive.

E parey nou'n ganny dir, in en pratik. Prosedir pou demann kestyon dan *Question Time* in en pratik ki Lasanble in pran, ki pran li dan Mardi. Me in arive dan Sizyenm Lasanble kot apart ki Mardi, kot *PNQ* in ganny anmennen, kot Minis in deza ganny somonn pou vin dan Lasanble, pou vin demann, pou ganny demande kestyon, e Lasanble in aprouv sa.

E mon pa war kwa ki annan ki difisil, oubyen parey Onorab Georges in dir, si Gouvernman napa naryen pou kasyet;- in en size ki'n dan domenn piblik. I annan lenvestigasyon si ganny fer oubyen non, i a diskresyon Gouvernman pou vin klerman, pou vin donn lenformasyon lo la. E anpes plis spekilasyon parmi piblik.

So, mwan mon santi, pou en Manm, ki enportan ki Gouvernman i pa mank sa sans. Pa rat sa sans pou li vini pou vin eklersi. E kas sa bann petet spekilasyon ki egziste.

So, petet mwan mon pou demann bann Manm pou reflexir byen.

Akoz ozordi i en *PNQ* ki pe ganny demande pou sispann *Standing Order*. Demen osi i kapab en *Urgent Question*. Ariv en sityasyon kot zot pou bezwen en Manm lo lot kote latab. Posibilite i pou en size ki zot pou bezwen sipor tou le de kote - zot koleg, ensi kot lo kote Lopozisyon. Pou kapab bann menm plis klarite, lo serten size ki petet pou demann Gouvernman pou eklersi.

So, mwan lo sa pwen Mr Speaker, mon pou demann bann Manm lo lot kote latab, reflexir byen zot desizyon. Akoz parey mon'n dir, i enportan ki, ozordi i en *PNQ*, demen i en *Urgent Question*. Nou osi i annan nou ki annan nou dan distrik, ki ti ava swete ki petet en Minis i vini, i eklersi petet serten, sityasyon ki'n arive. Nou met li, nou pe koz lo latransparans, rann kont. So i en loportinite. E a diskresyon Speaker menm si, i annan en Mosyon pou demann pou sispann.

Me, nou konnen parey nou'n dir le pase, in annan ka kot Speaker in donn lotorizasyon Lopozisyon pou kapab somonn Minis pou vin devan. Menm si pa letan *Question Time*. I letan en Merkrede ki nou annan bann

sesyon, pou li kapab vini ou li vin met serten leklersisman devan pep Seselwa. Mersi Mr Speaker.

MR SPEAKER

Mersi Onorab. Lo kote mazorite, Onorab Henrie wi.

HON GERVAIS HENRIE

Mersi Mr Speaker. Bonzour tou dimoun. Mr Speaker mon ava konmans mon lentervansyon kot Onorab Vidot in terminen. In dir nou poudir in annan lenstans dan lepase kot in annan leksepsyon *PNQ* Merkredi.

Mwan, fodre amwen mon lespri i vremen pa pe fonksyonnen bomaten, mon pa rapel en lenstans. E mon ti pou vremen apresye si Onorab ti'n kapab *substantiate* sa. Fer nou rapel, e kekfwadan zot largiman zot ti kapab servi sa koman en largiman pou dir ou, be la la en presedans ki'n annan dan Lasanble.

Wi lo bann zour se ta dir Mardi kot ki annan *Question Time. Question Without Notice*. Ouswa *Urgent question* i ganny aksepte. Me sa i presedans ki Lasanble in etabli pou dir ki sa zour nou pe demann kestyon, alor sa i permet.

Me an dizan sa, pou ranforsi pwen ki Onorab Georges in fer dan son lentervansyon, wi i kapab arive ozordi, ouswa en lot zour

ki *PNQ* Lasanble i tonm dakor ki i pran Merkredi. I kapab arive. Akoz? Parey Onorab Georges in dir nou, laplipar Parlman atraver lemond i regard *PNQ* koman en size ki annan en lenportans nasyonal, ouswa en lirezans ekstrenm.

Savedir dan en ka eksepsyonnel. Demen nou pa swete, me i arive ki Lasanble i bezwen demann en *PNQ*, ouswa *any other question*. En avyon par egzantp i tonbe. En bato i koule. En deversman delwil. En aksidan trazik lo semen. En katastrof natirel, glisman teren, *whatever* - irzan e lenportans ekstrenm lo nivo nasyonal. Mon pou premye pou dir avek *Leader* Lopoziyon, we, nou pou siport ou pou anmenn en *PNQ* pou rod klarite.

Alor Mr Speaker, nou bezwen, nou koman Manm Lasanble - e anfet mon krwar semenn pase mon fek fer sa remark, nou *Standing Orders* i nou Labib. Li ki diriz nou dan tou nou bann keksoz. Si nou menm nou, nou pa komans fer atansyon, nou menm nou, nou pou kas sa *Standing Order*. E letan Setyenm Lasanble pou'n fini, nou pou bezwen dir be kales in kase. Be nou ki ti dan kales ki'n kas li.

Konmsi si i annan bann presedans ki'n etabli, annou kontinyen swiv. Merkredi, i

pa'n zanmen - depi ler nou'n konmanse depi Oktob 2020, anmenn en *PNQ* Mercredi. Alor i annan presedans ki'n ganny etabli la.

E parey Onorab Georges in dir, semenn pase, *Leader* Lopozisyon i ti annan tou son privez pou li anmenn sa kestyon. Lensidan ki i pe koz lo la, ti ariv le 23 Oktob, ki ti en Dimans. Be Lasanble ti asiz Mardi le 25. I ti kapab anmenn sa kestyon la, alor nou ti pou napa difikilte avek.

E wi, pou tou dimoun ki anvi konn larepons sa kestyon i kapab telefonn *Public Relations Officer* Lapolis parey mwan mon'n fer, mon'n demande *what is the status?* Wi, *case* pe ganny *investigate*. Parey okenn case trafik. *That's the answer I got.*

Be alor aköz nou bezwen anmenn la anndan? Aköz sertennman i annan en motiv politik. E son kestyon Mr Speaker, i pres pou li *infringe* lo Order 36(1)(l)(m)(n). Ou vwar? So, mwan mon pa pou kapab siport sa Mosyon, aköz mon pa war i en *matter of national importance*. Mon pa war poudir i en *matter of extreme urgency*.

Mon krwar poudir ti annan tou letan semenn pase pou *Leader* Lopozisyon anmenn sa kestyon. E la ozordi sa lirezans e sa lenportans i pe evapore e i en

case ki anba lenvestigasyon. Keksoz ki ti kapab ganny dir dan sa Lasanble, i ti kapab ganny konpromiz - kapab konpromiz sa *case*.

Alor, Mr Speaker. Ou'n dir ki zis 2 Manm lo sak kote ki pou koze. Si ti annan ankor, koman mon ti annan laparol, mon ti pou *evoke Order 24*, ki nou *close debate* e loter Mosyon i *move* ki fer son *Right of Reply*. Alor, mon krwar nou kapab pran en *vote* lo sa size enn fwa ki *Leader* Lopozisyon in fer son *Right of Reply*. Mersi.

MR SPEAKER

Mersi Onorab Henrie. Wi, *Leader* Lopozisyon i a ganny son *Right of Reply*.

HON SEBASTIEN PILLAY

Mersi Mr Speaker. Mersi tou Manm ki'n koz lo sa Mosyon. Mon apresye zot reaksyon e zot bann komanter. E aksepte ki, aksepte ki'n ganny pran dan *bonne foi*. E an tout konsiderasyon dinamiz nou politik dan nou pei ozordi ki reprezant nouvo lapros, ki sa parti ki mon reprezante i oule pran.

Premyerman Mr Speaker si ou permet mwan adres serten pti pwen ki'n ganny souleve vizavi lentansyon. Lentansyon. Sa mo 'lentansyon' in ganny met devan atraver sa *PNQ*, apre on ava donn serten pwen lo

serten, lo *substantiating* serten largiman ki'n ganny fer.

Premyerman Mr Speaker, mon bezwen note ki i annan en fasinasyon enteresan lo lapar parti mazoriter;- savedir LDS avek mon bann PNQ. Sa in vin en referans dan en *rally* politik fer par Prezidan li menm. E la ozordi mon tande poudir i annan en travay ki pe ganny fer lo pou amann *Standing Orders*, pou fer ki mon bann PNQ i vin zis bann PNQ ki koz lo *national importance and extreme urgency*.

Sa i fer mwan demann mon lekor akfer nou annan *Urgent Questions* anba nou *Standing Order*? Premye pwen

Dezyenm pwen Mr Speaker, pou *substantiate* mon pwen lo sa ki nou apel *extreme urgency*. Onorab Georges byensir e Onorab Henrie, 2 Manm preminan dan *Caucus LDS*;- enn i Sekreter Zeneral e lot i *Leader* Zafer Gouvernman ozordi. Me zot ti asiz lo sa kote latab a en moman donnen. Mon ti a kontan zot klarifye pou mwan;-

Where was the extreme urgency ler Onorab Ramkalawan, koman *Leader* Lopozisyon? Ti anmenn en PNQ pou demann lo *status citizenship* Mr El Materi ki nou pa ankor tann koz lo la ankor? Eski ti annan en *urgency*?

Eski ti en *matter of national Importance* ler i ti fer sa? Non! Or kote ti annan *extreme urgency*, oubyen *matter of national importance* ler Onorab Ramkalawan ti anmenn kestyon *regarding* larive bann avyon lo *airport*. I ti fer bann Minis taye dan Lasanble pou al gete? *There was none*.

So, sa ki mon pe war Mr Speaker, se ki ozordi, malerezman e mon konnen ou pou aret mwan - ou kapab aret mwan a okenn moman ou santi mon pe *overstep* bann laliny nou deba, ki Prezidan probableman li menm li i pa anvi ki mon demann PNQ. E se pou sa rezon ki i pe enfliyans Onorab Henrie.

Malerezman Mr Speaker mon pa pe *impute*, me mon le zis dir ki lefet ki Onorab Henrie i Sekreter Zeneral LDS. Pou *move* koman *Chairman Standing Order* pou *curtail* mon bann PNQ. I pou en legzersis ki pou difisil. I pou en legzersis ki mon pou reziste. E i pou en legzersis ki an tou ka Seselwa an zeneral pa pou kontan.

Dezyenmman Mr Speaker annou met la realite an fas, *ok*? Mon'n swiv tou prosedir nesese pou mon kapab demann, anmenn sa Mosyon devan Lasanble. E met sa kestyon devan Lasanble. Rezon i senp Mr Speaker. Akoz semenn pase

mon pa'n le demann sa kestyon, se aköz semenn pase parey tou Seselwa e parey tou dimoun, mon pa ti konn okenn lenformasyon lo sa size.

E *therefore* ti pou iresponsab lo mon par pou anmenn en *PNQ* lo en size dan ki mon napa lenformasyon. Erezman ki ozordi kot mon debout la mon annan lenformasyon e alors mon dan en pozisyon, pou mwan kapab demann sa kestyon. E zisteman Mr Speaker parey sa Lasanble atraver Onorab Georges, atraver Onorab Henrie, byensir atraver ou Mr Speaker, in souvandfwa fer, in demann Lopozisyon *to get your facts right* avan ou vin demann ou kestyon. E mon kapab *quote* Onorab Henrie atraver ou Mr Speaker, lo sa term '*get your facts right.*'

So, safwasi mon'n ganny mon *facts right* e mon pe vin demann sa kestyon *on the right facts*. E Minis ki ti ava vin reponn sa kestyon, ti ava vin reponn *whether or not my facts are right. Or whether my facts are wrong*. So, mon pa war okenn rezon pou nou al dan en largiman lo si mon ti konsider sa size enportan. Mon ti ava anmenn semenn pase.

Me sa ki enteresan Mr Speaker, par dir sa ki zot in dir, bann Manm lo kote mazoriter. Onorab Georges, Onorab Henrie, in

esansyelman donn nou en nide dan zot *psyche*. Savedir en nide dan zot panse.

Ki zot war *PNQ* koman en keksoz ki anbarasan pou Gouvernman. Difisil pou Gouvernman dil avek. E sirtou ler ou annan en Lopozisyon minoriter ki pou fer tou pou demann Gouvernman tou kestyon, sa i vin en problem pou en Gouvernman ki pa oule reponn kestyon.

Me zot in osi montre nou poudir zot menm zot, zot santi *deep down* ki zot krwar pou dir sa i en *PNQ* enportan. Aköz lefe ki Lasanble in dedye atraver zot plis ki apepre lerdtan pou debat sa size.

Mr Speaker mon enplor ou. Desizyon final i dan ou lanmen. Nou annan en zenn polisye ki'n ganny en aksidan. Demen en lot polisye i kapab ganny en aksidan dan en lot fason. Ou'n dir mwan pa koz lo merit sa ka e mon krwar merit sa ka in ganny trete atraver bann deba ki'n ganny fer par kote mazoriter.

Me sa ki enteresan Mr Speaker, se ki ler mon'n tann Komisyoner dir mwan poudir ler sa zofisye in ganny tape in al get sa dimoun ki'n koz sa aksidan, pou mwan Mr Speaker, sa in vin en pwen konsern. Eski *Management e Leadership* Lapolis i pran plis ka avek zot zofisye, oubyen

avek sa dimoun ki komet en lofans kont zot zofisyè?

Sa i en *food for thought* pou nou Lasanble. Akoz i annan en term ki ti ganny servi Mr Speaker dan en *Tête à Tête* par Onorab Henrie, ler i ti ganny apwente Sekreter Zeneral LDS Mr Speaker. Mon servi Onorab Henrie Mr Speaker akoz li pwen referans politik dan sa Lasanble. Mon pa kapab fer ou Mr Speaker akoz mon napa drwa servi ou ler ou dan *chair*.

E sa pwen referans ki mon oule fer se ki sertenman avek parti ti dir nou pa devret devlop en larogans. Mr Speaker, pou mwan i en larogans ler en sityasyon parey i arive. En tretman i ganny donnen pou tou Seselwa ordiner, savedir si ou'n fer en aksidan ou ranpli ou bann zafer lo *scene*. Apre ou kot Lapolis ou fer ou *statement*.

Ou bezwen aksepte tor eksetera. Me mon war li pou dir ozordi, nou pe al ver en sityasyon kot Gouvernman i krwar poudir i omniprezan e kapab fer tou.

Alors Mr Speaker, kekyon lefe ki'n annan plizyer rapor ki O Zofisyè dan Gouvernman ti tap en zofisyè Lapolis avek transpor, apre aktivite politik Dimans le 23 Oktob, eski Minis pou Zafer Entern i kapab eksplik

Lasanble ki bann aksyon Lapolis pe pran? Eski i annan okenn lenvestigasyon par Lapolis dan sa ka? I en kekyon ki al dwat ver leker Lepep Seselwa drwat ver sa ki nou apel lazistis sosyal. Drwat anver sa ki nou apel anba Konstitisyon Mr Speaker - E ou a permet mwan anba Konstitisyon tretman egal devan Lalwa ki tou dimoun i bezwen gannyen.

E mon demann ou Mr Speaker, mon enplor ou Mr Speaker pou servi ou Lotorite, lefe ki nou *Standing Orders* i silans lo sa size, pou *allow* sa *PNQ* pou pase e annou viv sa vre demokrasi ki nou Lasanble i oule reviv. E annou *call* sa Minis dan Lasanble. E fer li reponn sa kekyon e montre li ki Lasanble Nasyonal i act dan en fason endepandan. E Lasanble Nasyonal a tou moman i la pou egzers en *oversight*, e *scrutinize*. Savedir regard tou sa ki Gouvernman i fer. Mersi Mr Speaker.

(APPLAUSE)

MR SPEAKER

Mersi *Leader* Lopozisyon. Mon ava envit bann Manm pou vot lo Mosyon pou *suspend Standing Orders* pou permet en *PNQ* ganny demande malgre ki nou napa *Question Time*. Se sa kekyon ki devan Lasanble. Manm ki an faver

lev lanmen silvouple? Mersi. Manm ki kont? Mersi.

Lo kestyon pou *suspend Standing Orders* anmennen par *Leader* Lopoziyon. 8 Manm in vot pour, 17 Manm in vot kont, 0 in *abstain*. Donk sa Mosyon in ganny rezete par Lasanble. E mon pou prosed dapre desizyon Lasanble.

Toudmenm mon ava adres lot pwen ki Onorab *Leader* Lopoziyon in fer, se ki mon *set aside Standing Order* e anba mon prop Lotorite, pou permet li son kestyon. Mon regrete ki mon pa pou fer sa e mon pou zis donn en zistifikasyon. Pou mwan sa lensidan ki Onorab Pillay pe kestyonn lo la, i en aksidan ki'n arive lo semen.

E konman en aksidan, mon pa krwar poudir i size rezonnab pou en *PNQ* oubyen pou en kestyon dan Lasanble. I konsern en Minis e konportman Minis i kapab vin en size Lasanble. I annan en lot prosedir pou sa. Me mon krwar poudir dan sa ka, lefe ki ti enplik en Minis, i pa neserman fer li vin pli irzan. Oubyen fer li vin en *matter* avek lenportans nasyonal. Mon tenir lo la.

Mon a zis adres en lot ti pwen e la sa size *timing* ki mazorite in servi pou dir ki Lopoziyon - *Leader* Lopoziyon ti'n kapab anmenn

son kestyon semenn pase. Mon oule dekouraz sa.

Mon krwar poudir semenn pase, letan aksidan ti fek arive i ti pou tre mal pou en Manm vin kestyonn sa aksidan. Alor mon pa oule ankouraz *Leader* Lopoziyon e mon pa oule i pran sa largiman ki mazorite in avanse. Ki si en aksidan in arive, i ti'n kapab anmenn son kestyon son lanmen. Non. Mon pa dakor.

Finalman i annan pwen ki sa size i anba en lanket. I size en lanket. E mon krwar sa osi i en lot rezon aköz mon pa devret pran sa *PNQ*. Mersi Nou ava terminen lo la. Mersi.

I 10er. Mon ti a'n prefere pran en *break* avan nou komans lot size me selman nou annan en demi erdtan e mon pa tro anv gaspiy letan Lasanble, alor nou a *move* lo Mosyon ki lo *Order Paper*. E premye Mosyon i dan non Onorab Richard Labrosse. Onorab mon ava envit ou pou met ou Mosyon.

HON RICHARD LABROSSE

Mersi Mr Speaker. Bonzour Mr Speaker. Bonzour tou dimoun ki pe al ekout. Bonzour osi, en bonzour spesyal pou bann zabitan mon distrik Plaisance. Mr Speaker, Mosyon ki mon pe anmenn devan Lasanble ozordi, i lir *comme suivant*;

Lasanble i demann Gouvernman pou met an plas, ansanm avek Sekter Prive, bann mezir apropiye pour soutenir *stevedores* ler zot napa louvraz dan zot sekter loperasyon.

MR SPEAKER

Mersi. Permet ou Mosyon ganny segonde Onorab. Onorab Zialor?

HON NADDY ZIALOR

Mersi Mr Speaker. Bonzour *tout le monde*. Bonzour tou dimoun ki a lekout. Mr Speaker an linny avek *Standing Order 43(2)* mon pe segonn Mosyon table par Onorab Richard Labrosse. Mersi.

MR SPEAKER

Mersi. Onorab Labrosse. Ou kapab adres ou Mosyon.

HON RICHARD LABROSSE

Mersi Mr Speaker. Mr Speaker, detrwa lannen pase ti annan en diskisyon otour kondisyon travay bann *stevedores*. E an 2018 *S.I. 36* ti sorti avek tit '*Stevedores condition of Employment*' anba regilasyon Lanplwa 2018.

Dan sa dokiman ti met bann mezir ki ti pou siport e kouver bann *stevedores* koman bann travayer Seselwa isi Sesel. Par egzanp, ti annan provizyon saler *minimum*, pou

zot dapre tonaz e lezot provizyon ki lezot travayer Seselwa i zwir, tel ki konpansasyon.

Ti osi annan en lot keksoz ki sa *S.I.* ti adrese. E sa ti en *retainer allowance*. Pou ki en *stevedore* i atase - si oule - avek en sel anplwayer. Me dapre konpran ziska prezan sa pa'n materyalize. Anfen dapre *website SEYLI*, sa *S.I.* napa en *commencement date*.

Dapre resers ki mon'n fer, serten anplwayer dan sa sekter in dir ki sa bout dan sa *S.I.* pa'n vin an mars aköz bann *stevedores* i kapab travay kot en lakonpanyen bomaten e al kot en lot apremidi. Donk, zot in panse ki si sa Lalwa ti ganny aplike, sa ti pou anmar lanmen bann *stevedores*. Vre rezon ki sa *S.I.* pa ti vin an mars i pa kler.

Le 23 Septanm 2019, en lot *S.I.* ti sorti pou ranplas sa enn 2018. Touzour anba regilasyon lanplwa, e touzour pe adres kondisyon travay *stevedores*. E sa nouvo *S.I.* ti sipoze vin an loperasyon le 1er Oktob 2019. E enn sa dokiman in donn plis detay ki enn oparavan ti'n mansyonnen. In dir ti devret annan en komite ki ti pou ganny apwente par Minis e non pa bann manm komite ti devret ganny gazete.

I enportan ki sa *S.I.* la Mr Speaker, aköz travay

stevedores i pa enn ki fasil. I demann bokou lafors fizik e bokou volonte. Fodre ou annan leker dir pou ou kapab soutenir sa lentansite travay ki demande parfwa. E pou sa, nou bezwen rekonnèt lenportans sa bann dimoun. Bokou pa kapab annan en lavi sosyal normal, akòz bato parfwa i arive san ekspekte. E sa bann dimoun i bezwen kit tou sa ki zot pe fer. Oubyen sa ki annan zot plan pou fer e pou ale.

Sete pou sa rezon ki plizoumwèn zonn ki fer sa travay. Akòz en manman par egzans pa neserman kapab kit son zanfan e ale a nenport ler. Alors sa bann *S.I.* ki'n ganny travay lo la, i laprev ki kek travay in ganny fer pou protez lenterè bann *stevedores*. E laprev ki zot travay i ganny rekonnèt. Sepandan napa provizyon ki'n ganny fer pou sipòrt bann lakonpanyen ki anploy sa bann *stevedores*.

Serten lakonpanyen in eksprimen, ki zot parfwa ganny difikilte pou ganny en travayer de kalite ler i annan travay. Donk prezans dan sa 3 lakonpanyen ki anploy bann *stevedores*, aprezan 2 ladan i annan drwa fer vini bann etranze pou travay. E enn bann rezon ki san dout sa lakonpanyen in war li neser pou rod rekour ek

etranze, akòz zot rankontre tro bokou *challenge* avek serten travayer Seselwa.

Bann *challenge* ki fer fas avek i disiplin. Kot i annan serten ki pa oule swiv prosedir abor bato, oubyen lo por. I annan ki vol kanmarad. Ki vyolan anver lezot. Parfwa menm an servi zouti, e osi sa ki zot servi drog ilegal letan zot pe travay.

I kler ki malgre ki annan sa *S.I.* ki'n etabli kondisyon travay bann *stevedores*, aprezan ki lankadreman i neser pou ede lo kote sekirite an zeneral e ede pou fer ki zot pran zot responsabilite koman en travayer dan zot pei.

Menm parey Sekter Prive in travay ansanm avek Gouvernman pou nobou devlop sa *S.I.* i neser pou zot osi pare pou zwenn ankor avek Gouvernman pou etabli bann mekanizm, ki a ed zot menm dan zot bann lobzektif koman anplwaye *stevedores*. Lankadreman ki nou pe koz lo la, i pa en keksoz ki nouvo dan lemonn. Annefe, laplipar pei i annan deza en lankadreman formel otour travay *stevedores*.

Par egzans en letid ki'n ganny fer detrwa lannen pase Lostrali, in dir ki sa pratik servi *stevedores* selman koman *casual labour*, in aret servi depi dan bann lannen

1960. Ozordi Lostrali i annan li 4 kategori *stevedores*. Mr Speaker, mon ava prezant sa bann ki mon'n gannyen dan mon resers.

Premye i en *full time permanent employees*. *Stevedores* ki anploye par en lakonpanyen a plen tan. Zot ganny peye pou 35 erdtan ordiner par semenn. E sa i annan son bann kondisyon byensir. Zot osi *entitled* konze anyel e lezot medikal dan serten pei. Bokou bann travayer ki travay avek bann masin ki anploye koumsa. Akoz i demann en *skill* ki fodre ou ganny formasyon pou fer.

Dezyenm Mr Speaker, i apel *Guaranteed Wages Employees*. Zot osi zot annan en kantite kondisyon permanan. Selman zot annan en *cap* lo la kantite erdtan zot kapab travay par semenn. E zot osi ganny konze anyel lo baz *pro rata*.

Trwazyenm, i *supplementary employees*. Bann ki annan preski menm kondisyon parey *stevedores* Seselwa. Nouvel Zelann i apel zot *casual workers* parey isi Sesel. I ganny travay ler i annan *as - as when*, parey nou dir. Zot pa ganny benefis konze anyel ek konze medikal. Selman zot annan serten lezot benefis ki egziste dan zot pei. E zot osi annan drwa travay

pou plizyer lakonpanyen an menm tan.

Mr Speaker dernyen kategori, i apel *Australian Vocational Trainees*. Sa i en form parti sistenm ledikasyon Lostrali e zot sistenm *TIVET*. Kot bann etidyan i ganny formasyon striktire pou 2an. Savedir ki *Stevedores* laba i ganny kek formasyon formel avek kapab fer sa loubraz. Me dapre konpran sa i pa en lobligasyon. E en dimoun ki'n swiv sa formasyon, pa neserman garanti en travay apre.

Isi Sesel i annan *stevedores* ki annan en lot loubraz ki zot er ler napa bato. Son lavantaz se ki ler napa bato zot *still* ganny en larzan ki zot avek zot bann pti *commitment* finansyel. Dezavantaz se ki zot kapab *busy* avek sa travay. I pa kapab sorti ki ler en lakonpanyen i bezwen zot.

Kekfwa en formasyon ava ed bann dimoun ki annan nide antre dan sa sekter.

Pou zot zer lavi profesyonnel ek finansyelman pli byen, petet Sekter Prive i kapab antre la. Par egzanp organiz bann sesyon formasyon, ansanm avek bann lenstitisyon ki egziste.

Petet Mr Speaker, nou kapab pran en pe legzanp lo sa bann striktir Lostrali. Me byensir fodre ki nou adapte li

zot avek nou konteks. Ler nou annan en lankadremman formel i osi fer provizyon pou regilasyon nesaser. Parey mon'n fer sorti avan. Laspe sekirite travayer i enn ki pou okip bann lakonpanyen bokou.

Me malerezman, serten sa bann problem i aköz move konportman serten travayer. Avek en lankadremman nasyonal formel, i ava osi annan bann regilasyon ki bann *stevedores* i bezwen swiv. Mon a sit serten legzanp ki petet i kapab ganny konsidere.

Lo kote lizyenn; Vi ki zot pe travay avek mater premyer manze pou imen - dan sa ka pwason - i kapab ganny regularize anba bann regilasyon *Food Handling* kot dapre Lalwa Sesel, si ou pe manipil manze, i annan en serten tes medikal ki ou devret fer. E i annan serten maladi ki pa permet ou manipil prodwir manze. An se moman, bann *stevedore* pa pe fer sa bann tes.

Lo kote medikal osi, en dimoun i devret annou bokou kondisyon lasante pou kapab antre lo por e fer bann loubraz *stevedoring*. Par egzanp si en dimoun i ganny *epilepsy*, i kapab en danze pou son prop lekor, oubyen pou en lot *stevedore*.

Sa 3 lakonpanyen i kapab travay ansanm avek sipor teknik bann Minister e Departman Gouvernman konsernen, pou drafte en dokiman, ki dil avek bann konsern lo kote lizyenn ek medikal. Menm largiman lo kote servi sibstans, en dimoun ki antre lo por anba lenfliyans lalkol oubyen drog, i kapab en gro danze pou lezot. I devret annan regilasyon depi kot larantre ki okenn dimoun ki pa dan son leta normal, pa kapab ganny akse avek landrwa telman *busy* e danzere parey lo por.

Lo kote *safety*, vi ki en por i en landrwa avek bokou mouvman, i enportan ki bann *stevedores* i servi bann lekiman *safety* apropiye, tel ki;- *safety hats*, soulye apropiye, eksetera. Bokou pa oule mete. Me avek en lankadremman formel, i ava fer li obligatwar. E sa i ava en proteksyon pou zot menm.

S.I. 55 2019 in mansyonnen ki en anplwayer *stevedore* i devret swiv bann provizyon regilasyon, *Occupational Safety and Health 1991*. Se pandan i pa fer mansyon ki *stevedore* osi i oblize swiv sa regilasyon koman en travayer.

Ankor la, sa 3 lakonpanyen i kapab travay ansanm pou kree en standar nasyonal lo sa laspe. Sa i a

servi zot menm an premye. pou fasilite zot travay. En lot keksoz tre enportan ki fodre fer resorti Mr Speaker se ki *stevedore* i ganny rann zot larzan *tax*. Savedir malgre ki *tax* i tire lo zot lapey. A en serten dat dan le mwan, zot ganny rann sa larzan.

Petet en fason ti a ede ki zwir en lasistans moniter ler napa bato dan por. Se par fer sir ki zot pe pey *tax* avek SRC parey lezot travayer Seselwa. Sa larzan i ava kontribye dan sistenm sipor sosyal, dan ka ki zot ava war zot dan bezwen en zour. Lo laliny S.I. 55(6)(1) i demande ki anplwayer i gard rikord lo tou rediksyon ki ganny fer lo lapey bann *stevedores*. E sa i ava ed SRC dan son travay. E si i pe ganny fer.

En lot fason ki bann Sekter Prive i kapab siport bann *stevedore*. Se par ofer zot bann travay ki disponib dan sezon ki napa travay dan zot domenn. Mon'n mansyonnen pli boner ki sa bann zonn i annan bokou kouraz fizik parey nou'n dir. Donk bann lezot travay ki ou bezwen sa bann *skill* parey i kapab servi zot kapasite.

Mon pe koz dan Sekter Konstriksyon par egzantp. Labourer en travay ki kapab ganny fer. I deza annan bann *stevedores* zot menm ki al rod zot *part time* ler napa bato. Be

annou rod bann ki pa konnen ki kapab fer sa. Bann dimoun ki fer kours *pick-up* zot rod zonn pou savoye. Akoz pa rod zot ler zot konnen napa travay lo por. Bann anplwayer zot menm i devret kapab fasilite sa, akoz zot sipoze annan rikord tou sa bann *stevedores* e zot konnen ki mannyer pou kontakte zot.

Kot IOT plizyer seksyon laba tanzantan pe rod travayer *part time*, swa dan *loading* ek *unloading* menm. Dan *butchering*. Kot i grat pwason eksetera, anplwayer *stevedores* i kapab fasilite zot lantre laba si zot kiltiv en bon relasyon avek sa lakonpanyen.

Lo bann laferm preski toulezour ou tann zot pe rod travayer. La en bon sours travayer la. Sekter Prive i devret sezi loportinite pou ganny sa bann dimoun a zot sipozisyon. Fermye i devret kapab kontakte sa 3, e anplwayer etabli en relasyon ki a permet zot ganny en travayer pou ed zot. Lo en lot sizesyon prive avek sipor Gouvernman ti kapab kree en *website* par egzantp, kot bann *stevedore* ti kapab *advertise* zot servis e piblik an zeneral ti a kapab aste zot servis.

Par egzantp si en dimoun i bezwen fer kek louvraz netwayaz kot son lakour, me i bezwen led, i a pey zot en

stevedore ki pare pou fer sa louvraz. Petet sa i kapab ganny en partenarya ant sa 3 anplwayer avek Minster Lanplwa. Oubyen avek bann *employment agency*.

I pli bon ki bann *employer* ki donn sa lenformasyon koman en kalite referans pou bann *stevedores*. An menm tan sa, i a en fason pou met lezot *skill* sa bann *stevedore* devan, e pou kwa pa ed zot annan en lot sours reveni stab, dan letan kot sezon i en pti pe ba. Petet i pa pou pey parey, me selman i ava vin en led adisyonnèl ler nou napa naryen parey nou dir.

Mr Speaker tousala i demann en zefor anplis, lo kote ledikasyon an zeneral. In ler pou nou aret denigre bann travayer parey *stevedoring* an krwayan ki sa louvraz i pou bann dernyen dimoun grad.

I annan bann bokou dimoun ki annan lezot talan e *skill*, me in deside pou vin fer sa travay, akoz i pey bokou pli byen e ki en kantite lezot travay isi Sesel. Bokou osi ki nou montre bann zenn lenportans, se ki mannyer fer bidze le mwan avek nou larzan lafen dimwan pou ki kapab *stretch* sa saler osi ki al en pti pe pli lwen.

Fodre osi ki bann landrwa travay prive e piblik, i fasilite travay *part time* pou

bann dimoun ki pa kapab vin a plenn tan. In ler pou nou komans enplimant *flexible hours* enn fwa. Al gete ki kantite problem ler *flexible* i ava aranze.

Pou terminen Mr Speaker, i enportan ki mon dir ki sa bann propozisyon i pa'n ganny fer pou pini *stevedores* oubyen pou abes zot. Me pou donn sipor bann lakonpanyen ki anploy zot. Pou fer sir ki zot kapab kontinyen kit zot dan lanplwa. I annan bokou *stevedores*, bann vre profesyonnel dan zot travay. Zot swiv regilasyon, zot kontribye dan zot fanmir. E zot bann paran responsab.

E sa bann *stevedores*, ensi ki tou lezot ki leve tou le bomaten ler radyo i anonse ki bato in antre dan por, Zot bann kontribiter vremen enportan dan Lekonomi Ble. En lekonomi zeneral pou nou pei. E se pou sa rezon ki nou bezwen fer sir ki nou regulariz zot profesyon byen. Pou ki zot kapab vwar zot plas byen dan sa sekter privotyèl Sesel e ki zot ava vwar ki zot en mayon dan sa gro lasenn zot osi. Avek sa Mr Speaker, mon termin mon Mosyon. Mersi.

MR SPEAKER

Mersi Onorab Labrosse. Mon a ganny bann Manm ki swete entervenir lo sa size silvouple, a se moman. *Ok*, mon annan

zis enn alor, nou a kapab... mon a pran premye Onorab Zialor, segonder Mosyon.

HON NADDY ZIALOR

Mersi Mr Speaker. Ankor enn fwa bonzour tou koleg Onorab. Bonzour tou bann ki al lekout. Mr Speaker mon'n segonn sa Mosyon parske pou la senp rezon, ki mon santi ki Sekter Lapes i enn bann sekter trez enportan dan lekonomi Sesel. Annefe Sekter Lapes i ganny regarde koman sa 2enm pilye lekonomi nou pei.

E zis pou mon fer en pti tourdorizon. Dapre statistik SFA an 2019, pei in *export* apepre 6mil 600 tonn pwason ekivalan 13milyon Dolar ki ti ganny enzekte dan nou lekonomi pandan sa lannen. E la mon pe koz 2019. Ladan apepre 6.5milyon Dolar ti sorti dan leksportasyon ton ki sorti dan nou lanmer.

Annefe sa sekter ki'n byen ganny etabli in en sekter ki'n reste dinamik. Malgre - reste dinamik e rezilyan. Malgre bann diferan sok lekonomi ki nou pei in fer fas avek depi son legzistans. Bann sok tel koman bann reform ekonomik e sosyal e byensir resaman lenpak Pandemik Covid-19, ki'n anmenn osi serten lefe ekonomik mondyal e sosyal. Byensir isi Sesel nou pa'n ganny eparnyen.

Sepandan sa pandemik, sa lendistri in demontre son vre potansyel. Ankor enn fwa, statistik i demontre ki zis pandan lannen 2020, lizin *IOT* Sesel in double son kou e son nivo eksportasyon ki ti pe fer aletranze konpare avek 2019.

Nou kapab dir ki pandan 2020, letan lemonn e letan Sesel ti dan lensertitid, sete Sekter Lapes ki ti pe soutenir nou lekonomi. Bomaten, loter Mosyon in anmenn en Mosyon ki pe tous en group dimoun ki annan en rol signifikan dan sa lendistri.

Annefe, personnelman, mwan mon konsider zot koman bann *frontliners* ki pe asire ki sa pwason, sirtou sa ton ki nou manze, ki sorti lo *dock*, i bann ton de kalite. Sa ton ki i ariv devan nou laport ki nou rousi la avek en pti git delwil *sunflower*, i reste sa ton de kalite. E byensir pou sa arive, nou depan lo sa bann *frontliners*, depi ler zot pe tir li dan bato e fer sir ki i ariv dan lendistri.

Mr Speaker, en tel Mosyon ki pe demann Gouvernman pou met an plas ansanm avek Sekter Prive bann mezir apropiye, pou soutenir bann *stevedore* ler zot napa louvraz dan zot sekter loperasyon, pou mwan sa i demontre langazman nou Gouvernman.

Premyerman, pou nou ekoute. Pou nou analize. E egalman partaz nide pou vwar ki pli meyer fason pou nou donn ledikasyon, *empowerment* e pli enportan, ki direksyon nou pran koman en pei, pou asir soutenabilite en tel sekter. Tout an respektan, egalite sa *stevedore* e byensir, en mo ki mon'n fer resorti - se fer sir ki sa lendistri i reste soutenab e relevan.

Mr Speaker, ser koleg, regilasyon pou en endividi ki travay zournalye ki nou koz, *casual labour*. E la mon pa pe dir, *casual labour stevedore*. Me *any*, nenport ki dimoun ki anvi travay *casual* Sesel.

Regilasyon i dir ki ordinerman en endividi i ganny peye R44.10 sou par erdtan, par zour. E an mwayenn pou 8 erdtan dan en zournen i pou kolekte li apepre R352.80 sou pou 8edrtan.

E si sa endividi in travay Lendi ziska Vandredi, an mwayenn i ava tous li apepre R1,764 a la fen lasemenn. Sepandan si sa endividi in travay Lendi, Vandredi pou 1 mwan, an mwayenn i pou anmenn kot lakour apepre R7mil 56.

Size ki devan nou bomaten se *stevedore*. *Stevedore* de lot kote zot osi, mazorite zot, zot travay a la baz zournalye. Baze lo serten

kondisyon. E sirkonstans travay zot sistenm moniter i en pti pe diferan, ase konpreansiv, parske zot dan en lanvironnman ase entans.

Kot apart sa erdtan travay, anba zot Lalwa ki loter Mosyon in koz lo la - taler mon pou fer en ti pe plis elaborasyon - zot annan serten lezot lazistaz ek kondisyon ki ganny mete. Tel koman zot tonaz letan zot pe fer debardaz. Ki swa lo bato lasomir. Ouswa lo bato, zot dir mwan bato pwason sek - *dry fish loading e unloading*. E sa i annan diferan tarif.

E dapre lenformasyon ki mwan mon annan baze lo sa *schedule* dan *S.I.* 2019, briyevman Mr Speaker - en *stevedore* ki pe fer *loading e unloading of dry frozen fish* depi Lendi ziska Vandredi ziske ant 8er oubyen 7er ziska 5er par zour, tonaz ki pe ganny sarze se R7 par tonn. E si i fer menm louvraz apre 5er, Lendi, Vandredi, i ankor ganny sarz R7 par tonn - an plis R100 par erdtan.

Si i pe fer menm travay, en zour Dimans. E konze piblik ziska 4er par zour, i ganny li R7 par tonn an plis ki R123 par zour. Si i pe fer menm travay apre 4er, en Dimans ouswa en konze piblik, i ganny li R7 par tonn an plis ki R123 par zour, anplis ki R100 par erdtan.

Aprè byensir i annan bann lezot. Taler mon'n koz lo pwason lasomir. Sa li son *rate* i en pti pe pli ba, i R3.75 sou par tonn.

Ankor enn fwa, si i pe travay apre 5er Lendi ziske Sanmdi, i annan apard sa R3.75sou i annan R100 ki ganny azoute par erdtan. Ankor si i pe fer menm travay, Sanmdi, Dimans e konze piblik apre 4er, par zour i R3.75 sou an plis ki R123 par zour.

E la ankor pou sa menm travay si i pe fer li apre 4er, pandan konze piblik e en Dimans, apart sa R3.75 sou par erdtan i ganny li R123 par zour an plis ki R100 par erdtan pou sa bann zour.

E Mr Speaker pou enn ki pe fer zis *loading e unloading* disel, i ganny li R2.40 sou par tonn par zour. E si i pe fer sa en Sanmdi oubyen en Dimans, pou konze piblik, an plis ki sa R2.40sou, i ganny li R123 par zour.

Savedir Mr Speaker, an mwayenn si en *stevedore* i konsistan dan 1 mwan, i pou pe prodwir li *minimum* R15,000 a R30,000 par mwan. Mr Speaker mon salye zefor e lavwa atraver sa Mosyon. E lavwa bann *stevedore* ki pandan bann lannen zot in rod tou mwayen pou amelyor zot kondisyon travay.

E sa in pouse, parey loter Mosyon in dir. In pouse pou anmenn en regilasyon spesifikman ki ankadre kondisyon Lanplwa bann *stevedore*. E la sa ki mon repete. Loter Mosyon in koz lo *S.I. 36 of 2018*, ki ti napa en *starting*, en *commencement date*. Ki apre in ganny *repeal*. E pli tar in ganny ranplase par *S.I. 55 of 2019*.

E la dan sa *S.I.* mon ti a kontan zis remet lanfaz ki i annan plizyer kondisyon ki'n ganny definir dan sa regilasyon. Sa regilasyon i kouver bann *stevedore* ki lo baz zournalye selman. E sa regilasyon i fer provizyon, premyerman pou etabli en Komite *Stevedore*. Ki pou determin tarif par tonaz baze lo bann aktivite ki bann *stevedore* i antretenir. Tout an largiman, agreman zot bann anplwayer, i fer provizyon pou peyman *tax* e zot pansyon.

An plis en *stevedore* i merit ganny en gratwite 4.5poursan. Baze lo zot peyman anyel. E loter Mosyon in osi koz lo en *retainer allowance* baze lo serten kondisyon. Ganny peye zot konpansasyon apre 7an servis e plizyer lezot kondisyon ankor.

E se dan sa loptik ki mon santi ki nou pe atraver sa Mosyon, nou pe ouver laport ki ava permet Gouvernman

ansanm avek lezot *partner* e lezot sekter, pou kontinyelman amelyor kondisyon bann *stevedore*. Pou ki vreman nou kit zot travay an valer. E nou fer sir. E avek sa mon osi ti a kontan anport serten kontribisyon konstriktiv adisyonnèl.

Mr Speaker, i annan plizyer dimoun ki'n travay pou plizyer lannen. E sa loter Mosyon in fer resorti, koman en *stevedore* - dan bann kondisyon ase entans. Mon pe propoze ki bann lakonpanyen prive - e la mon aprann ki i annan 3 lakonpanyen mazer - zot osi regard pou investi en pansyon prive kot bann *stevedore*. Zot ava pe kontribye pou letan zot ariv zot laz retret koman en *special scheme*, pou zot kontinyelman investi dan zot kouraz.

E sa byen sir an adisyon avek pansyon ki zot pe deza peye. Ki sa *retainer allowance* i ganny diskite. I ganny met azour baze lo en realite ozordi. Pou ki letan napa bato, parey in ganny dir, *stevedore* i ava *claim* sa *allowance*, byensir baze lo serten kondisyon ki'n ganny mete e etabli anba sa *S.I.* 2019.

En size ase sansib ki lot Mosyon osi in koz lo la, se lakantite dimoun - lakantite zenn ki bann *heroine dependent* oubyen *hard drug*

dependent ki pe travay dan sa sekter. E fodre pa ki nou met zot a lekar. E la mon pe propoze ki bann lakonpanyen i annan en serten program reabilitasyon mandatwar. Pou ki zot ganny swiv, ki vreman nou a kapab ed sa group pou viv, ouswa troun zot lavi dan en fason pozitiv prenan an kont ki mazorite zot, zot bann zenn.

Respektivman ki *welfare* bann *stevedore* ki lo *site*, kot zot travay i vin pli konvenab, malgre ki zot bann anplwayer ki pa permanan. Sa ki reste enportan se ki sa *S.I.* ti an 2019, e la nou 2022.

Mon pe fer rekomandasyon avek departman Lanplwa an kolaborasyon avek, mon aprann ki i annan bann *Union* ki reprezant bann *stevedores*. An kolaborasyon avek bann *Union* e lezot sekter, *partners*, pou zot fer en pti pe *awareness* konsernan sa *S.I.*

Al kot sa bann *stevedores*, eksplik zot ki bann benefis ki zot annan. Pou ki vreman tou dimoun i konnen egzaktaman kwa ki zot *entitled* e ki mannyer zot pou fer pou zot annan zot *claim*.

Pou terminen, mon anvi salye sa zenn parske bokou fwa, e mon'n dir souvandfwa dan sa Lasanble, nou penn zenn, nou dir zenn pa oule travay. E nou ki desann la Ile

du Port, nou vwar kantite zenn ki pe al lo por pou al travay, irespektiv ki zot sityasyon, irespektiv ki zot stati. Mon anvi salye zot. Mon salye zot parske sa group la, zot pe leve zot pe debourye. Zot pe kontribye anver lekonomi.

Me pli enportan mon anvi salye sa papa ki li pou 15an, 20an in travay koman en *stevedore*. In fer *savings*. In investi dan son *savings*. Ozordi son zanfan, e son pti zanfan pe benefisye. Mon anvi salye sa papa, Mr Speaker.

E mon swete pou bann ki fek rantre e bann ki la, ki pa pe vwar vremen zot lenvestisman kote pe ale, ki zot pran legzanp lo sa bann ki'n la pou plizyer lannen e pe kontinyelman annan, reste dinamik e annan en plan pou lavenir.

Mr Speaker, mon retourn lo mon pwen an komansman. Lendistri lapes i en lendistri ki annan bokou potansyel. Gradyelman nou war nou pe sorti lo sa bout tradisyannel. Nou pe bouz avek teknolozi. Nou pe koz bokou ozordi lo *blue economy*. E fodre ki dan tou desizyon ki nou fer, nou pran kont pou ki tou - e i annan soutenabilite dan bann desizyon ki nou fer e ki pei a en moman donner i asize e vwar, e annan en plan byen detaye pou lavenir.

Alors, atraver ou mon anvi dir avek Onorab Labrosse ki i kapab kont lo mwan pou siport sa Mosyon. Me mon osi pran li koman nou responsabilite, parske mon konnen i annan bokou distrik ki i annan bokou pa mal bann *stevedore* ki leve ki al travay.

Nou osi pran li nou responsabilite konman bann *l'homme de loi* pou atraver sa S.I. parfwa annan en pti konversasyon. En pti dyalog pou eksplik nou bann *stevedores* ki benefis ki i annan pou zot. Be pli enportan, ki kontribisyon e ki rekomandasyon zot annan pou vremen fer sa sekter bouz devan. Avek sa de pti mo Mr Speaker, mon a dir ou mersi.

MR SPEAKER

Mersi Onorab. Nou a pran en poz la e nou a rebran deba lo sa Mosyon 11.05. Mersi.

(BREAK)

MR SPEAKER

Byen nou a kontinyen ek deba. Mon remersye bann Manm ki'n koze avan pour reste strikteman lo size. E mon pe apel bann lezot Manm osi pou pour swiv sa legzanp. Bann Manm ki'n lev lanmen mon pou ankor zot 15minit. Deza bann Manm ki pe al lev lanmen apre, lo dernyen

moman pou limit zot pour 10minit.

HON PAUL ERNESTA

(Off-Mic)

MR SPEAKER

Pardon?

HON PAUL ERNESTA

(Off-Mic)

MR SPEAKER

A matter of privilege. Mon vwar ou annan en *matter of privilege* napa nanryen ki'n arive la an se moman. An se moman, *matter of privilege* i devret an relasyon avek en keksoz ki'n arive dan Lasanble.

E nanryen pa ankore arive. Selman pou sa voyaz, mon pou permet ou dir mwan ou *matter of privilege* direktman, vitman silvouple Onorab Ernesta.

HON PAUL ERNESTA

Mersi Mr Speaker. Mr Speaker wi i annan keksoz ki'n arive ek mwan bomaten, dan lentervansyon Onorab Henrie letan i ti pe koz lo Mosyon bomaten in dir, ki anfe i an diskisyon ansanm avek *Leader of Government Business regarding* pou zot revwar lafason PNQ pe vini, lo kote *Standing Orders*.

E mwan koman en Manm *Standing Orders*, ziska la mon pa ankore tann nanryen, mon ti

a kontan konnen ki pe arive dan sa Lasanble Mr Speaker.

MR SPEAKER

Stop! Stop-Stop-Stop! Stop! Si sa ou *matter of privilege*, mon krwar i pa valab, i annan toutafe rezon si le anvi dir sa. Mersi. Nou a kontinyen avek deba. E mersi bann Manm pou pa gat letan Lasanble avek *matter of privilege* ki pa zistifye.

Onorab Gabriel ou lentervansyon.

HON CONRAD GABRIEL

Mersi Mr Speaker. Mon dir bonzour Lasanble, bonzour tou bann dimoun a lekout. Mon a profite poudir de pti mo lo Mosyon ki devan nou;- anvi ki koman en distrik, ki annan en pe *stevedores* ki pe partisip dan devlopman nou pei. Mon ti a kontan pran loportinite, poudir de pti mon pou sey ankouraz zot. Aport mon soutyen, osi pou sa louvraz pou sa travay nob, ki zot pe fer.

Sa ki mon konpran se ki sa size in monte, dan Lasanble oparavan. E ziska la, mon kapab dir napa gran solisyon, oubyen mezir ki'n ganny pran pou met an plas, pou soutenir sa bann *stevedores*. So atraver Mr Speaker, letan COVID nou, nou ti asize kot nou e sa group dimoun ti form parti en group travayer tre esansyel, dan nou

pei. E sa la kot Gouvernman mon santi i devret, antre pou protez e ankouraz zot.

Fodre ki i annan *mechanism* an plas, pou protez sa group travayer, sa bann *stevedores*, e sa louvraz sa travayer dir ki zot pe fer pou ede dan devlopman nou sosyete. Nou bezwen met antet ki sa group travayer, sa bann *stevedores* zot travay i pa parey lezot travay. Loter Mosyon in sitye byen, i annan en gran difikilte ki atase ek li.

Zot rente, fizikman moralman e kondisyon travay, i konpleks. Nou bezwen pran kont ki zot a risk an mezir ki zot laz i monte, ek sa kalite lafreser ki zot soutenir, e mon krwar i enportan, pour nou pran kont sa sityasyon.

E i annan zot ki ize fizikman, parey mon'n dir. E laplipar letan kot napa bato oubyen zot napa en reveni, se sa madanm ki al rod en lasistans avek *ASP*. E avek tou sa problem ki atase, *ASP* ek tou sa difikilte ek tou sa konplikasyon ki annan konmela, pour zot ganny enn pti benefis i vin pli ale pli difisil pour zot.

So alors mon lans en lapel avek Gouvernman, pou met an plas en mezir pour soutenir sa bann *stevedores* ler zot napa en louvraz. Sa i primordyal. Mosyon i kler e fotespere ki loter Mosyon, i a

sivre sa Mosyon pour li konnen ki pase e pour kontinyelman met presyon lo Gouvernman, pour reazir pandan sa 2an ki mon'n la e mon asire oparavan i annan plizyer Mosyon ki'n vin dan sa Lasanble.

Sa ki mon mazine an partikilye en pe resan. I annan Mosyon Onorab Esparon, ki ti koz enn pti pe lo bann zafer, kanser. Mon panse i en lannen pase Oktob 2021 kot ti annan serten deba dan sa Lasanble, apropo kanser. E la mon'n tann Onorab Vidot, in met azour ki i annan en pe latizann ki pe manke lo nivo kanser - *cancer patient*.

Mon rapel osi Mosyon par Onorab Bastienne, en size *Juvenile Center* ki ti vreman enportan li osi, so mon ankor pe demande sa i ti petet en pe boner sa lannen - Mars. So sa i pe montre poudir ler nou anmenn Mosyon, nou pou bezwen ase serye, nou pa anmenn Mosyon zis pou le mo dir ki'n ou anmenn en Mosyon. Nou pou bezwen *ensure* ki i pase ek sa Mosyon. E mon swete ki sa i a pous Gouvernman, pou reazir o pli vit posibil, pou vreman soulaz sa group travayer vreman enportan ek zot kontribisyon esansyel pou lekonomi pei.

Mon pou gete mannyer deba i ale. E parey mon'n dir, mon annan en gran group

stevedores dan mon distrik. Mon ti a kontan bann lezot entervenans, i donn sizesyon pour nou kapab fer marse sa lendistri. Avek sa de mo Mr Speaker, mon a dir ou mersi.

MR SPEAKER

Mersi Onorab. Onorab Andy Labonte.

HON ANDY LABONTE

Mersi Mr Speaker. Bonzour Mr Speaker, bonzour tou Manm koleg Onorab e tou Manm zabitan Seselwa ki a lekout. Mr Speaker, mon pa pou long. Me solman permet mwan, pou premyerman felisit tou bann travayer ki travay dan sa sekter, swa debarder ou *stevedores* ki mannyer nou apel li, swa dan *container*, swa dan ton e lezot ankor.

Sa i en sekter kle pour nou lekonomi e nou pei an zeneral. Nou koman en Lasanble ki'n ganny elekte par lepep, nou bezwen siport tou travayer Seselwa e sa pep ki'n elekte nou. Vi ki sa Mosyon i lo *stevedores*, alors mon pour anvii reasir tou bann *stevedores* ki nou pou kontinyen siport zot sirtou nou lo sa kote latab. Mon osi anvii azoute ki sa Gouvernman LDS, i en Gouvernman ki serye, responsab e pa per pour pran bann desizyon ki brav e ki pa *populist*.

Alor sa Mosyon anmennen par mon koleg Onorab Richard Labrosse, sorti lo sa kote latab pe siport ou koman sa travayer ki travay dan en tel sekter, e pe demann Gouvernman, pou pli byen ankadre zot. Ou sa msye trwazyenm-az ki aze 63an e plis ki 40an ou lavi, ou'n desarz en tel responsabilite. Ou sa papa ki reste Quincy Vilaz e ozordi, ou fyer aköz ou fiy i en *graduate* Liniversite ede par sa saler *stevedores*. ou sa zenn sorti distrik La Riviere Anglaise ki vwar lavenir dan *stevedores*. E finalman, ou ki lo sibstans.

Me ou leve tou le granmaten al o bor baro, swa baro *Hunt Deltel*, swa baro *Land Marine*, swa baro *Seaward*, swa baro *IPHS*, pou fer sir ki ou pe pran ou responsabilite e kontinyen kontribye anver byennet ou lekor, ou fanmir e ou pei.

An sipor en tel Mosyon Mr Speaker, mon pou pe ede pour ki bann *stevedore* avek bann lakonpanyen ki zot travay avek, pou vin an dyalog avek kanmarad e sey konpran kanmarad e zwenn kanmarad lanmwatye semen.

Me Gouvernman, i bezwen vin koman sa fasiliter, pou drafte bann lenstriman legal ki ler bann *stevedores* napa louvraz dan zot sekter, loperasyon, zot

kapab ganny en reveni ki se zot menm ki'n kontribye koman bann *stevedores* e ki zot in met par kote pou letan dir. Parey Onorab Zialor in dir.

Mr Speaker la ki mon annan laparol, les mwan dir ou sa atraver en Seselwa ki konnen ki savedir leve granmaten e al dormi tar dan lannwit. Ou sa travayer ki pe kontinyen trimouse; ou sa travayer ki konnen ki savedir e skente ede dan devlopman ou pei; ou sa travayer ki pe ede transform sa pei Sesel; ou sa Seselwa ki pe travay dir e konnen ki savedir e meyer lavenir pour ou, ou zanfan e ou fanmir, ou pei, ou annan tou rezon pou ou selebre. Akoz se par travay dir ki ou pou fer sikse.

Mr Speaker nou osi bezwen sansibiliz nou pep, pour mazine pa tou lafet ki tonm Dimans. Alors pa si ozordi, ou koman en antreprenner ou biznes in fer byen, i vedir ki toulezour i pou parey. E ou pou fer en fortin alor ou pou bezwen diverti kontan.

Fodre ki nou vin en pep ki aprann fer sakrifis, e mazin pour demen. Nou konpran ki pour 43an se sa ki nou ti pe ganny enstrir pou fer, me ozordi nou dir non, mazin letan dir.

Mr Speaker parey mon'n dir mon pou pou long, me avek

sa de mo. Mon pou donn tou mon sipor sa Mosyon akoz mon ti a voudre ki sa sekter kle pour lekonomi e bann travayer i kontinyen pran nou responsabilite e nou Gouvernman nou la pou siport zot. Mersi Mr Speaker.

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Speaker. Bonzour tou Manm Onorab e tou dimoun ki a lekout. Mr Speaker Mosyon, ki devan nou pe diskite lo en size kot i konsern en group travayer, ki prezizeman pe travay dan sekter kot i annan bann debarkasyon, kot i konsern nou por.

E bokou lanfaz pe ganny mete lo kote, Sekter Lapes, me osi nou bezwen konsyan osi ki i annan lezot sekter kot i konsern kargo. Sirtou bann kargo par *containers* ki osi annan sa bann travayer, ki konsider koman *stevedoring*.

E Mr Speaker i pa fer premye fwa ki size *stevedores* in ganny diskite dan sa Lasanble. E kot osi pei in pas atraver enn de bann demann, bann *request* ki'n ganny met devan par bann *stevedores*. Kot i konsern zot kondisyon travay premyerman e osi kot i konsern dan bann letan ki *off peak* kot napa neseserman,

nou annan bokou bato ki pe fer *transshipment* dan nou pei.

E osi mon rekonnèt poudir, lefe ki *stevedores* i annan son lenportans. E son lenportans osi, in vin enn pti pe pli anplifye, baze akòz nou annan nou en Sekter Lapes.

Kot nou annan prezizeman sa pli gran *Tuna Factory Industry* sa i *IOT* ki Sesel ki fer ki bokou travayer *stevedores* i konsantre dan sa sekter kot i konsern bann transbordman nou bann pwason ki pou al ver leksportasyon pli tar, apre ki zot in ganny *process*.

E isi nou annan nou trwa lakonpanyen mazer ki pe *handle* ouswa ki pe bezwen servis sa bann zonn ki laplipar, ki nou pe konsider zot koman *stevedores*. E ladan nou annan *Hunt Deltel*, nou annan *Land Marine*, apre nou annan *IPHS, International Ship Handling Services*.

Lalwa ozordi baze lo *S.I* ki tre resan, *S.I* 55 2019 ki nou menm nou dan sa Lasanble, nou ti travay lo la. I ti pase, in met dan zot regilasyon serten eleman sipor pour *stevedores*, sirtou pou etabli lord kot i konsern bann peyman erdtan ki zot tonm anba la. E sa in en direksyon ki'n kapab donn enn pti pe la fey derout, kot i konsern *stevedores*. E letan mon'n regard dan sa *S.I*, baze lo latab ki ti ganny pibliye

ladan lo bann diferan sonm ki zot kapab pe ganny peye, san ki mon bezwen al mansyonn ki sa ki'n segonn Mosyon in fer resorti in pas lo la, mon santi poudir i annan serten mankman la ozordi, kot i konsern *stevedoring* avek zot bann reminerasyon ki atase avek.

Mon dir sa Mr Speaker, akòz sa travay ki *stevedores* i bezwen fer ozordi, i en travay ki pirman fizik, mon kapab dir. Malgre lendistri pe evolue, i annan bokou mekanizasyon ki'n ganny entegre dan lendistri ozordi. Me i pou touzour reste sa eleman kot ou pou bezwen sa bann *stevedores* pou fer serten travay fizik, sirtou kot i konsern sa Lendistri Lapes.

E bann travay parey i annan son *time period*, ki en dimoun i kapab kontinyen, ekspoz li avek travay parey. E pli laz i antre pli byensir, ou kapasite pour ou kapab egzers bann travay tre fizik, i pour diminyen. E se la kot lespri, dan bann diskisyon sirtou letan ti pe anmenn sa *S.I*, pour kapab etabli serten fon, ki kapab siport sa bann *stevedores* apre letan ki zot, zot in la pandan so *many years*, 10an, 15an, 20an ladan.

Ki ozordi i annan ki tonm dan sa kategori, kot zot kapab ganny en pti pe benefis an plis.

Letan zot nepli annan sa kouraz. I enn pti parey militer, kot ler ou'n travay ou'n donn servis ou Nasyon, ou pep, pour sa pei, ki apre ou kapab benefisye avek en serten kalite pansyon. E pour nou *stevedores* i bezwen ganny gete dan en fason, enn pti pe anliny avek sa.

Ki mannyer nou kapab ed bann *stevedores*, ki apre ki zot in osi, rann servis lanasyon sirtou atraver son Por, atraver bann lendistri enportan ki fer bokou larzan, ki zot kapab petet ganny enn pti reminerasyon apre.

E reminerasyon i bezwen vin avek osi serten kondisyon. E sa kondisyon se en kondisyon kontribisyon ki bezwen ganny fer. Ki swa i ava vin dan en form taksasyon, ouswa i ava vin en form parey en *Trust Fund* li menm dan en fason. Sa i bezwen ganny diskite, i bezwen ganny regarde.

E nou tou nou konnen poudir Mr Speaker ki san ki mon pe bezwen kree serten diskriminasyon, ouswa pe regard avek en lot kalite portre, nou tou nou konnen bokou bann travayer, ki dan *stevedoring* zot bezwen, bokou i vin travay pou ganny sa larzan ase vitman.

E i osi annan ki, kapab dan lezot lanplwa ki dir ou mwan mon pou al travay avek

sa tim apre ler, ouswa dan mon letan lib, mon ale parey ou dir mon al kas en zournen. E la zot ganny sa larzan. Me lamazorite ki mwan mon konnen, zot esper ganny kriye, pour zot al ver sa travay li menm zot.

E zot fer li en travay kot mon kapab dir i annan ki bezwen al de ou trwa fwa par semenn baze lo tim ki zot ladan, e baze lo lakantite bato osi ki la ozordi. So Mr Speaker, pwen esansyel pour mwan ladan se dan bann letan, kot napa travay, napa ase bato, napa ase aktivite dan por. Ki fer ki bokou i ganny bezwen pe vwar zot pe al rod serten zournen alternatif, dan en lezot sekter pour kapab kontinyen resevwar sa larzan ki zot ti pe gannyen.

E osi mon konstate poudir, i annan *stevedores* ki pran son larzan tou le mwan. I annan ki pran tou le semenn. E i annan ki pran son larzan, mon kapab dir kan i fini travay i le son larzan. Sa mon pa pe al dan sa bann detay. Sa i zot kondisyon. Me par kont Mr Speaker, parey mon pe dir letan napa aktivite pour sa bann *stevedores* ganny en reminerasyon, so ki zot fer?

Dan lepase nou konnen dan ladministrasyon avan, Gouvernman li menm, atraver nou sistenm proteksyon sosyal, *stevedores* ti kapab

ganny serten *incentives*, ouswa serten asistans pandan bann letan ki napa travay. Mon pa konnen si ozordi sa i ankor egziste, me selman ti annan fason fer ki ti ganny fer, pou sey soulaz zot akoz zot osi zot annan fanmir. E pour mwan Mr Speaker en pwen enportan ki mon anvi fer sorti, se bann diskisyon ki ti ganny arive dan le pase letan *stevedores* ti komans fer protestasyon. Baze lo zot kondisyon travay.

E mwan mon ti dan Sizyenm Lasanble e ti annan en Onorab Mr Speaker ki ozordi, atraver ou i en Minis. Minis Dezinyen, e se li kot i osi Minis Lendistri ki konsern Lapes. I bezwen annan en konversasyon ki li, i ti komans inisye akoz se li ki ti taye devan sak fwa ti annan en welele leve laba. Nou ti vwar li pe ale pou al lager pour sey defann sa bann *stevedores*. Mon pa konnen si sa letan ti pe fer li dan en manev politik, me selman nou ti vwar li.

Me la ozordi vi ki li ki annan sa portfolyo sa lendistri, mon krwar i pou pli byen plase osi pour onor sa demann ki Mosyon pe ganny met devan akoz li, zot ki dan gouvernans ozordi. Si nou ti senser *back then*, ozordi i annan sa pouvwar pour li kapab fer serten desizyon, e dan Lalwa li menm li menm -

dan *S.I.* i fer kler Minis i kapa osi anmenn serten regilasyon, ouswa anmenn serten lamannman kot i konsern sa *S.I.* pour ou kapab soulaz sa bann *stevedores* li menm.

E mwan mon ti a demann loter Mosyon osi pou konsider sa konversasyon dan sa laliny pour koz avek son Minis, e gete ki propozisyon ki annan devan baze lo Mosyon ki pe demande. E lo la Mr Speaker, nou ava konnen si i annan senserite dan demars ki ti pe ganny fer avek sa group *stevedores* ki fer en kantite travay pour nou.

E pour konklir Mr Speaker, Nou konsyan osi ki sa zenerasyon on ki pe travay koman *stevedores*. I pe pa neseserman en zenerasyon, ki tre zenn mon kapab dir dan en fason.

Nou bezwen osi ganny en konversasyon avek tou sa bann lakonpanyen, sirtou sa trwa lakonpanyen ki pe zer sa servis *stevedoring*, ki zot osi zot annan serten konsyan poudir mon biznes i enportan pour mwan kapab ganny reveni. Me osi mon travayer osi i annan en gran lenportans e atraver zot ki mon kapab kontinyen grandi mon biznes.

So in annan serten ise pouse dan lepase, ki'n arive lo bann diskisyon ki'n ganny met devan. E parfwa ou vwar serten *lobbying* par deryer ki

afekte osi serten eleman diskisyon ki'n ganny met devan, e keksoz pa'n neseserman, mars parey i sipoze ete.

So dan en fason responsab, dan en fason konsyan, nou merit met serten diferans akote e regard lavenir sa sekter ki enportan e Sesel i ganny regarde lo en o nivo sirtou kot i konsern lo *stevedoring*. E sa ki bokou bato sirtou dan Sekter Lapes i prefere vin *unload* zot bann *shipment* isi. Ki apre vize ver transportasyon, set akoz, en nivo efikasite, ki sa bann debarder ki sa bann *stevedoring* i egzerse.

E pour sa mwan mon felisit tou sa bann dimoun. Mon annan koleg, mon annan dalon, ki laba pour zot kontinyen sa bon travay. E osi mon demande ki sa bann demann ki pe ganny met devan i ava ganny akorde, e ki zot ava ganny en pli meyer fason sirtou ler ki napa bato, e osi ler ou pe kit sa servis, li menm. Menm si ou a resevwar a laz 63an, ou 65an ou pti pansyon, ouswa sekirite sosyal.

Be si in annan en fason fer dan en fon, ou ava osi zwir parey en *long service* ki ou'n donner, pour pei e ou osi ou ava benefisyè. Avek sa Mr Speaker mon poudir ou mersi.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun, Mr Speaker mon pran laparol bomaten koman Manm Elekte pou distrik Mont Buxton. E i en distrik ki annan pa mal bann dimoun ki travay avek lo por. E laba i annan diferan travay, ki sa bann dimoun i fer e zot pa zis bann *stevedores*. E mon ava zwenn bann koleg ki'n entervenir avan mwan, ki'n remersye travay ki sa bann partikilyerman zonn, i fer. Bann zonn Seselwa, e ki ankor enn fwa dan zot louvraz toulezour zot demontre poudir nou en Nasyon travayant, ki for e ki letan nou tonm dakor pour pran en responsabilite nou kapab fer li byen.

Zot asire ki Por Victoria i reste konpetitiv. Sa group dimoun i fer marse, i fer roule nou pti lekonomi, Sesel. Zot en bann travayer, ouswa en kategori travayer esansyel. E dan letan *COVID-19* zot in montre nou sirtou mannyer zot enportan, e akoz zot in kontinyelman annan aktivite ekonomik dan Por Victoria.

I osi korek ki serten entervenans in dir avan, ki a plizyer size sa bann zonn ki travay dan por in ganny diskite dan nou Lasanble. E

deryen fwa ki mon rapel sa ti ariv dan nou Lasanble Nasyonal sete an Zilyet 2017, en Mosyon anmennen par Jean-Francois Ferrari ki ti Manm Elekte pou distrik Mont Fleuri sa letan. E ki Lasanble inanim tou lede kote latab, ti tonm dakor ki wi i enportan ki Gouvernman ansanm avek bann akter dan sa lendistri, i zwenn kekpar. E amelyor kondisyon sa bann travayer.

E mon krwar se la kot *S.I. 55 2019* apre in vini. E ti annan en lot *S.I.* ki'n pase ankò sa lannen se sete *S.I. 25 of 2022*. Mon ava retourn enn pti pe lo sa Mosyon Lasanble Nasyonal pli tar Mr Speaker. Nou *Caucus* nou ti an preparasyon pour sa Mosyon al en vizit - anfet i ti nou lentansyon vizit tou le trwa lakonpanyen ki anploy sa bann dimoun.

Me malerezman kontrent letan i pa'n posib ki fer, ki nou'n ganny sans vizit zis kot *Hunt Deltel*, me kantmenm sa in donn nou loportinite, pour nou kapab konpran en pe realite sa sekter, an term pwennvi anplwayer e pwennvi anplwaye.

Parske ler nou ti laba, wi nou'n zwenn *Management*, nou'n vizit bann fasilite ki a dispozisyon bann travayer. Me i enportan mon fer dimoun konnen poudir a en moman, *Land Marine* ti dir ek nou," ale.

Nou bann *staff* pa pou avek zot, koumsa pour zot kapab koz avek sa bann travayer, san ki sa bann travayer ava dir, be wi bann *managers* ti la, ti pe ekoute ki nou ti pe dir. "

Mon bann koleg i a kapab demanti mwan si sa i korek. Zot in byensir laba akòz sekirite por, i annan bann landrwa ki demarke kot ou bezwen pase, zot donn ou tou bann *hard hat, vest* pour ou ganny remarke dan por. E nou'n koze. E mon'n zwenn bann dimoun ki dan mon distrik.

E mwan Mr Speaker sa ki mon anvi dir ozordi bomaten se ki - ou konnen dan lavi toultan i annan, i annan lespas pou amelyorasyon. Sa i kler akòz lavi i evolye, nou bezwen toultan kontinyen amelyore, pour ki kondisyon sak Seselwa, ki viv dan sa pei, i amelyore.

Me kondisyon pour sa anplwaye, ki li pe fer sa biznes pour ki i prospere, pour ki i kapab ganny ase reveni e investir de nouvo, dan son prop biznes ouswa *expend*. Me an menm tan sa travayer ki li i donn 100poursan, li osi i bezwen rekonnet.

Alor mwan letan mon regard sityasyon letan mon pe koze ozordi, le 2 Novanm mon satisfè poudir i annan, i annan en komansman - ouswa parey mon kontan dir mon vwar ver

i lanmwatye plen olye ki i lanmwatye vid. Akoz dayer get sa *S.I.* 55 2019. Sa *S.I.* i met en lankadremman, ki'n ankadre e donn en zoli komansman, sa sekter ki a mon avi i menm, al pli lwen ki serten sekter.

Par egzanp anba sa *S.I.* i permet en *stevedores* dizon, travay avek de lakonpanyen. I en keksoz ki pa egziste pou bann *public servant* par egzanp. Zot pa kapab de landrwa dan Gouvernman, akoz i dir ou, ou bezwen ganny en sel saler *from the Consolidated Fund*. Me en *stevedores* li i kapab travay.

Savedir si *Hunt Deltel*, ozordi napa louvraz i kapab al avek *Land Marine* e i anbelir sa ki i anmenn dan lakour. Sa *S.I.* in fer provizyon ki zot ganny en gratwite. E kekfwat i annan en letan zot ti panse krwar poudir, zis bann *constitutional appointees* ki ti pe get zot lekor. Be sa bann dimoun osi tou zot benefisyè avek en gratwite.

Pli enportan, sa *S.I.* i fer provizyon pou letablisman en Komite. Ki met tou bann *stakeholders* otour en latab an komansman par Gouvernman, reprezantan anplwaye, reprezantan Minister Lanplwa, bann Linyon Travayer, me osi bann anplwayer.

E sa *S.I.* i al osi lwen ki dir lakantite reprezantan

anplwaye ki annan, i ganny *match* par lakantite anplwayer. Savedir si ozordi i annan 3 *operators*, i annan 3 reprezantan ban *stevedores*. Me la kot nou bezwen alor nou, koman reprezantan Lepep Seselwa e sa bann dimoun i dan nou distrik, pour nou kontinyelman ankouraz zot pour zot organiz zot lekor. Organiz zot lekor pour ki zot kapab fer reprezantasyon ki demande non-selman dan Sesel, me dan lemond an 2022.

Akoz ou bezwen organize, ou bezwen konnen ki pe pase. Ler ou pe al otour sa latab ou bezwen byen prepare, akoz i annan bann boug malen ki pou al anpay ou, may ou zanbek. Donk ou bezwen swazir *the best amongst* zot, pou fer bon reprezantasyon.

En keksoz enportan osi dan sa *S.I.* Mr Speaker, nou vwar poudir, letan ki en lanons ti fer, an Me 2019 pour logmantasyon saler *minimum* par erdtan pran lefe le 1 Zanvye 2020, ki ti sorti R34.17sou pou mont R38.27sou, dan sa *S.I.* i fer provizyon, pou bann *stevedores* ganny *minimum wage* R40.30sou par lao *the normal*.

E ou vwar setadir menm ler nou rekonnet, ki ankor i bezwen ganny fer plis, me i annan en komansman ki nou

kapab travay avek. Si prezan nou get i annan en *S.I.* ki ti sorti, *S.I.* 34 1991, li dan sa *S.I.* i *exempt*, bann *stevedores* anba provizyon 6 ek 7. Sa ki fer li, normalman i dir ou en travayer i bezwen kapab travay selman 60erdan par mwan koman *overtime*. Ouswa pa plis ki 15erdan par semenn.

E i donn en leksepsyon. *Stevedores* i donn zot en loportinite tan ki fizikman, zot kapab soutenir, legzizans sa travay, i permet zot pour zot ganny ankor plis mwenz, pou anmenn dan lakour e soutenir zot fanmir.

E nou koman bann reprezantan, nou bezwen ankouraz sa bann dimoun pou sezi sa loportinite, pran swen avek zot lasante, vin pli disiplin e debourye. Debourye koman bann Seselwa ki fyer.

Mr Speaker letan nou kot *Land Marine*, nou'n koze, nou'n diskite, e zot in donn nou bann levidans, bann keksoz. Mon met la pour ki bann dimoun i a kapab vwar ki mon pa pe koz manti, ouswa mon pa pe siport Sekter Prive ou keksoz koumsa

So ladan nou vwar poudir bann fasilite ki bann travayer zot gannyen, zot saler ki zot gannyen, zot gratwite ki zot gannyen, en keksoz ki mon ti vwar en pe sirprann mwan

zot ganny *income tax refund*, sa bann dimoun ki travay lo por. Nou tou la anndan nou pa ganny *income tax refund* nou, nou gannyen? Ouswa i annan ki pe gannyen, mwan mon pa pe gannyen?

Personn pa leve lanmen, so mon pa pe gannyen. Zot gannyen zot, lala laprev, avek tou son bann latav ase *impressive* bann larzan ki zot resevwar. E mon pou donn zot en pe legzanp Mr Speaker an gro. I annan, mon'n dir zot taler pa zis *stevedores* ki travay lo por i annan diferan kategori traver. I annan sa ki zot apel bann *winchman*. Ler mon'n pas lo sa bann latav sif pli o ki mon vwar en dimoun gannyen par an i R408mil.

E setadir i pe anmenn dan lakour anviron mwayenn R34mil par mwan. E en bon, enn bann endividi ki mon'n vwar en mwan in ganny peye R57mil *plus*. *Fifty-seven thousand* ki bokou plis ki nou otour sa latav la anndan. I annan *stevedores*, *highest* ki mon'n vwar R297mil ouswa R24mil par mwan. *Signalman* ki travay *shore* - R253mil ouswa R21mil par mwan; *signalman on board*, R217mil ouswa R18mil par mwan.

E i annan en kategori travay ki apel, *lashing men*, zot, zot pli o ki mon'n vwar se R402mil ou si non R33mil par mwan. Aprezan sa louvraz in

enteres mwan. Mon ti anvi konnen egzakteman ki zot in fer, ki zot fer. Zot anmar bann *container*, bann zafer koumsa zot.

Be Sengapour Mr Speaker, sa bann dimoun ki fer sa louvraz an mwayenn zot ganny peye 2000-2500 Dolar Sengapouryen. *Now* baz lo sa sif ki mon'n donner letan en Seselwa i debourye, li i pe fer 3800 Dolar Sengapour. Sengapour 2000-2500 li isi i kapab fer ziska 3800. I pa mal. *Let's be fair*, i pa mal ditou.

So i annan lespas pou amelyore wi, me an menm tan nou annan en komansman ki nou kapab travay avek. Bonus zot ganny bonus, nou'n fek pe diskrit trezyenm mwan. E bonus pli ou debourye, pli ou gannyen. I sa filozofi ki nou lo sa kote latab, nou osi nou pe promouvwar la. nou pe dir avek bann servis ban travayer servis piblik, wi alokasyon Bidze ki nou, nou ti vot an faver e Lopozisyon ti vot kont son merit e kont son prensip, ou larzan i ladan 100poursan.

Solman nou lo sa kote latab nou pe ankouraz lefikasite prodiktivite, nou dir ou debourye menm pour ou ganny san poursan. Li Lopozisyon i dir non li kale, solman ganny 100poursan. Lala diferans fondamantal ki annan ant *LDS* avek *US*. Sa

bann dimoun laba nou dir zot debourye, plis ki mon vwar an 2019 zot ti fer R18mil bonous lafen lannen. An total lakonpanyen *Land Marine* ti pey R1.1milyon.

An 2021 Mr Speaker bannla in debourye menm, plis ki'n gannyen R25mil. Plis ki R900mil ti peye, ou pe anmenn dan lakour plis ki R25mil bonous lafen Desanm. I pa move - *let's be fair*, i pa mal ditou. Gratwite plis ki mon'n vwar in ganny peye, en endividi 2019, R19mil. Lannen pase, R14mil. Ler mon pe koz lo la, vwala kot nou, nou bezwen dir ek bann dimoun dan distrik ki nou zwenn organiz ou. Asire konn ou kondisyon, e asire ou konn tou ou bann peyman ki ou pe gannyen.

Dan *break* Mr Speaker, i annan en dimoun pe kontakte mwan. I dir ek mwan, i pa'n ganny gratwite. Mon pa pou mansyonn son non, i pa'n ganny gratwite lot, lot, lot. E i annan tan letan ki'n travayer. Mon dir "ou asire?" I dir mwan "wi." Mon konfirm son non e mon vwar son non i paret ladan.

E in ganny son gratwite an 2019. E in ganny son gratwite an 2021. Sa ki nou bezwen dir ek bann dimoun asire, ki ou konnen ki ou pe gannyen, kwa ki ou merit gannyen, e ki alor napa

malantandi;- napa mal lenformasyon, pti gin ou bokou, zis asire poudir ou konnen ki ou merit gannyen. E ki ou pa merit gannyen.

Annefe mon partaz sa avek zot Mr Speaker, ler nou ti sorti laba lo Por nou'n al laba an tout bonn fwa, pour nou kapab konpran realite sa lendistri, e pour nou travay avek bann Lotorite konsernen pou amelyor kondisyon nou bann frer e ser Seselwa, ki reste dan kominote avek nou, koman nou'n sot deor i annan endividi ki'n ensilte nou.

Nou'n vin la an bon fwa nou. Dan *carpark* kot *IDC* i debout anba en pye kalisdipap in zour nou. Nou'n bezwen dir les li nou pa pou reponn dan nou triko Lasanble, gro ble ek *badge* nou tou, nou'n anbarke sakenn al se li. Nou'n fer sa an tout bonn fwa nou.

Alor Mr Speaker ozordi parey mon'n dir mon mwan ver i lanmwatye plen, i annan bann defayans, lafason ki bann dimoun i ganny peye par egzanp, loter Mosyon in koz sa byen. Mwan mon ti ava kontan vwar ki zot larzan i ganny transfer labank, zot annan kont, zot fer sir ki zot *income tax* pe ganny peye. Zot Fon Pansyon pe ganny peye, zot kontribye volonterman, zot pran bann lasirans nesesser, aköz bokou zot, i gannyen sa mwayen ki kapab fer.

So nou kapab dir ok amelyor *a, b, c*. Me nou pa merit vwar zis defo poudir a zot mank travay, zot pa vin a ler, zot abiz drog. Aköz i annan bann bon eleman. E serten dan mon distrik ki mon vwar zot non ladan. E ki pe fer tre byen an term, zot reminerasyon finansyel. Alor mon ...

MR SPEAKER

15minit Onorab.

HON GERVAIS HENRIE

Mon fini lo la Mr Speaker. Nou merit ankouraz bann *stakeholders*, pou anpese ki sa travay i disparet dan Sesel. Anpese ki sityasyon, i degrade. Anpese ki performans zot biznes e repitasyon zot biznes i ganny afekte. E asire ki zot pran zot responsabilite pour amelyor sityasyon bann travayer. Me pli enportan bann travayer, pran zot responsabilite vizavi zot travay.

E mon ava fini avek sa sitasyon, Mr Speaker retire dan Lartik ki Nasyon ti ekrir apre deba ki mon dir Onorab Ferrari ti anmennen an Zilyet 2017. Nasyon ti ekrir ki Lasanble i diskit size *stevedores* plizyer repriz e swe Lasanble sete mon site, "fodre Gouvernman e bann lazans bato, zot osito posib trouv en fason pou amelyor kondisyon

travay, ek lapey sa bann dimoun, e fer ki sa profesyon i vin pli atiran pour ankouraz Seselwa fer en karyer, ladan.” Sa lapriyer i reste i ti leka yer, i ti le ka ozordi.

E se avek sa menm bi ki nou'n anmenn sa Mosyon pour demann Gouvernman ozordi, pou reget sa *S.I.* e asire ki sa lankadreman ki parey son lentansyon orizinal, i ganny mete an plas e i ganny servi dan e fason efektiv Mr Speaker. Mersi bokou.

MR SPEAKER

Mersi Onorab bann Manm ki pe al koze la, ki'n lev lanmen dan dezyenm *round*, mon ava akord zot 10minit. Onorab Cosgrow.

HON WALLACE COSGROW

Mersi Mr Speaker pou donn mwan loportinite poudir enn de pti mo lo sa Mosyon ki devan Lasanble ozordi. Bonzour dayer Mr Speaker. Bonzour tou manm piblik ki pe ekout nou ozordi.

Mr Speaker dan mon bann vire tournen partou, mon mars en kantite, e mon ganny sans zwenn parfwa avek bann dimoun, bann *stevedores* sirtou, ki mon pa'n neserman konn zot. Me selman zot konn mwan, zot konn mon natir travay. E souvandfwa zot dir mwan sef be dan Lasanble laba koz enn

pti pe lo *stevedores*, koz en pe lo nou bann sityasyon dan por.

So mon santi Mr Speaker, ki ozordi i en bon *timing* avek sa Mosyon, pour mwan kapab met devan enn de pwen an sa ki konsern bann *stevedores*. Akoz dan sa menm konversasyon parfwa zot dir ou poudir me ou konnen ti annan serten komansman, ti annan dimoun ti fer serten promes ek nou, me apre, apre ou pa tann nanryen. Sirtou lo kote Lasanble Nasyonal, apre ou pa tann nanryen.

So mon krwar ozordi i en loportinite pour mwan kapab met devan, enn de bann pti konsern, bann pwen ki sa bann dimoun i annan. Bokou bann Manm ki'n koze avan in koz enn pti pe lo natir, sa travay *stevedores* li menm. Ki swa ou dan *bulk* kargo, ouswa ki swa ou pe travay avek bann lakonpanyen lapes.

Louvraz *stevedores* i enn ki pa fasil. I enn ki fizikman demann bokou. I enn ki fizikman bezwen ki sa dimoun i annan sa abilite pour kapab deservi sa louvraz. Akoz ankor natir sa louvraz. E i pran en kantite lo zot. I pran en kantite lo zot lasante lo zot lafors, zot stamina. E nou bezwen aksepte sa nou bezwen rekonnet. E pa nou tou ki

kapab fer sa bann kalite travay.

Nou'n osi Mr Speaker, koz lo lenportans lendistri lapés e lendistri maritim an zeneral li menm. E petet souvandfwa nou pa met lanfaz ouswa nou pa donn valè sa de lendistri.

Me selman nou'n realize an 2020, ki mannyer lendistri lapés e lendistri maritim in soutenir nou pei, letan nou ti pe fer fas avek sityasyon COVID - pandemik COVID. E nou'n realize poudir par egzansp IOT i enn bann lakonpanyen ki ti agrandi son prodiksyon - son lavant, sirtou an repons avek sityasyon Lerop kot bokou son bann prodwi i ganny eksporte;- kot bokou bann Eropeen ti pe rod *cat foods*, dan lesans kot zot ti dan bann *lockdown* e *fresh food* pa ti neserman *available*

So demann pour ton sorti Sesel ti -ton dan bwat - mon pe dir sorti Sesel ti ogmante. IOT ti profite, pou kapab zwenn sa demann ki Sesel ki menm enternasyonalman ti pe demande. E nou por ti reste ouver e bokou nou bann kargo ti kapab vin atraver por. Apre ki bokou bann laliny aeryen par egzansp ti'n bezwen fermen. Akoz kargo i en - sirtou pou Sesel kargo i en *biproduct* - si mon kapab dir - *of* lendistri touris, lendistri

lavyasyon ki zot anmenn plizoumwen dimoun touris Sesel, e kargo i vin koman sa *supplement* pour zot *income*. So sa lendistri lapés, ek lendistri touris maritim pardon, in soutenir nou.

E san sa bann dimoun, san sa bann *stevedores*, san sa bann dimoun ki travay lo por, petet nou pa ti pou sitan dan byen parey nou'n kapab ete. Petet nou sityasyon ti pou bokou pli *worse*. E nou bezwen tir sapo e remersye sa bann dimoun ki fer sa kalite louvraz. In annan dan lepase parey mon'n dir bokou keksoz ki'n ganny fer, bokou keksoz in ganny koz lo la - sirtou dan Lasanble Nasyonal.

E nou bezwen fer resorti ti annan en Manm Onorab, ki ozordi Onorab Ferrari atraver ou Mr Speaker, ki'n souvandfwa koz bokou lo bann *stevedores* e fer serten reprezantasyon dan en sans bann *stevedores*. E i oporten ki ozordi Minis Ferrari, Onorab Ferrari i Minis pou Lapes.

Me dan bann konversasyon ki ou gannyen avek bann *stevedores* - serten bann *stevedores* - mon pa pe dir tou bann *stevedores*. Mon pe dir serten bann *stevedores* ki mwan mon zwenn mon koz avek - zot dir ozordi nou pa vwar Minis lo Por. Nou pa vwar Minis pe pous sa menm

azanda ki ti pou sey pouse, pandan letan ki i ti dan Lasanble Nasyonal.

E souvandfwa zot demann bann kestyon be eski sa bann azanda ti reel? Eski sa bann azanda ti sorti dan leker, ouswa ti zis bann *ploy* politik pour kapab *mileage* politik? Me solman toudmenm zot demann ou pou kontinyen koz lo zot sityasyon, koz lo zot lavansman zot travay, pour ki nou kapab amelyor zot sityasyon.

Ankor in ganny fer resorti ki travay, ki Gouvernman lepase in fer, e notaman nou'n koz lo de S.I. enn an 2018, e en S.I 55 an 2019, ki plizoumwen *set* enn pti pe kondisyon amelyor kondisyon travay bann *stevedores*.

E sa de, sa S.I. sirtou sa enn an 2019 S.I. 55, ler mon pe get li pou mwan in donn - a mon avi - en platform pour formaliz travay sa kategori group dimoun dan sa domenn. Plizoumwen formaliz enn pti pe zot enn pti pe dan en lankadremman, kot i annan en baz pou kapab fer, bokou plis travay ankor e pour fer sir ki nou valoriz sa travay.

Par egzanp Mr Speaker dan sa S.I. i koz lo bann keksoz par egzanp *health and safety*, ki vreman, vreman enportan pour sa louvraz. Tanzantan nou tann, en

aksidan lo por kot ou tann petet en dimoun in ganny aksidan grav. Oubyen i annan serten ka kot dimoun in menm perdi zot lavi.

I koz lo lenportans bann lakonpanyen lapes pour zot kapab asir *health and safety*, zot bann travayer. Bann *stevedores* sirtou. E fer sir ki zot a tou moman dan tou sekirite posibilite dan zot travay. E sa i enportan. Sa i enportan e nou pa kapab *stress* ase lo la. Sa S.I. osi i koz enn pti pe lo en *gross minimum wage per hour*. Saverdir i sekir sa bann *stevedores* lo *at least* en saler - pa saler, me solman en reminerasyon pour sa travay ki zot fer, ou mwen de la labaz ki zot pa bezwen vwar zot dezavantaze an term lapey.

In annan osi travay ki'n ganny fer par egzanp, par Gouvernman avan e Onorab Aglae in mansyonn sa taler - nou pa neserman konnen ozordi kote sa i *stand*. An vi ki ozordi kot Lazans Proteksyon Sosyal, tou keksoz in sanze e tou prosedir i diferan avek avan, menm si, bann benefis i ankor reste me prosedir i diferan avek avan.

E ki mannyer ou akse sa benefis, i konpletman preski dir konpletman diferan. So ti annan bann lasistans finansyel ki bann *stevedores* ti kapab *access*, letan ki ti napa bato. Akoz nou konnen

souvandfwa louvraz *dock work* parey nou dir, an Angle i annan serten *seasonality* ki vin avek;- sirtou par egzanp avek lapes.

E la plis ankor, letan ki'n annan en bann kota ki'n ganny mete sirtou lo lapes ton zonn, kot i annan bann bato ki ler zot in fini ganny zot kota, zot pe neserman, zot pe zis bezwen anmare.

E pa pe kapab lapes ankor. So sa bann dimoun, sa bann *stevedores* i dan en dezavantaz. Akoz zot pa pe kapab trouv louvraz dan Sekter Lapes, an vi ki annan serten kota, i annan serten regilasyon ki bann lakonpanyen i bezwen *abide to*. So ti annan serten lasistans. Be sa ki mwan mon'n ganny en konpran se sa bann lasistans nepli egziste, ouswa fason ki ou *access* sa bann lasistans, i preski dir enposib pour zot kapab ganny sa lasistans.

So ti annan sa bann zafer avan, me nou bezwen vwar ozordi ki mannyer nou kapab ed sa bann dimoun. Menm si Onorab ki'n koze avan mwan, in koz lo bann sonm larzan ki bann *stevedores* i gannyen. Me i annan letan kot sa larzan pa pe antre parey Onorab in fer sorti dan son ekspeze.

I enpotan Mr Speaker osi pour nou, letan nou pe koz lo la nou met dan deba osi sa

zafer, pansyon en? Pansyon pour bann *stevedores*. Akoz ozordi pansyon i laz retret i 63an pour tou dimoun. Sa mon pe koz pansyon sekirite anba Lalwa Sekirite Sosyal. E posibilite anba Lalwa Pansyon pour *retire at 60 early retirement*.

Me nou konnen, e nou tou nou'n admet la bomaten, nou tou nou'n admet ki poudir sa louvraz travay *dock work*, i enn ki fizikman demann bokou lo sa bann dimoun ki pe travay lo por. E i afekte zot fizik, i afekte zot abilite, pour fer sa travay pandan en long letan.

Alors i enportan ki ler nou pe mazin par egzanp pansyon an relasyon avek bann travay koumsa, ki nou osi nou annan serten responsabilite, nou sansib anver sa travay e nou sansib anver sa bann dimoun ki pe desarz sa bann travay, e nou vwar fason, mekanizm pour nou petet revwar zot laz pansyon.

Akoz nou konnen bokou dimoun, petet i ou kontinyen anvi al fer sa louvraz, me petet lakonpanyen pa pou pran li, akoz i nepli annan sa prodiktivite parey ler i ti annan 30, 40 menm 50an.

Sa prodiktivite nepli la, e i fer li difisil pour li ganny sa kalite reminerasyon ki ti pe gannyen pandan son bann

zenn tan. So petet nou bezwen revwar, laz pansyon pour sa bann dimoun. I enn pti kategori dimoun. I pa en gran kantite dimoun i enn pti kategori dimoun, ki dedye zot lekòr pour sa kalite travay, travay ki pa nou tou ki pour le fer Mr Speaker, nou bezwen admet.

Si nou, nou swazir sa travay ki annan son presyon, me solman ki pa neserman fizi koman met en to lo nou lasante. Sa i nou swa, me zot in swazir laba e nou bezwen kapab rekonnèt. E zot fer en louvraz, vremen, vremen enportan pour pei. Alors ler nou koz pansyon a laz ...

MR SPEAKER

10 Minis Onorab.

HON WALLACE COSGROW

... wi Mr Speaker, mon pe al fini la. Ler nou pe koz pansyon 65an, annou kapab annan serten sansibilite anver sa bann dimoun. E Mr Speaker osi letan nou pe koz lo, lo bann benefis pour sa bann dimoun. Mon konnen, mon'n lir detrwa benefis ki zot gannye.

Onorab Labonte ki'n koz avan mwan, in fer referans lo en Lasanble elekte par lepep, pour tou travayer, pou sipòrt travayer. E la mon anvì ki nou koman en Lasanble nou konfirman e nou sipòrt travayer dan tou sans, dan tou

loportinite ki nou gannye, pou sipòrt travayer.

Par egzanzp trezyenm mwan saler, annou sipòrt, annou sipòrte, mon konnen zot ganny en gratwite. Be annou sipòrte ki zot osi ganny en trezyenm mwan saler san kondisyon. *Ok* akòz nou konpran nivo travay ki zot fer. Annou sipòrte, par kont Onorab Labonte i pa ti sipòrte pour trezyenm mwan saler.

So Mr Speaker ...

(Interruption)

HON WALLACE COSGROW

... Mr Speaker, i enportan ki nou sitye sa bann zafer ...

(Interruption)

MR SPEAKER

Order!

HON WALLACE COSGROW

Onorab!

(Interruption)

MR SPEAKER

Order!

HON WALLACE COSGROW

Onorab Sekreter Zeneral ...

MR SPEAKER

Onorab ou a konklir *please*.

HON WALLACE COSGROW

Wi mon pe konklir Mr Speaker. Mr Speaker an zeneral mon krwar nou tou nou an vi vwar en meyer kondisyon, en meyer benefis pour nou bann *stevedores* ki fer sa travay. E mon krwar nou koman en Lasanble, nou bezwen kapab debat lo la. Nou bezwen kapab aksepte pwennvi lezot kanmarad.

E zot pou annan zot loportinite pou fer zot pwennvi. Me mon krwar nou devret kapab travay pou anmenn sa ki nou anvi vwar dan sekter *dock work* Sesel, e sirtou pour nou bann travayer *stevedores*. Mersi bokou Mr Speaker.

MR SPEAKER

Mersi. Bann Manm ...

(Off-Mic)

MR SPEAKER

Onorab Labonte mon krwar i napa nanryen pour ou reponn lo la. In fer en remark, les pase. Mon le dir ek bann Manm ki mon aplik lareg letan pour mwan ankouraz zot pou lev zot lanmen, pour mwan konnen ki kantite dimoun mon annan pour koze. Alor mon pou kontinyen aplik li.

Me mon krwar mon a obzerv privez le de *Leaders* ankor enn fwa. E mon a pas se de Manm ki reste mwan - Onorab Loze premye.

HON JOHAN LOZE

Mersi Mr Speaker. Mr Speaker mon'n ekout byen ki mannyer Mosyon ti ganny prezante. E la mon bezwen dir ki mon bezwen remerci e felisit Onorab Labrosse pour lafason, ki li in prezant son Mosyon. I pa'n fer okenn politik, i pa'n trenn Mosyon dan okenn direksyon tord, in vin avek bann fe e in etal keksoz parey ti devret ganny etale dan sa Mosyon.

Mon pa sirprann *however* si li ki'n pran sa linsiyativ sorti la dan sa distrik, kot i sorti. Nou tou nou pe koz lo Onorab Ferrari be *i will be remiss* si mon pa *acknowledge* ki enn bann Manm ki'n pli anmenn sa konba, pour *stevedores* se Onorab Fideria, dan Senkyenm Lasanble.

E Onorab Fideria li i ti sorti Les Mamelles, e letan mon'n nonm Onorab Fideria bezwen osi note ki Onorab Georges osi in koz bokou lo bann *stevedores* dan lepase, e sa in swiv par Onorab Ferrari, ki li in sorti Mont Fleuri e la ozordi nou vwar Onorab Manm Elekte pour distrik Plaisance.

Mon pran sa aköz sa bann distrik la i *catchment area* kot i annan pli gran konsantrasyon bann doker. Sa *zone* santral la sirtou pe al lo

kote les, me egalman La Riviere Anglaise, Saint Louis, Mont Buxton, Bel Air, zot furni osi en bon pe doker pou fer sa bann travay.

So mon ti le komans, enn par rekonnèt e remerci Onorab Fideria pour sa bon travay ki in fer dan lepase. Dezyenm, remerci bann doker zot menm, pour sa bon travay ki zot fer e rekonnèt sakrifis, ki zot fer. In ganny dir ki i pa en travay fasil. Zot pas bokou letan lwen avek fanmir. Defwa i en travay souvan granmaten. Souvan ou desann ou prezante, ou pa ganny nanryen.

Letan nou konte konbyen zot fer par mwan be nou egalman bezwen kalkile, ki i annan zour zot vini zot pa tous en sou, akòz napa travay. Be zot en bann dimoun brav, ki pare pou al fer fas avek en nivo travay ki bokou nou, nou pa ti pou zanmen kapab, menm mazine pou fer. So alors zot bezwen sa rekonesans.

Mr Speaker mon anvi osi note ki nou'n koz bokou lo bann *S.I.* ki'n pase dan lepase. E nou'n koz lo Mosyon anmennen par Onorab Manm Sizyenm Lasanble ki ozordi i Minis pour Lapes par kont. Me nou bezwen note ki Mosyon ti pas, lo en baz bipartisan. Tou lede kote latab ti koz an faver, tou lede kote latab ti siporte, e tou lede kote latab in annan

doker aker dan bann demars pou anmenn zot sa ki meyer. Sa in en keksoz.

E sa nou bezwen, rekonnèt ki in arive, be in arive a zis en serten zistans, parske letan doker ti pe proteste;- ler doker ti'n ralye laba lo por, letan keksoz ti'n so. Non *the proof is in the pudding* en? Onorab Ferrari ti ale ti kit zot laba lo por li, i ti kit zot avek Fideria! I ti taye li! I ti kit doker trankil laba zot tousel.

E doker zot annan bokou poudir lo sa zot, mon pa pou repete tou sa ki zot annan poudir. Be selman sa i en fe. So Onorab Ferrari anmenn Mosyon, e ozordi Onorab Ferrari i Minis Ferrari. Lekspektasyon bann doker se ki sa Minis ki'n ganny en kantite aklamasyon, i ankor pe ganny aklamasyon la anndan la ozordi, in ganny en kantite sipor, avek bann doker. Zot swe se ki i pou egzekit lo bann swe. Akòz i dan Egzekitiv la ozordi.

Bann doker ti ekspekte ki Minis Ferrari letan i pran lofis i pour met an egzekisyon bann promes ki li menm li i ti'n fer avek zot. E se sa la kot problem per komans leve. Zot pa pe trouv sa arive. E si zot in vini, ankor avek en Mosyon, diferan sizesyon, mon pe prezimen ki zot santi zot osi ki annan serten difikilte, e i

annan size ki bezwen ganny adrese.

E enn bann propozisyon ki mon'n tande, bomaten k i nou responsabilite doker par kree en veikil kot zot fer kontribisyon zot menm, zot ferserten peyman pour ki zot ava benefisye a lonterm letan i annan difikilte. Wi sa mon pou siport. Mon napa nanryen kont sa. Mon pou siporte aköz mon krwar ki, nou bezwen annan travayer ki travay dir, e travay dir ki travayer ki travay dir i bezwen ganny responsabilize pou fer son kontribisyon.

A la menm lenstans, si sa travayer li i santi ki son benefis, i pa *on par* avek son kouraz, i pa *on par* avek son lasyer, sa osi i bezwen ganny aranze. E mwan i mon lopinyon personnel ki nou pa pe kapab vini, vin fors responsabiliz san ki nou adres bann *underlying issues* ki ankor la.

E mon pou siporte ki mon responsabiliz zot. Mon pou siporte ki zot fer e n kontribisyon - wi. Be si li i deza santi ki son kouraz, ki i pe mete i *undervalued*. Nou bezwen koz en pe pou valer sa erdtan ki i vann an retour pour *x amount of money*. Valer sa lasyer ki li i investir an retour pour *x amount of money*. E si li i pe santi ki sa lasyer ki i pe mete, i pa vo sa larzan ki i pe

gannyen, eski nou vini ankor nou dir be dan sa ki ou pe gannyen ki ou santi par ase la, tir en bout fer kontribisyon responsabiliz ou lekor?

Be Gouvernman li i pa responsabiliz son lekor li? Sa bann lakonpanyen ki dan sa biznes la, sa bann amater bato zot pa responsabiliz zot lekor zot? Mon krwar i bezwen en konversasyon kot tou dimoun nou *go back to* formil orizinal ki ti ganny mete, letan ki Onorab Ferrari ti anmenn son Mosyon, e nou fer konversasyon, avek tou dimoun konsernen. Annou nou tou responsabiliz nou lekor en pe!

Mwan mon komans fatige tande sa bann konversasyon kot tou lazournen, nou pe dir Seselwa fodre responsab, Seselwa fodre isi, fodre laba! Be annou nou tou responsab! Pa kapab zis en pe responsab, nou tou nou a vin responsab. E dan ka doker, doker i ava responsab. Minis ki'n fer promes i a responsab son bann promes ki'n fer ek doker.

E bann lakonpanyen zot, zot a responsab dan lafason ki zot anmenn bann sityasyon. Aköz mon krwar nou tou, nou annan doker aker. Resaman Komite IAC ti *meet* avek delegasyon Linyon Eropéen ki ti la. E dan en *closed door session* mon ti lev,

size bann *marin pêcheur* avek delegasyon Linyon Eropéen. Mon bann koleg ki ti la dan miting i ava kapab konfirm sa.

Be sa nou pa fer pou okenn gen. Nou fer li senpleman akoz nou anvi bouz sa bann dosye devan. Nou anvi lager pour sa bann travayer ki pe travay pour nou pei. E en kantite sa bann *ex marin pêcheur*, la ki mon pe koz lo la. Zot ozordi zot lo por koman doker zot osi. So i dan nou lentere pour avans zot sityasyon pli devan.

Be kot mon en pe konfize mwan, nou'n anmenn Mosyon, pour nou defann lentere doker. Be apre mon tande ki doker zot byen. Zot pe ganny 37mil, zot pe ganny Dolar Sengapour, zot pe ganny plis ki Dolar Sengapour. Be mon kekyon lentere lekel egzaktaman ki nou pe defann la? Ki nou anvi fer avek Mosyon? Eski i annan keksoz, ki nou bezwen fer, pour sa kategori travayer ki nou tou nou rekonnèt, i bann for travayer dan nou sosyete?

Eski i annan keksoz ki nou bezwen fer pour zot, wi ou non? Eski zot *ok*, wi ou non? Akoz i paret mwan ozordi, nou vin avek en Mosyon pour swadizan defann lentere en kategori travayer. Be i en pe souzantandi ki nou pe defann lentere Minis avek bann gro lakonpanyen, e nou

zantiman pe dir travayer i *ok* li i ganny plis k i Sengapour.

Be Sengapour kou lavi, i parey Sesel li? I annan bann keksoz ki nou, nou bezwen gete e realize ki nou pa kapab zis fer sa bann keksoz koumsa vin avek sa bann fason. Si nou anvi defann travayer, nou defann travayer. Nou vin devan nou koz for, dan faver travayer.

Nou pa kapab vini komans koz an faver travayer, apre dan milye semen, nou vire nou dir ek sa travayer ou konnen, ou *ok* ou. Ou pe ganny Dolar Sengapour. Konmsi i napa en lakoz li. Be pourtan letan zot ti dan Lopoziyon i ti annan en lakoz. E zot ti le milit pour son lakoz. E nou tou nou ti agree poudir i ti annan en lakoz annou milit pour son lakoz.

Be ozordi letan zot asiz dan sez Minis, zot dir li i *ok*. I pe byenfer i pe byen gannyen. I ganny Dolar Sengapour. Selman li ki desann dan kiv *ammonia*. Nou pa desann dan kiv *ammonia* nou, li ki desann dan sa gro lafreser! Li ki ganny tape avek ton dan latet, pa nou! Li ki ganny koup lanmen dan masin. Perdi ledwa, perdi lanmen. I annan i perdi ziske kot koud.

MR SPEAKER

10 minit Onorab.

HON JOHAN LOZE

Wi Mr Speaker. So letan nou met zot bann kondisyon byen, devan nou. E nou asize nou nonm bann sif. Mon konnen nou kree serten keksoz dan sosyete la. I annan dimoun deor pe komans dir *ah*, be zot ganny R37mil, be zot ganny R37mil kondisyon sa travay ki zot pe fer.

E nou bezwen rekonnet e apresye, sa. Alors tou kart tale lo latab si nou pou ed sa bann dimoun, nou ed sa bann dimoun, si nou pou koz dan zot faver, nou koz dan zot faver. E nou pa vin koz dan faver Minis! Mersi Mr Speaker.

MR SPEAKER

Mersi Onorab William.

HON WAVEN WILLIAM

Mersi Mr Speaker. Mr Speaker mon pa pou long lo sa Mosyon. Lo sa Mosyon ki pe dir ki Lasanble i demann Gouvernman pou met an plas, ansanm avek Sekter Prive, bann mezir apropiye pour soutenir *stevedore* ler zot napa louvraz dan zot sekter loperasyon.

Mr Speaker parey in ganny dir sa Mosyon i annan sa merit ozordi, e i en size ki in ganny trete dan lepase. E mon santi ki i byen parey i arive mondyalman dan tou bann konferans, i annan bann serten konversasyon, ki

kontinyelman kontinyen. Akoz i annan nesosite pour nou kontinyelman koz lo la.

Mr Speaker mon premye pwen se ki i annan sa Mosyon, i annan lenportans e sa diskisyon i bezwen kontinyen, kontinyen anba sirkonstans an relasyon avek devlopman lekonomi ki pei pe pas atraver. E an menm tan letan nou mazin, sityasyon koud lavi, e an menm tan lenflasyon kot i annan lefe direk lo reminerasyon.

Mr Speaker i enportan parey mon dir, ki diskisyon i kontinyen. Me diskisyon Mr Speaker, i bezwen ganny fer dan en fason pridan - dan en fason saz. E an menm tan ki pa dan en fason ostil, kot bann diferan parti, pe regard kanmarad avek bann diferan kalite lemosyon. Me ganny fer dan en fason ki enn a lafen dizour, nou sorti avek bann diskisyon e deba e bann rezilta ki soutenab.

Mr Speaker mon dezyenm pwen se ki, nou bezwen sezi sa loportinite osi Mr Speaker. I annan en group *stevedores* ki petet ozordi nou'n kapab oubliy zot, ki pe depi *ULC*, ti frenmen zot al travay avek *Hunt Deltel*, an menm tan avek *Land Marine*. Mr Speaker ki ozordi zot osi, pour sa long letan servis, zot in donner zot in donn pei. Me zot pa'n ganny serten benefis.

E i annan koze ki *why not* dan sa diskisyon, ki nou pe antam, nou elarzi sa diskisyon pou kouver osi, en deba lo *ex gratia* konpansasyon pour sa bann group *stevedores* ki'n donn zot letan, ki ozordi Mr Speaker, zot pa pe dan sa servis me zot lot landrwa. Me i annan sa nesesite aköz, zot in donn zot letan.

Mr Speaker mon krwar ozordi osi i enportan ki dan sa laspe edik nou bann dimoun ki nou bezwen osi konsider nouvo devlopman por. Ki fason – ki - ki kondisyon ki sirkonstans lanvironnman ki nou bann *stevedores* pou ladan. Nou bezwen pe komans osi mazine ki bann *training* e ki bann fason fer ki sa bann dimoun pour bezwen osi komans kalkile, eski zot konportman ozordi avek nouvo devlopman ki pe arive, i pou annan sa nesesite pour nou revwar enn pti pe nou fason fer, e nou fason travay Mr Speaker. Alors i annan plas dan kad sa Mosyon, pour nou elarzi sa Mosyon.

Mr Speaker avek sa de pti mo mon a demande ki enn;- tou bann parti prenan - tou bann parti prenan zot fer zot mye pour zot kapab, enn;- annan en pli bon diskisyon, en diskisyon serye e focalize, pou fer sir ki a lafen dizour nou sorti avek rezilta ki tou parti prenan i satisfezan. Mersi Mr

Speaker, mon pou donn mon sipor sa Mosyon. Mersi.

MR SPEAKER

Mersi Onorab. Mon krwar si mon persiste la, i mon riske ariv ziske apre 1er. Alor nou a pran poz la e nou rebran 2er apre midi.

(BREAK)

MR SPEAKER

Bonn apre midi tou dimoun. Nou a terminen avek Onorab Pillay. Onorab Georges. Onorab Pillay 10 minit.

HON SEBASTIEN PILLAY

Mersi Mr Speaker e bonn apre midi. Bonn apre midi tou dimoun ki a lekout e bonn apre midi tou koleg Onorab ki la anndan prezan avek nou. E bonn apre midi tou dimoun ki pe swiv, oubyen pe ekout Lasanble kot zot oubyen lot landrwa.

Mr Speaker devan nou, nou annan en Mosyon ki'n anmenn avek li serten deba e serten largiman, lo tou lede kote latab. Me sa i pa nouvo dan Lasanble Nasyonal Sesel. I pa nouvo Mr Speaker aköz i pa premye fwa parey bann Manm in dir ki en tel size i ganny trete.

Si nou retourn an 1997, Christopher Gill sa letan ti en Manm Lasanble, ti demann en

kestyon an relasyon avek bann *stevedores* ler zot pa pe travay dan bann mwan, oubyen de mwan kot zot pa pe travay. Akoz ti annan de sezon, en *peak season* avek en *low season*.

E Lasanble ti ankor enn fwa, *entame* plizyer kestyon lo la. E si nou a note an 1997, ti zis apepre 3an apre ki *ULC*, (*Union Large Range Company*) sa letan ki ti pe fer sa louvraz. Kot ti anploy bann *stevedores* e bann doker.

E bokou ti ganny koni koman bann *longshoreman* osi sa letan, ti'n ganny privatize pour li vin *Land Marine*. Nou swiv sa apre an 2002, kot i annan en Mosyon anmennen par Onorab Georges ki ti pe koz, lo en lasirans pour bann doker *stevedores*.

Kontrerman avek kestyon Onorab Gill, Mosyon Onorab Georges ti anmenn avek li, en kantite alterkasyon ant bann Manm Lasanble, lo definisyon doker *stevedores*, bann ki *casually employed*, bann ki ti *fully employed* sa letan.

E ti annan tout en deba lo lekel ki sipoze asir sa *Scheme Lasirans*, *whether* i *SACOS* oubyen *Harry Savy*. E pwen politik byensir ti ganny fer, kot bann Manm lo kote Gouvernman ti ganny demande pou demann *Harry Savy* ki swa dizan zot dalon

pou fer, met an plas en *Scheme Lasirans*.

Swivan 2002 an 2006, Onorab Patrick Herminie ti anmenn en lot Mosyon. E li son Mosyon, i pli pertinan pour nou deba akoz son Mosyon i *almost* egzakteman, sa ki Onorab Labrosse pe anmennen. Son Mosyon ki Onorab Herminie ti anmennen, i ti demande ki sa Lasanble i demande, ki bann anplwayer konsernen i antre imedyatman an negosyasyon ek bann *stevedores*, ou bann doker parey nou konn zot an Kreol - avek bi ogmant zot peyman pou sorti R2 pou vin R3 par tonaz.

E swivan sa, in annan ankor plizyer deba. Me sa ki enteresan avek sa enn Mosyon, sa enn Mosyon ti ganny segonde par Onorab Ramkalawan. E apre ki i ti'n segonn sa Mosyon, Onorab Ramkalawan ti le anmenn en lamannman pour sanz sibstans sa Mosyon - pour bann ki rapel byen.

E apre sa ti detourn dan en divizyon, oubyen alterkasyon - ki petet Onorab Henrie atraver Mr Speaker, pa'n ganny sans mansyonnen bomaten dan son resers - kot deba dan plas koz lo sa Mosyon, bann Manm Lopoziyon sa letan - ki ti *SNP* - ti prefere koz lo lezot size apard ki sa Mosyon.

E ti kler ki poudir zot lentansyon, sete pou sey sabotaz sa Mosyon aköz se Gouvernman ki ti'n anmenn li sa letan. Nou kit 2002 nou vin 2014, e an 2014 ti annan en kestyon tre pertinan anmennen par Onorab Emmanuel Fideria. E Onorab Fideria i en dimoun ki souvandfwa dan lafason ki in anmenn son bann kestyon, in anmenn li dan en fason konkret devan Lasanble, zisteman pour kapab anmenn en solisyon pour bann doker ouswa *stevedores*, parey nou konn zot.

E sa ki enportan, se ki kontrerman avek parey serten dimoun in fer, serten Onorab in fer dan deba bomaten, annou pa sitye sa largiman zis lo sa size tonaz an sa ki konsern pwason. Aköz sa travay i *involve* osi deba tir bann marsandiz, bann koli dan bann *container*. E i enportan pour nou konpran, rol en lenportans sa group dimoun pour nou lekonomi.

Pli tar an 2017 ti annan en Mosyon par Onorab Ferrari ki ti vin devan Lasanble. Nou ava mazine ki Onorab Ferrari ti premyerman, *postpone* deba lo son Mosyon. Apre ti annan en kantite presyon e i ti repran deba lo sa Mosyon. E la sas Mosyon ti ganny aprouve inanimman.

Me kontrerman avek de repriz, kot *United Seychelles* safwasi an 2017, e parti Lepep avan. Tou lede fwa Parti Lepep in siport san al dan okenn demagozi bann Mosyon ki'n anmenn, sanz konteks reminerasyon pour ed bann *stevedores*.

Mon'n penn sa portre Mr Speaker, pou montre nou ki mannyer istorikman Lasanble Nasyonal in konsider tou sa bann keksoz. Prezan ler mon vin lo deba lo sa Mosyon, mon soke par serten keksoz ki mon'n tande, mon'n tande bomaten.

Aköz mon krwar ki *Caucus LDS* dan Lasanble, i bezwen *align* son lekor, lo kwa egzaktaman ki zot pe demande atraver sa Mosyon. Nou, nou konpran ki zot pe demande, me i paret ki serten antre zot pa konpran ki zot Mosyon menm pe demande.

Ler mon ekout atraver ou Mr Speaker Onorab Gervais Henrie, mon'n soke pou vwar ki Onorab Henrie in pran en pozisyon pour li defann lentera bann konpanyen ki anploy bann *stevedores* e bann doker. Aköz atraver ekspoze ki Onorab in fer, in montre nou ki mannyer bann *stevedores*, i ganny sitan byen peye. Ki fer mwan demann mon lekor *then*, akfer - si *LDS* i santi poudir bann *stevedores* i

ganny byen peye zot anmenn sa Mosyon?

Me larealite la deor i se ki sa bann dimoun pa gannyen byen peye parey Onorab Henrie pe fer nou krwar. Zot kondisyon i pa sitan bon, parey Onorab i le fer nou krwar. E se sa mon krwar lesansyel ki nou bezwen tire dan sa Mosyon. Akoz ki bann *stevedores* e Manm piblik la deor i bezwen realize, ki annan en diferans ant en parti politik, ki koz lo en size e apre pran aksyon pour aranz li. Me avek en lot parti politik ki koz lo en size, me pa fer nanryen pou aranz li.

E mon pou ilistre sa dan sa fason Mr Speaker. Ler nou koz lo sa *S.I.* ki ti vini an 2019, annou regard istorikman ki ti arive. Le 20 Novanm 2019, Prezidan Faure sa letan apre ki ti'n annan plizyer deba e sa Mosyon ki ti'n pase, Prezidan Faure ti zwenn avek bann reprezantan *stevedores*, dan en miting *State House*.

E sa miting ti en miting ki ti en *follow up*, lo en miting ki bann miting avek bann reprezantan *stevedore* son lannen avan, kot serten size ti ganny adrese, koman en nouvo regilasyon ki pou vin pran lefe le 1 Oktob 2019. E se sa regilasyon ki nou'n tann site dan Lasanble. So sa ki enteresan, Gouvernman *US*, in koz lo en size;- Prezidan *US* in

pare pou zwenn ek bann *stevedore*, sey adres sa size atraver anmenn en regilasyon, met en keksoz tanzib lo latav, pour amelyor lavi pou sey amelyor lavi bann *stevedore*, apre ki'n fer sa diskisyon.

Me sa ki mon pe *remind* Lepep Seselwa la deor, se ki apre ki *LDS* ki'n dan mazorite Lopozisyon in koz lo sa size pandan plizyer lannen - mon ti a kontan konnen kan Prezidan Ramkalawan in zwenn avek bann reprezantan, bann *stevedores* pour li fer zisteman parey Prezidan Faure ti fer?

E ziska la mon pa'n vwar okenn rapor ki dir in zwenn avek sa bann dimoun. Dezyenmman mon ti a swete konnen, kan ki Minis Ferrari ki ti pran son lekor koman sanpyon bann *stevedores*, ek bann doker, in zwenn avek sa bann doker e bann dimoun pour zisteman realiz, oubyen met an pratik bann keksoz, ki zot in toultan dir dan Lasanble Nasyonal?

Se sa ler nou koz en nouvo *US* se sel opsyon pou Sesel, set en parti ki pare pour pran aksyon, konparab avek en parti ki prefere pou koz lo en size san ki i pran aksyon lo la. E pour mwan se sa, ki disteng sa reaksyon kot nou dir, poudir nou'n tann dir poudir ler serten *MNA* in sorti kot *Land Marine* zot in ganny zoure par serten dimoun.

Probableman rezon pour sa se akoz, dimoun i santi ozordi zot pa pe reponn a legzisans bann parol, e bann promes ki zot in met devan dimoun. E si dimoun pa satisfè, avek sa mon envit tou dimoun, le 6 vin ekoute kwa ki nou annan pou ofer diferaman pour zot. Akoz i kler ki poudir ozordi, nou annan en Gouvernman ki koz plis, dan plas fer aksyon. E akoz aksyon.

E akoz aksyon i enportan dan konteks sa ki nou pe diskite? Annou regard larealite ozordi. Larealite ozordi se sa bann kondisyon lanplwa ki'n ganny *set out* depi 2019, eski i relevan avek sirkonstans ekonomik ki nou trouv nou lekor ladan? E si i annan en largiman, e si nou poudir pou dir baze lo konteks e relevans ekonomik ki nou pe koz lo la.

Alors annou regard kote nou krwar i bezwen annan en sanzman, pour ki i ava anmenn en lot fason vwar keksoz an ki konsern, sa kategori dimoun ki ganny anploye dan nou lekonomi. Apre tou nou tou nou'n aksepte poudir sa bann dimoun in fer en travay formidab, zot debourye zot travay eksetera.

E nou tou nou tann lo radyo kot i kriye *gangway winchman* tim nimerò 1, nimerò 2, nimerò 3, nimerò 4

demann raporte pou travay eksetera. Alors koman en Lasanble serye, si nou pe fer sa, eski *mover* Mosyon pe dir –

E la mon ti a kontan petet si i kapab - e mon konpran sa akoz mwan i en Mosyon ki mon pou siporte - eski *mover* Mosyon pe dir ek nou koumsa poudir dan sa *schedule*, ki la devan nou ozordi, kot nou koz par egzanp *cargo handling of dry bulk*, kot ozordi nou pe ofer R44.10 pou sak erdtan travay ki sa bann dimoun pe travay -eski nou pe dir ozordi, ki nou ti a kontan ki sa R44 i sanze. Ou se sa ...

MR SPEAKER

Onorab, ou'n ganny 10minit sote. Me selman mon a donn ou ankor en 2, 3 minit, si ou a kapab terminen silvouple?

HON SEBASTIEN PILLAY

Mersi Mr Speaker. Mersi bokou pour ou rekonnet lenportans sa ki mon pe dir. Mon ava apresye sa 2 ou 3 minit ki ou pe donn mwan.

Eski nou pe dir ki sa R44.10 *for loading and unloading of containers*. Osi nou ti a kontan vwar li, sanze. Prezan an sa ki konsern *loading and unloading of dry frozen fish* ki ozordi bann dimoun pe ganny R7par *metric tonn*, eski Lasanble i pare pour komit son lekor poudir be

akoz nou pa fer sa R7 vin R8.50 par *metric* tonn?

Akoz nou pa pe koz, ler nou pe koz lo *loading and unloading of dry frozen fish*, i R7 pour *every metric* tonn, oubyen R100 per erdtan of *working time*, nou pa dir poudir nou pe koz lo R150 par erdtan of *working time*?

Mwan mon pe donn sa bann sif baze lo, sa ki mon krwar lenflasyon i ete. Nou kontinyen - si nou pe koz lo *loading and unloading of dry frozen fish*, R7 par *metric* tonn plis R123 par *zour or part thereof*, eski nou pe dir, nou pe revwar sa R7 pou fer li vin *at least* R8.50?

Rezon mon pe dir sa Mr Speaker, e nou pou kontinyen nou pou vwar par egzant lo *loading and unloading of salt* kot i R2.40 par *metric* tonn, mon kapab mazin ki manner i difisil. Si mwan mon ganny mon lapey lafen dimwan mon devret osi kontan ki en lot dimoun i ganny son lapey lafen dimwan.

E mwan mon pa la, pour mwan redir poudir en dimoun i ganny akout R50mil, i ganny akout R30mil - pa sa. Akoz ou pa konnen ki sa dimoun, in fer pou ganny sa larzan li ki in gannyen. Kantite travay ki'n fer pour li fer sa. E mon krwar nou bezwen apresye sa. Alors ki mon pe rode mwan Mr

Speaker, annou fer li diferan ek bann Lasanble presedan.

Kot nou kapab fer en propozisyon tanzib lo kote nou krwar sa bann sif, i devret sanze e kot nou angaz en deba, lo en nivo - ler mon dir nasyonal - lo en nivo tou bann akter, pou vwar kote sa bann mezir i bezwen sanze. Akoz mon osi mon pa kapab pran, pe *break down* en konpanyen, vin devan Lasanble e dir lala ki sa bann dimoun i gannyen. Nou bezwen koz osi lo bann travay ki sa bann dimoun i fer.

E prezan ler nou pe koz sa, nou osi bezwen koz lo *whether or not* dan serten sironstans, serten landrwa par egzant ozordi nou annan *IPHS*, eski i annan sa kantite travayer ki pe fer sa bann louvraz, ki ou pa pe vwar en *overloading* oubyen *overwork* dan en sans, travayer ozordi ki egziste?

Mr Speaker lo nou kote latab - sertenman nou'n dan Gouvernman e nou'n sey adres, serten keksoz ler nou'n kapab. Me ozordi nou pa dan Gouvernman. Me i pa vdir ki akoz nou pa dan Gouvernman ki nou koman en parti nou napa solisyon pou propoze.

MR SPEAKER

Konklir Onorab *please*.

HON SEBASTIEN PILLAY

Me lesansyel i reste, eski nou annan en Gouvernman ki pare pour ekoute ozordi, oubyen i le zis koz lo en size, nou fer tapaz lo la, e apre nou pa pe anmenn okenn solisyon?

E mwan sa ki mon ti a kontan vwar, lo en tel Mosyon akoz sa bann Mosyon labitid an 2017 i ti pas par linanimite dan Lasanble. E mon krwar baze lo tandans koze ki bann Manm in koze, i pou annan sipor lo sa kote latab osi pour sa Mosyon.

Mon ti a kontan trouve ki mannyer nou kapab, anmenn ansanm tou sa bann pwen, e pour nou kapab anmenn en solisyon pour sa problem ki ava, *deal* avek sa sityasyon ozordi. Prenon kont ki byensir, demen ek sanzman ekonomik, nou pou bezwen ankore enn fwa adres sa size. I pa pou en size ki pou ale, enn fwa pour tou. Me i en size ki nou bezwen kontinyen adrese.

Mon remersye ou Mr Speaker, pour letan ki ou'n donn mwan menm an plis. E mon swete ki, mover Mosyon i pran mon bann komantr e mon bann kritik konstruktif dan lespri ki'n ganny fer, dan lespri ki nou sorti Lasanble avek en rezolisyon ki kapab anmenn en keksoz tanzib pour bann dimoun - sa kategori dimoun ki nou apel zot bann *stevedores*, oubyen bann doker. Mersi Mr Speaker.

MR SPEAKER

Mersi Onorab. Onorab Henrie ou le fer en koreksyon lo ...

HON GERVAIS HENRIE

En point of order Mr Speaker. Anba *Order 61(1)(d)* i annan de keksoz ki Onorab in dir akoz enn letan in mansyonn Mosyon an 2002. E in mansyonnen poudir mon pa'n *capture* sa dan mon resers.

Now an 2002, dat ki Mosyon in pase ti napa *SNP* dan Lasanble. Akoz sa letan sete *United Opposition* ki ti annan 3 Manm ki ti dan Lasanble. E pour debout koman parti *SNP* Eleksyon Lasanble Nasyonal, sete ant le 4 ek le 6 Desanm 2002. *So there's no way* zot ti pou kapab anmenn en Mosyon. Savedir sa i en *fact* istorik ki pa korek.

E dezyenman Mr Speaker, mon krwar Onorab, ki'n koze avan mwan in konpletman pa konpran mon lentervansyon bomaten, akoz mon'n rekonnet poudir i annan lespas pou amelyore. Me mon'n dir ki i annan keksoz, pour nou travay avek. *It's not all doom.*

Me tou lede kote fodre asize, solman fodre asize pour kontinyelman amelyore. Mersi Mr Speaker.

HON SEBASTIEN PILLAY

(Off-Mic)

MR SPEAKER

Onorab Pillay nou pa pour prolonz sa silvouple. Nou pa pou prolonz sa. Ou'n fer en *statement* Onorab in fer son leksplikasyon.

HON SEBASTIEN PILLAY

(Off-Mic)

MR SPEAKER

Non, non, non mon krwar nou a kontinyen. Onorab, nou pou konbyen letan nou pou ale avek sa?

HON SEBASTIEN PILLAY

(Off-Mic)

MR SPEAKER

Ale fer en pwen vitman.

HON SEBASTIEN PILLAY

Be mon pa ganny en konpran ki mon pa kapab fer mon pwen. *Look* gete, mwan, mon'n fer mon resers *ok* - Mr Bernard Georges e mon site, "Mr Speaker Mosyon bomaten i demann ki Gouvernman i etablir en *Scheme* lasirans ki ava permet bann doker ek *stevedores* pou resevwar en lasistans kan napa travay dan por". *Verbatim* date Mardi le 19 Mars 2002.

MR SPEAKER

Non, be i pa'n konteste la li.

HON SEBASTIEN PILLAY

Wi be ou, ou napa nanryen. Mon avek tou respe ...

MR SPEAKER

I pa'n konteste sa li.

HON SEBASTIEN PILLAY

Avek tou respe - avek tou respe ...

MR SPEAKER

I pa'n konteste sa li, li in dir i pa ti la dan Lasanble

HON SEBASTIEN PILLAY

Li son largiman, ki'n fer *as if* ki sa ki mon'n dir, pa'n arive...

MR SPEAKER

Non-non. *Stop!*

HON SEBASTIEN PILLAY

So sa in arive. Apre dezyenmman Mr Speaker. Dezyenmman, avek tou respe ki mon annan pour ou, si sak fwa ... mwan plizyer Manm i reponn mon bann lentervansyon. Mon pa fer *matter of privilege* ouswa *point of order any more*.

Me ki mannyer sak fwa nou pou koz - savedir sa Manm ki i bezwen fer li, avan ou fer ou lentervansyon, get byen ki ou pou al dir. Mon sir taler Onorab Georges, pou al koze so ler i reponn mwan mon

pou al lev mon lanmen pour mwan dir li pa reponn?

MR SPEAKER

Ale nou'n al ase, avek sa.

HON SEBASTIEN PILLAY

Kisisa sa!

MR SPEAKER

Mon a donn laparol Onorab Georges. Mersi bann Manm pou swiv lord silvouple. Onorab.

HON BERNARD GEORGES

Mersi Mr Speaker. Bonn apre midi Mr Speaker, bonn apre midi tou bann Manm Onorab. Tou mon bann koleg, tou bann dimoun ki pe swiv nou dan lakour. Mr Speaker pa souvan ki, mon size en deba dan sa Lasanble. Apre midi la, mon'n ganny rapel ki i annan en bann lannen ki mon dan sa Lasanble mwan 2002. Mon'n reprezant *UO* dan sa Lasanble, mon reprezant *SNP* dan sa Lasanble, la mon pe reprezant *LDS* dan sa Lasanble.

E depi 2002 Onorab i fer mon rapel, ki mon'n anmenn en Mosyon presizeman lo sa pwen ozordi. Akoz sa ki nou pa pe *focus* lo la ase, se ki sa Mosyon i fikse lo en keksoz li. I fikse lo lasistans pour bann, *stevedores*, bann doker, ler zot napa louvraz. Se sa. *That's the narrow remit*, sa Mosyon apre midi la. Pa si zot ganny peye

byen, pa si zot kondisyon travay i *ok*, tousala se pa size sa Mosyon ozordi.

Sa Mosyon son *focus*, se parey mon Mosyon 20an pase son *focus* se, ki mannyer nou pou soulaz sa sekter ler napa bato? E se sa mon krwar sa ki kardinal avek sa, akoz tou sa bann, tou sa bann keksoz ki Onorab Henrie in koz lo la bomaten, tou bann lamelyorasyon ki'n annan dan fason travay, dan reminerasyon bann *stevedores*. tousala nou rekonnet.

Me parey li menm li in dir, i annan *still room for improvement*. E enn sa bann landrwa, enn sa bann *room for improvement*, se ki arive ler napa bato? Ki arive ler zot pa ganny kriye? Ki arive ler en sel kou zot napa lanplwa, zot napa lapey pour de trwa semen, en mwan *at a time*? Se la kot nou *focus* i devret ete, apre midi.

E Mr Speaker avan ki mon al dan deba li menm, mon remersye bann Manm ki'n mansyonn Onorab Fideria. Onorab Fideria set enn mon predeserer dan Senkyenm Lasanble.

Se li ki ti reprezant Les Mamelles, e Onorab Fideria set en dimoun ki mon pa kapab mal koz lo li. Akoz se en, se en Onorab ki'n travay bokou pour son distrik. E i sa

i ganny rekonnèt. E mon ti a kontan apre midi, pou salye li pour sa travay ki in fer. E pour lasistans ki'n anmenn son distrik.

Enn bann keksoz ki mon regret bokou, e toultan mon regrete, se ki ler nou al dan eleksyon, malgre ki ou en pe kontan, ki ou ganny, ki ou'n ranport laviktwar, ki ou ganny elekte par ou bann *constituents*, mon annan en serten regre tanzantan aköz ler mon fer sa, se Onorab Fideria, ki pa pe retourn dan Lasanble.

E sa se pa en keksoz ki ou devret selebre, set en keksoz ki tous mwan dan en fason profon. Aköz se en brav msye ki annan son leker *in the right place*. E la mon bezwen, dakor avek li, ki sa parol ki i kontan koze ki Les Mamelles i annan, *beautiful people*, i apel *the beautiful people of* Les Mamelles i annan parfetman rezon.

E de sa bann *beautiful people* se Onorab Fideria ek sa Onorab ki pe koze la ozordi. Aköz nou bann manrmay Les Mamelles. I tris - I tris ki zot Gouvernman, pa'n trouv li bon malgre ki Onorab Fideria pa'n ganny eleksyon, zot Gouvernman pa'n trouv li bon pou anmenn li dan Lasanble Nasyonal lo en baz proporsyonnel.

E sa ti ava en keksoz fantastik, e mwan in tous mwan toultan ki zot in kit li ater. Aköz i ti annan en gran kontribisyon pou fer, e mon pa anvi denigre okenn Manm Lasanble, par dir ki i ti a kapab pli byen fer ki detrwa ki dan Lasanble. Pa sa ki mon oule dir. Me i ti a kapab fer osi byen ki serten ki dan sa Lasanble lo zot kote latab.

Mr Speaker i enn parey nou'n vwar, ki politikman *touchy*. E sa annou fer li kler;- bann doker, bann *stevedores* e la ou fer mwan rapel ki ler mon ti anmenn mon Mosyon an 2002, montre ou ki mannyer ti difisil dan Lasanble sa lepok. Pa mwan Mosyon ki ti ganny kritike me en Manm lot kote latab, sa lepok. Dan gran mazorite ti annan 3 nou.

In fact ti annan wi, 2002 ti annan zis 3 nou dan Lasanble. E lo kote Lopozisyon, e enn bann Manm olye koz lo Mosyon, in ganny lodas demann mwan personnelman, si mon konn diferans ant en doker avek en *stevedore*? Konmsi mon fek ne yer.

Lala sa ki nou ti bezwen fer fas avek, dan sa lepok dan Lasanble. E mon rapel sa tre byen. Aköz in sok mwan, ki en manrmay Les Mamelles kot en gran kantite doker i sorti, swadizan pa ti pou konnen ki mon pe koz lo la. Pourtan se

mwan ki'n anmenn Mosyon, parey Onorab Richard Labrosse in fer ozordi.

Mr Speaker mon dir ki sa Mosyon i *touchy*, akoz *stevedores* ek doker, pou serten nou bann distrik o bor lavil i form parti en gran group voter. E nou bezwen ganny vwar, pe defann zot lentere. E sa i toutafe normal e toutafe respektab.

Me an menm tan nou konnen sete en group dimoun. E annou dir keksoz kler, ki pa fasil pour *manage* - pa fasil pou *manage*. Tou, tou *stevedores*, tou doker avek kekfwa enn de leksepsyon. E mwan mon annan bokou zanmi, pros ki fer sa metye.

Avek tre pe leksepsyon, zot ganny drwa dir ou, an konmsi mon'n vot pou ou dernyen fwa, e la mon ganny kit de kote? Zot ganny drwa dir ou sa, e zot dir ou sa souvan. Zot fer ou rapel ki zot en gran sekter voter, e ou bezwen get dan zot *welfare*. E sa nou konpran bann nou ki responsab, pour sa bann distrik kot zot sorti. Se en, sen group dimoun spesyal, pou bann rezon ki'n ganny evoke dan sa Lasanble, zot travay dir, zot lev granmaten, zot fer en travay ki sal, ki fre, ki *backbreaking* zot menm.

Me solman annou pa zis get lo son move kote, parey in ganny dir zot travay e zot

ganny ase byen reminere. Mon krwar ler nou konpar sa ki zot fer avek serten travay zournalye, nou vwar ki zot pa mal pase. E se pour sa rezon, Mr Speaker ki - e sa se en keksoz ki toultan mon dir - bokou zenn garson ki lekol, zot lanbisyon se vin en *stevedores* demen. E parey bokou zenn fiy ki lekol zot lanbisyon se vin en *carer*, en *home carer* avek zot paran.

Akoz? Akoz se de *job* ki enn i raport bokou e lot, ou pa bezwen investir bokou lenerzi, akoz ou pe travay lanmenm la e kantmenm saler pa tro bon. Me *at least* ou ganny en reminerasyon.

E doker fodre nou konpran sa tre, tre byen Mr Speaker. Se pa bann dimoun - e nou tou nou dakor, nou tou nou konn sa. Se bann travay dir, me ki *play hard* osi. Akoz i annan en keksoz ki pa ase doker i fer. E mon krwar se sa ki sa Mosyon i adrese, i anvi adrese ozordi - zot pa ase prevwayan.

Zot pa ase prevwayan, zot travay dir zot ganny peye en zoli lapey, zot depanse. E apre ler napa bato zot pa'n prevwar, e sa la kot sosyete i bezwen prevwar pour zot.

Alor Mr Speaker, dan sa Mosyon la. Nou annan, nou bezwen siport *stevedores* ek doker, pour tou bann rezon ki'n ganny evoke. E mwan

mon premye pour siport zot. Me nou bezwen osi pa per pour nou dir avek sa bann *stevedores* avek sa bann doker. Manrmay annan en pe plis responsabilite. Get en pe plis dan zot *welfare*. Mazin demen, zot konnen ki pa toultan ki annan bato, prevwar.

Se sa balans ki nou bezwen ozordi atraver sa Mosyon. Se sa, sa mesaz balans ki nou bezwen, ki nou bezwen anvoy ver sa bann travayer. E dan sa konteks Mr Speaker, mon bezwen dir aköz mon pa'n tann dir dan sa Lasanble. Nou isi Sesel Por Victoria, i por pli performan dan larezyon. Bato i pas mwens letan pe sarze, pe desarze dan Por Victoria, ki dan okenn lezot por dan larezyon Por Madagascar, Por Comoros, Por Maldives avek Por *Maurice* ek *La Reunion*.

E sa *goes to the credit of* sa bann travayer ki fer, sir ki sa i arive. Alor nou bezwen rekonnet, ki nou annan en group travayer ki pe perform pli o, a en nivo pli o ki tou zot bann ki zot tou zot bann zanmi dan larezyon. Bliy Sengapour zot dan larezyon, zot pe perform bokou, bokou plis e bokou pli byen ki bann lezot.

Me nou pa kapab zis kay lo la. Nou bezwen osi rekonnet, ki sa bann travayer por, sa bann *stevedores*, sa

bann debarder zot bezwen osi, pran zot responsabilite. Aköz zot nepli, en *casual worker* zot. Zot nepli en *unskilled worker*. Sa bann ki travay dan lendistri pwason, dan lendistri ton se bann *highly skilled workers*. Kantmenm zot pa'n ganny en ledikasyon dan sa domenn, zot travay telman byen ki zot in vin por pli performan dan larezyon.

Me alor lo lot kote, ler zot in fer sa, silvouple manrmay, *save* en pe pour letan dir. Pey zot alimoni! Pa les zot ganny trennen devan Tribinal Lafanmir. Mon akont ou en keksoz Mr Speaker, mwan mon rapel en fwa. Mon annan en zanmi, tre pros ki debarder. Son manman i *call* mwan en zour. I dir en tel i dir ou, i en pe fay napa bato, anmenn enn pti larzan kot li, anmenn en pti larzan pour li taler, tanto ler ou monte.

Mon dir be kote i ete la, la i pe asize anba lavarang i pe ekout lanmizik. Mon dir "ou vwar, mwan mon pe travay mon pe travay mon pe sey fer enn pti larzan. Li i pe asize anba lavarang se li pe ekout lanmizik?"

Mwan ki bezwen tanto ler mon monte, pran enn pti larzan ki mon'n travay anmenn pour li, aköz li i pa kapab sorti anba son lavarang, vin kot mwan pou vin rod son larzan. Ou vwar se

sa mantalite, Mr Speaker nou bezwen koz fran. Nou bezwen koz fran.

Mon annan en kantite zanmi debarder, silvouple pran zot responsabilite en pe plis, fer parey bann zofisye Lapolis, fer parey bann *nurse*, fer parey bann *teachers*. Akoz sa bann zans osi zot travay *shift* zot, zot travay tar zot, zot leren i dou, zot bezwen koriz kaye, zot pas vakans pe *train* pour zot retourn ankor. I pa zis *stevedores* ki fodre nou pe regarde, nou pe regard. Nou bezwen fer sir ki tou dimoun right *across the board*, enkli *stevedores* i ganny en *good deal*.

Alor Mr Speaker, pou terminen mon ava propoz, akoz sa bann propozisyon nou'n ganny demande pou fer, mon ava propoz bann keksoz swivan. Tel parey mon ti demande an 2002, e ozordi Onorab Richard Labrosse pe demande, se en lankadrem legal pour asire, ki akoz nou konnen ki sa bann dimoun ki travay dir - sa bann *stevedores* ki rente, ki travay dan bann kondisyon difisil, pa prevwayan.

Nou konnen ki zot pa prevwayan, akoz se pour sa rezon ki nou pe koz lo sa ozordi - annou trouv en lankadrem legal pou fer sir ki, akoz zot pa prevwayan, sosyete avek Gouvernman,

avek zot menm, avek zot bann anplwayer *Land Marine, Hunt Deltel, IPHS*, i ava kapab asire. Mwan mon ti demann en lasirans an 2002. Ozordi nou pa bezwen al dan lasirans - i ava asire ki en larzan i ava ganny tire lo zot lapey, ava ganny met de kote, pour ki ler napa bato, zot pa pour lafen, zot ava fer en *saving* pour zot kapab itilize.

Se sa, sa ki sa Mosyon pe demann nou apre midi, pou fer Mr Speaker. E mwan dan sa konteks, mon pou dir avek Onorab Labrosse, mersi Onorab, ki ou'n pran en size ki *tricky*, en size ki *touchy*, en size ki pa fasil, kot nou bezwen *manage* lekspektasyon en group voter enportan dan nou bann distrik avek lasosyete, ki bezwen prevwar pour zot.

Akoz zot, zot refize prevwar pour zot prop lekor - an gran mazorite, pa tou, i annan ki prevwar - me an gran mazorite. Alor Mr Speaker Onorab Labrosse. Mersi ki ou'n anmenn sa a nou latansyon. Mersi ki 20an pli tar ou pe pran sa *relay*, ki mon'n komanse an 2002, pour ankadre legalman en striktir apropiye pour asire ki sa group travayer, pa zanmen tonm dan bezwen. Me ki ler zot napa travay, dan zot sekter loperasyon - parey ou Mosyon i dir - zot ava kapab kont lo en larzan ki ava ganny met de

kote pour zot, atraver sa larzan ki zot fer ler zot pe travay.

Avek sa detrwa mo Mr Speaker, mon remersye ou e mon remersye mon bann koleg pour zot pasyans. E mon rasir *mover* Mosyon ki i pou ganny sipor lo mon lapar. Mersi.

MR SPEAKER

Mersi Onorab. Mon ava apel Onorab Labrosse pour son repons e konklizyon lo deba.

HON RICHARD LABROSSE

Ok. Mersi Mr Speaker. Dabor ancor enn fwa bonn apre midi tou mon bann koleg isi prezan. E bonn apre midi tou mon bann koleg isi prezan, e bonn apre midi pour tou sa ki'n ekout nou depi bomaten ziska la. E ou ki'n fek zwenn nou.

Mr Speaker, ti en deba vremen enteresan pour ekoute bomaten. Sirtou en size parey nou'n dir, ki konsern en lot group travayer, dan lasosyete. Par egzanp, nou'n antre nou dan en nouvo Gouvernman, ki avek bi se pour nou revwar keksoz pou nou met li drwat parey nou ti dir ler nou pe antre.

Mr Speaker ozordi, apre mon'n sa bout ki mon pa'n *pick up* dan mon resers ki sa Mosyon ti'n ganny mete 20an pase. Mon vremen santi mwan enn pti pe - mon kapab dir enn pti pe en lemosyon akoz sa i

mon premye Mosyon, apre 2an ki mon'n ganny elekte koman *MNA Plaisance*. E sa byensir, i vin koman en lot leksperyans, ki pou vin lavenir pour bann prosen Mosyon byensir, ki pou vini lannen prosen.

Mr Speaker sa Mosyon ki devan nou, i bann dyalog ki mon'n gannyen ek bann dimoun dan mon distrik. Parey in fer resorti dan nou distrik i annan en gran popilasyon zabitan ki pe pratik sa louvraz. Me detanzaot ou vwar zot dan bann serten difikilte dan lavi. Me parey mon'n dir sa louvraz i annan bann keksoz ki i vin avek. Me selman ki mon vin avek se ki pou demann Gouvernman ansanm ek Sekter Prive pa pour zis met larzan dan pos. Me ansanm pou vwar en fason pour kapab soutenir zot. Kekfwa donn zot en lot louvraz par kote parey nou dir, enn pti *part time job*.

Zis pou al direkteman lo bann keksoz ki'n fer resorti parmi bann Manm. Dabor Mr Speaker mon ti a kontan felisit zot tou ki'n koze lo sa Mosyon lo tou lede kote latab. Sa ki zot in dir, zot in eksprim li dan zot fason pour zot ki mon'n vremen apresye e ki mon osi mon'n kapab fer bann lezot analiz. E zis parey *MNA Pointe Larue* in dir mwan, in donn mwan en direktiv. In dir mwan

apre sa Mosyon pa zis asize avek, fer en swivi.

E la osi mon pou demann li osi pour zwenn mwan ansanm, koman ki'n donn lanmen koze, pour nou asize pour nou regarde ki mannyer nou kapab anmenn nide ansanm avek sa nouvo Gouvernman ki la ozordi. Akoz i en Gouvernman, ki responsab e serye e travayan ki ekout nide lo tou le de kote latab.

E mon'n osi largiman Onorab Loze Mr Speaker ki'n anmenn bann bon pwen valab. Me selman par ler mon'n santi li al dan son politik, sa Onorab Loze, nou tou nou konn li. E nou'n osi, mon'n ekout Onorab Cosgrow ki li anvoy mwan pou al rod Minis Lapes. Me osi i bezwen realize ki serten letan i ti pe okip sa pozisyon dan Gouvernman. So mon mazine kekfw si ou ti a kapab, dan plas ki ou ti anvoy mwan rod sa, ou ti a kapab donn ou prop propozisyon ki ou ti annan sa letan. Avek nouvo Gouvernman la devan nou. So ou'n mank sa bis.

(APPLAUSE)

HON RICHARD LABROSSE

So selman ankor enn fwa mersi pour ou bann pwen valab ki ou'n mete. E mon osi mon'n ekout sa osi, mon'n ekout Onorab Labonte osi ki'n

ansanm avek Onorab Zialor ki'n segonn Mosyon. Mon dir zot mersi pou zot bann lankourazman, ki zot in rekonnnet travay nob ki sa bann dimoun zot fer, zot pe anmennen dan lekonomi pei.

E apre osi lot ki'n koze avan *LGB* Onorab Pillay Mr Speaker. Ki li in donn mwan en bon pe matematik pour al fer. Me selman mon ti a kontan dir avek Onorab Pillay ki sa Mosyon ozordi ki son Mosyon ki nou pe adrese se pour rod en mezir apropiye pour soutenir *stevedores*.

Me pa pou al dan bann zafer tonaz, pou nou al rode. Sa kekfw mon ti ava konsey ou pou vin avek en Mosyon, ouswa ek en deba akoz sa mon krwar i valab sa ki ou'n dir. Me selman ozordi, Mosyon li menm i pa le pwen ki nou pe koz lo la. E mon pour osi, remerci *LGB* pour on mo lankourazman. E zis pou fer zot rapel ki *LGB* osi en kandida pour Plaisance. Mon mazine sa bann letan ki i ti dan Lasanble ki in anmenn sa Mosyon.

Mr Speaker ki mon poudir apre pou terminen, mon ti a kontan kekfw ki Gouvernman ansanm in ekout byen bann pwen ki'n ganny resorti ozordi. E ansanm Sekter Prive osi, e mon krwar kekfw bann dyalog ki'n ganny

fer dan lepase e kekfw a ti kapab ganny remet ankor.

Lasanble osi kekfw a si i annan bann Komite ki annan enn pti koneksyon avek ki nou pe koz lo la ozordi, ti kapab ganny met *onboard*. Kot ansanm nou pou ava vwar ankor, nou pe repet ankor menm topik parey in dir, apre 20an pour nou retourn ankor lo menm latib. Avek sa Mr Speaker, mon a dir mersi Lasanble.

(APPLAUSE)

MR SPEAKER

Mersi Onorab. Mon ava aprezan apel bann Manm pour vot lo Mosyon. Manm ki an faver lev lanmen silvouple? Mersi mon krwar tou Manm in vote. Okenn Manm ki'n vot kont?

Mersi. vot lo Mosyon anmennen par Onorab Labrosse, ki Lasanble i demann Gouvernman pou met an plas, ansanm avek Sekter Prive, bann mezir apropiye pour soutenir *stevedore* ler zot napa louvraz dan zot sekter loperasyon. 22 Manm in vot pour, 0 kont e 1 in *abstain*.

Donk Mosyon in aprouve par Lasanble e felisitasyon Onorab Labrosse, pour sa sipor *anonim ki ou'n gannyen. E lapiy i sorti lo tou lede kote latib. Par inanim, e i annan enn ki'n *abstain*. E alor

i pa totalman inanim. Mon espere mon koriz mon lekor. Mersi.

Bon nou annan en lot Mosyon lo *Order Paper*, e menm ki letan i kourt mon ti a kontan pran li. Akoz zot a realize poudir ozordi nou dernyen zour, ki nou kapab annan Mosyon, vi ki nou pe al antre dan deba Bidze, e apre nou pou annan en letan sarze avek Lalwa, Lezislasyon.

Mosyon ki devan nou i dan non Onorab Waven William. Onorab ou a prezant ou Mosyon silvouple.

HON WAVEN WILLIAM

Mersi Mr Speaker. Mr Speaker avek ou gidans, Mon pe entrodwir Mosyon, ki mon'n demande pou fer enn pti lamannman avek so avek ou gidans mon koz lo Mosyon *amended*.

MR SPEAKER

Ou Mosyon lo *Order Paper* i as *amended* non dapre sa ki ou'n demann mwan. Wi prezant li mannyer i ete.

HON WAVEN WILLIAM

Ok Mr Speaker Mosyon i lir comme swivan:-

Swivan lelan devlopman e lenkonvenyans tel parey gaspiyaz resours dan rezyon lavil Victoria, Lasanble i demann Gouvernman pou

revwar lafason ki aktivite i ganny fer dan lavil.

MR SPEAKER

Mersi. Dapre prosedir, Mosyon lamannman in ganny mete lo papye avan. Alor nou kapab aksepte li mannyer i ete. E nou a prosede avek Mosyon.

HON WAVEN WILLIAM

Mr Speaker zis pour koriz sa ki mon'n prezante. Alors si ou pe dir ki mon kapab pran li parey in ganny amande. So Mosyon i ava lir *comme* swivan:-

Swivan lelan devlopman e lenkonvenyans tel parey gaspiyaz resours dan rezyon lavil Victoria, Lasanble i demann Gouvernman pou revwar lafason ki aktivite komersyal e gouvènmantal pe ganny fer dan lavil. Mersi.

MR SPEAKER

Mersi sa i dapre amannman, mersi. Nou a ganny segonnman lo sa Mosyon? Onorab Henrie?

HON GERVAIS HENRIE

Mersi Mr Speaker. Annakor avek *Standing Orders* 43(2) Mosyon i ganny segonde. Mersi.

MR SPEAKER

Mersi Mosyon in ganny segonde, Onorab William. Ou a adres ou Mosyon silvouple.

HON WAVEN WILLIAM

Mersi ankor enn fwa Mr Speaker. Mr Speaker, avan tou mon remersye Bondye pour son faver e lagras lo nou pei, e lo sa pep. Mon remersye osi li ki donn nou lakantite loportinite koman en Lasanble pour diskite lo bann size, ki annan pou fer ek byennet sa pep, ledikasyon e enfluyans, sa pep pou pran linisyativ e responsabilite, e bann zenn pour kontinyen reve, vin pli inovativ ver devlopman soutenab nou pei.

Mr Speaker, Mosyon ki lir *comme* swivan:-

Swivan lelan devlopman e lenkonvenyans tel parey gaspiyaz resours dan rezyon lavil Victoria, sa Lasanble i demann Gouvernman pou revwar lafason ki aktivite komersyal e gouvènmantal i ganny fer dan lavil.

Mr Speaker, se gran plezir ki mon pe prezant sa Mosyon. En Mosyon ki pe pous nouvo zenerasyon, pour kontinyen reve, pour pous nou bann profesyonnel pou kontinyen vin pli inovativ e donn lespwar nou pep e nou zanfan, ki pou pran la relev ozordi, demen e dan lavenir.

Mr Speaker i enportan ki mon kalifye serten mo pou anmenn serten presizyon dan deba. Tel parey sa mo resours, ki tenir kont sa laspe letan, larzan, travayer koman

anplwayer e anplwaye, resours imen, lenfrastruktir e pour devlopman sekter nimerik.

Mr Speaker Mosyon i fer mwan mazin osi sa fame fraz *Benjamin Franklin* ki'n aparet dan liv *Georges Fisher* 1748, nonmen the *American Instructor, ouswa Young Man's Companion* kot Franklin ti dir, "*Time is money. Remember that time is money*". Wi Mr Speaker letan pour tou sa ki konsyan son valer, menm si i napa en pri egzakt atase avek, letan i presye.

I osi vre ki larzan pa kapab zanmen ranplas letan perdi. Alor annou nou tou a tou pri, annou evit gaspiyaz letan. Mr Speaker sa Mosyon i osi sivre bann plizyer deba e diskisyon, lentansyon, rev ki Sesel anba diferan letap governans pei, depi lendependans ziska aprezan.

Mr Speaker en nenport Gouvernman ki vin o pouwar i pou batir e amelyor, lo sa ki byen e rezet bann ki pa annakor avek letap e sirkonstans devlopman global e nasyonal ozordi.

Mr Speaker Sesel depi miltiparti anbark lo en vites devlopman, sorti dan en lankadremant kontrole, ptitapti pou ozordi anba en nouvo Gouvernman dan en miltidimansyon louvertir pour ankore plis opsyon e loportinite dan pei. En lelan liberte pou

vreman fer sa pep realiz ki *the sky was never the limit*. Ki zot kapab ariv pli lwen ki sa, pour sa ki anvi.

Mr Speaker sa nouvo Gouvernman, pa pe fer sa pep krwar ki i sel opsyon pou Sesel. Mosyon pe sivre vizyon Gouvernman, dan fer sa pep krwar ki i form parti opsyon, dan devlopman Sesel e ki son responsabilite e son kontribisyon i enportan.

E dan sa prozesis, i ofer li lanvironnman pou tou opsyon e swa posib. Mosyon pe demande ki Gouvernman i revwar lafason ki bann aktivite komersyal e gouvernmental i ganny fer dan lavil, dan sa lelan devlopman ki Sesel pe eksperyanse.

Mr Speaker, dan konteks sa Mosyon, mon pe avans devan 9 pwen ki mon krwar merit ganny eksplwate dan deba parmi lezot ki Manm pou aporte, pour anrisir deba, pou enfliyans Gouvernman ek Sekter Prive pou evalye zot bann merit, pour kreasyon plis larises e gaspiyaz resours.

Premyerman Mr Speaker, mon ti a kontan tous lo sa pwen sirkilasyon dan lavil, dan kad motoris e pyeton, fasilite opsyon pour plis akse. Mr Speaker i domaz ki pandan tou sa bann lannen nou'n mank lokazyon, nou'n mank sans parey Seselwa i dir, nou'n mank bato Mr Speaker,

pou ankor fasilite akse dan lavil.

Ozordi ou vwar poudir nou annan bann, bann *zebra crossing*;- nou annan bann *roundabout* ki pre avek kanmarad, ki si nou ti'n mazin lo fer bann *overpass*, ouswa bann *under pass*, kot olye met *zebra crossing*, dimoun ti kapab pas anler, oubyen pas anba semen, ti pou fasilite sirkilasyon trafik e evit gaspiyaz letan e resours.

Mr Speaker i domaz osi akoz, nou anvoy bokou nou zenn *train* aletranze. E mon panse ki ozordi avek devlopman teknolozi, nou ti'n devret kapab sanz lafason ki sirkilasyon pyeton e motorist i ete dan nou lavil.

Mr Speaker *it's not too late*. Mon konsyan ki, sa nouvo Gouvernman pe fer serten keksoz. E mon demande ki nou regard dan posibilite pour nou kapab, konstrir bann *overpass* avek bann *under pass* pou kapab fasilite sirkilasyon.

Dezyenm pwen ki mon anvi aborde se, nou bezwen osi revwar Mr Speaker bann kad Lalwa ki egziste. Ozordi nou annan bann Lalwa par egzantp, ki konsern bann groser masin ki sipoze sirkile a diferan moman dan lavil.

E ozordi nou'n vwar avek devlopman, ki bann mon kapab dir bann anbouteyaz, ki

annan dan lavil, letan ou vwar poudir dan tou bann ler, i annan bann diferan groser transpor i pase parey bann *container* ensidswit. Ou vwar bann *excavator* pe pase, e sa Mr Speaker i fer, ki i annan - nou vwar i annan Lalwa - be solman Lalwa pa pe ganny respekte e enplimante.

Mr Speaker mon osi la pe koz, trwazyenmman lo Plan Devlopman Nasyonal.

Mr Speaker la ankor mon dir nou fek *approve* detrwa an pase, *the Physical Planning Bill*, *but it's not too late* pour nou revwar enn pti pe ankor stratezi, ki fason nou plas bann diferan keksoz dan lavil ki nou pa ganny en lot keksoz, parey in arive laba Providence, kot ozordi i en problem.

Me nou vwar kantmenm i annan serten lesey pour kapab sey deblok trafik. E osi nou vwar poudir i annan serten bann aktivite komersyal, petet pa devret pe ganny mete dan menm landrwa ki lezot. So Mosyon pe demande ki sa i ganny regarde.

Mr Speaker, katriyenmman mon anvi tous lo demars Gouvernman, pou devlop bann sistenm nimerik e *digitalize* sistenm an plas. Mr Speaker sa i en deba - i en size, ki en bon pe letan pase nou'n koz lo la. Me mon'n kontan ki lannen ale, lannen vini nou

vwar poudir i annan serten progre.

E mon kontan vwar ki depi ki'n annan sanzman Gouvernman, mon vwar enn pti pe vites dan lelan ki sa devlopman nimerik pe pran. resaman lo nou'n vwar Vis-Prezidan pe fer louvertir pour serten platform, ki pou donn plis nou bann zenn Mr Speaker, sa benefis pour zot kapab devlop lo sa bann platform.

Mr Speaker mon le koz osi lo sa program desantralizasyon. Mr Speaker sa osi en vye size kot nou'n koze, nou'n kree Gouvernman Lokal, e mon santi poudir nou pa devret aret la. I annan serten servis ankor ki nou kapab desantralize, tel parey PUC Mr Speaker.

Si *Cable and Wireless* avek *Airtel* ozordi in kapab ariv dan distrik, ozordi nou kapab tir larzan osi dan distrik. Akoz ki PUC pa kapab osi desantraliz son servis kot olye zis par rezyon, me dan bann distrik osi nou kapab, nou kapab pey nou bann *bill*, Mr Speaker. Me mon kontan osi ki nou pe kapab osi kapab fer sa atraver nou telefonn. Mr Speaker, mon santi osi tou ki i annan sa neseseite pour pous ankor plis pour *e-government*.

Mr Speaker i annan en ta benefis, en ta rezon pour nou kapab tir larzan e fer larzan si

Gouvernman i al plis dan *e-government*. Mr Speaker ozordi bokou retar. Mon donn ou en legzanp parey kot *Registrar*, bann biznessmenn i vremen ankoler parfwa, akoz i pran bokou letan pour zot kapab ganny serten dokiman. I pa zis laba i annan plizyer landrwa ki mon kapab nonmen ankor.

Mr Speaker, i annan sa neseseite osi pour revwar ler travay e fer serten aktivite pour sorti dan sa *mindset* 8er - 4er. E mon rapel ki en Onorab ti dir, detrwa semenn pase ki Sesel nou ankor en prodwi 8er -4er.

Mr Speaker me dan sa lelan, dan sa krwaze semen kot nou'n arive avek devlopman, i pour neseseite - i pou neseseite, si nou pa anvi gaspiy letan pour nou revwar ankor en pe ler travay.

Mr Speaker, i pa en keksoz ki difisil, i kapab ganny fer. E alor mon pe lans sa lide devan, ki Gouvernman avek Sekter Prive osi i kapab konsidere. Mr Speaker akoz deor aktivite i 24 lo 24. I annan nou bann pei zanmi ki zot ler looperasyon i pli tar ki pour nou. Akoz ki nou pa kapab bouz dan sa direksyon?

Mr Speaker mon pe demande osi tou ki nou, nou revwar ek bi pour pous lenstitisyon pou vin li *digitalized* e ki nou zenn ozordi

i ava bann dirizan nimerik, pour kree platform e program pou sanz fason e fer pei vin plis efikas.

Mr Speaker sa 8 pwen parmi lezot, ki lezot Manm pou vin avek ouswa eksplwate lo deba sa Mosyon, a ed Gouvernman koman fasiliter e Sekter Prive pou pran desizyon, e fer bann aksyon ki Sesel ava, maksimiz son lenerzi e resours pou kree plis larises dan pei.

I ava pous nou bann zenn, pou kontinyen vin pli inovativ, e *think outside the box* e sitye zot akote lezot bann zenn global, ki pou sanz fason fer lemonn, koman *movers and shakers*, e koman bann azan sanzman Mr Speaker, pour nou reste soutenab ranforsi nou rezilyans. E pour pous lemonn pli vit posib servi tou opsyon pou kontrol resofman later e protez nou leko sistenm, pour nou viv.

Mr Speaker dan lespri vizyon Manifesto ki Gouvernman dizour, ti prezant ek pep pour eleksyon zeneral, 2020, tenon kont dezir e laspirasyon anver transform Sesel ver desantralizasyon servis, akseler *e-governance*, devlopman lekonomi *digital*, fasilite *ease of doing business* atraver pli opsyon, pou plis efikasite dan devlopman Sesel.

Mon pou demann Gouvernman, par lefe ki pandan sa 2an pei in kapab atraver bann desizyon brav, saz e pridan anba gidans Bondye, Sesel in sorti avek ekselans ver en target ekonomik. Mon demande ki zefor adisyonnal i ganny mete, anver efikasite dan servis piblik, fasilite plis lord dan lafason ki bann servis, e sipor lenfrastruktir nesaser, pou batir sa nouvo Sesel, e transform lafason ki devlopman sosyoekonomik Sesel pou ankor revwar kontinyel stratezi ver devlopman.

Mr Speaker mondyalman diferan lesey anba diferan kalkilasyon pe ganny fer, pou donn en sif egzakt lo pert finansyel mondyal lo letan perdi, gaspiye. Mr Speaker nou pe koz lo bilyon. Sesel osi nou pe koz lo bilyon, depi apre lendepandans koudeta, miltiparti, enkli ozordi.

Mr Speaker bokou probleman mondyal e nasyonal ti kapab ganny rezourd, permet zwenn target devlopman soutenab mondyal pli boner. E permet promes \$100bilyon par an, par bann pei devlope anba Lagreman *Paris* Sanzman Klima.

Mr Speaker ki Bondye Tou Pwisan i kontinyen beni nou, isi dan sa Lasanble, pour kontribisyon ki nou pou pe fer

ouswa pou fer, pandan ki nou deservi sa pep. Mr Speaker *I beg to move*. Mersi.

MR SPEAKER

Mersi. Mersi Onorab donk mon annan 4 Manm ki'n lev lanmen e mon sipoze segonder Mosyon osi mon a enkli li lo lalis. Mon ti a kontan demann tou Manm ki pour entervenir pour donn mwan zot non la konmela akoz mon bezwen *manage* letan en pe byen.

Donk e sa i enkli bann *Leaders* si zot pou koze, oubyen silvouple lev zot lanmen konmela. Akoz si mon vwar ki nou pou napa letan pour pran serten Manm, nou pou bezwen ferm mon lalis a en serten moman.

Manm ki anvi entervenir mon a ganny zot lanmen silvouple? Bon *ok, right*. Mon annan 6 Manm la pour lemoman. Mersi Onorab Loze mon'n note. Tre byen, bon mon krwar sa i en Mosyon ase ektanstansif, i annan en pe soz lo la. Mon a met 15 Minit par entervenir? E nou a regarde kote nou ava arive. Onorab Henrie. Segonder eski ou anvi pran laparol la konmela?

HON GERVAIS HENRIE

Wi mon a koz la.

MR SPEAKER

Ok byen tre byen ou annan laparol.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker mon ti a kontan dabor remersye Onorab William pou anmenn sa Mosyon parski rol Lasanble Nasyonal se ki detanzaot nou bezwen anmenn sa bann size, ki nou santi nou popilasyon i bezwen kontinyelman reflesir lo la dan Lasanble, koumsa i ava vin a laporte piblik pour ed zot, dan zot refleksyon.

I ava osi redinamiz bann *stakeholders* ki sipoze pe pran swen avek serten size, ki si nou ti'n komans koz lo la i pa'n al lo en *shelf* par la. E osi ki toultan mon dir letan nou diskite bann size dan Lasanble Nasyonal, i ti ava byen ki medya i pran e anmenn li pli devan. Zot, zot al osi koz avek bann diferan kous nou popilasyon kekfwa ki pa'n enplike.

Donk Mosyon ki devan nou pe demann ki nou reflesir, ki mannyer nou kapab resanz aktivite komersyal e ekonomik dan nou pei prensipalman, nou kapital Victoria. E sa deba i pa nouvo ozordi. Nou pa pe dir poudir nouvo Gouvernman ki pe anmenn sa. Non, nou fek, nou nouvo dan sa ladministrasyon.

Plizyer fwa in annan en diskisyon a en moman ouswa en lot, e sa ki mon rapel byen an 2017 ti annan *Victoria Master Plan 2040*, ki ti ganny lanse. E son febles avek son konsiltasyon ti fer an 2017, e sa i ti lepok 15 lo 10. Koriz mwan si mon mal, me tou bann Manm Lasanble par egzantp ki ti dan rezyon Victoria, nou pa ti ganny envite, nou pa ti ganny konsilte, nou pa ti ganny enplike ditou dan sa zafer. Mon ti vwar lo televizyon parey tou dimoun.

E i pa byen letan nou pe pran bann desizyon enportan koumsa ki nou kit diferan group dimoun deor. Me selman i pa zanmen tro tar pour nou *catch up*, la prezan ki nou trou dan direksyon pei. So mon kontan ki Onorab anmenn sa, akoz nou bezwen parey mon'n dir kontinyen reflesir.

E la sirtou nou tonm dan en moman, en krwaze semen dan nou devlopman koman en Nasyon. Dabor nou dan peryod pos-COVID, atraver COVID-19 sa pandemik ki'n tap lemonn depi 2020. In sipoze fer nou aprann, en kantite keksoz. E i annan en landrwa mon fek tande lot zour ki'n dir, sa ki zot pou konsider koman, dimoun ki la sa lepok ki nou pe viv ladan, imen i bezwen kapab aprann

nouvo keksoz, oubliy serten fason fer e readapte.

E se sa alor ki nou'n fer. Nou sipoze. Akoz nou ti pe travay, nou pa ti kapab bouze par egzantp. Nou ti *work from home*. *Online* ti vin en keksoz enportan, *flexible working hours*. Be nou pa kapab konman sityasyon pe rekomans retourn normal, nou bliy tousala e nou kontinyen 8er - 4er parey Onorab pe dir.

E dezyenmman, avek en sanzman Gouvernman, nou pe koz transformasyon. Donk sa de keksoz pou mwan i donn nou en moman, tre oporten pour nou kapab reflesir ankor lo, ki mannyer nou bouze. So sa *Master Plan 2040*, ankor dan 18an i sipoze *due*. So *we have to* retir li lo *shelf* kot i ete, e nou komans sa konversasyon.

Zisteman dan semenn pase, de semenn pase, mon krwar Mr Speaker, *Planning Authority* in komans en seri konsiltasyon, avek bann distrik. Mwan mon ti ganny sans ale, ti fer pour English River avek Mont Buxton ansanm, son zour avan ti pou Bel Air avek Saint Louis mon krwar. E partisipasyon piblik pa ti enpresyonan ditou.

So i sa bann keksoz koumsa ki nou piblik i bezwen sezi e partisipe. E demann nou lekor kote nou sitye nou ladan.

Parski dan nou devlopman nou pe koz lo aktivite komersyal e ekonomik. Ki nou anvii nou lavil i vini? Eski Victoria i reste *koman the hub*, kot tou lede keksoz ozordi letan nou pe koze la i deroule? E sa nou vwar i pe kree plizyer problem;- swa konzasyon trafik, swa i pe retard sa devlopman desantralizasyon. Ouswa i pe fer bann lespas ki dan lavil ser.

Donk i annan en refleksyon serye e irzan ki nou benzwen fer. An fet Sanmdi, non-bann zour in bat mwan en pa la, akoz sa bann konze piblik. Me mon krwar sa ti Mardi setadir yer - mon'n al en *hike* Barbarons, ou annan en zoli *trail* laba dan ou distrik Onorab William, atraver ou Mr Speaker, ki nou'n komans la pres kot *SPTC* in met son bann bis, mont anler dan bwa 2erdtan edmi nou'n marse. *It's a circular trail*, retonm anba, kot pres avek lotel Avani, kot i annan en pti lanmar la.

Prezan letan mon pe desann pou al rebran transpor anba, mon pe get tou sa later dan sa plato Barbarons. Setadir letan ou pe desann i pour ou kote gos. Lotel i ava lo ou kote drwat. Prezan mon pe dir be sertennman sa later i bezwen pour Leta, si pa pou prive. Me i ti ava lespas, pou kapab devlop en sant komersyal ou administrativ

pour en rezyon, rezyon was par egzanp. I annan sifizaman later ki si nou ti'n kalkile pou fer sa.

E non-selman la dan sa plato, me i annan lezot distrik osi ki sa ti kapab le ka. Anse Royale nou ti kapab trouv later pou fer sa, Baie Lazare mon mazin dan sa plato la lot *Greenways* ti ete. So i en size ki nou koman en Nasyon nou bezwen, mazin lo la, seryezman e demande ki tou kous sosyete i partisipe, me pli enportan gran popilasyon.

Parski sa zafer *master plan* en lavil la, i pa zis Victoria ki pe mazin sa. Tou bann lavil dan lemond, normalman zot annan zot *master plan*. Be solman lekel ki vin *the key person*, pou asir ki sa i ganny delivre?

E kekfwa en lot *blessing* ankor ki pe vini - nou'n vwar poudir i annan sa Prozedlwa ki'n ganny gazete konsernan Eleksyon Mer Lavil. Be alor enn fwa ki en Mer i ava ganny elekte, kekfwa prezan i ava annan plis *power* pour li vin sa dimoun ki a *champion* sa bann devlopman.

La kekfwa Mer Lavil, i en pe senbolik, i en pe napa pouvwar i anba *Minister Local Government*. So kekfwa tou sa ou vwar sa bann keksoz enn ler, i tonm byen. E kekfwa nou dan en moman, en moman apropiye pour nou sezi, e

kalkile. E mon apresye ki ou'n met sa bann target, ou'n donn 9 pwen. E sertenman sa i direksyon ki nou bezwen al ladan. Nou bezwen rode, ki bann priyorite ki nou koman ene Nasyon nou ti a kontan vwar, nou lavil i adopte? Ki bann target ki nou mete?

Prezan dan sa frazilite nou'n Pti Leta Zil, nou bezwen mazin prezervasyon kiltir, leritaz. Akoz ki kalite devlopman, kalite lenfrastriktir, ki kantite lespas ki nou kite dan lavil pour devlopman lanvironnman. Par egzanz enn bann deba kontroversyal ki ti annan, ki ti pou arive avek Lari i apel Rue de Possession konmela. Avan sa ti Lari Francis Rachel ki zot i le met en lot *lane*.

Bann dimoun enkli mwan, nou'n dir non, non-*Esplanades* i telman zoli kit li avek son bann pye dibwa, pa bezwen touse. E mon swete ki nou pa zanmen ranvers sa desizyon. Donk mon pour siport sa Mosyon e solman *what's next?*

Mon krwar mwan poudir i merit annan en, annou apel li en *task force* nasyonal, ki i annan tou bann *stakeholders* konsernen depi Lotorite Plan, bann Minister konsernen, bann Lotorite Distrik ki bord avek Victoria, ki nou pa bezwen zwenn tou le semenn, ouswa tou le mwan.

Me solman detanzaot, pour nou kapab swiv bann progre e pou regarde ki mannyer sa *master plan*, i pe ganny enplimante atraver enn;- bann Polisi Gouvernman. Dezyenmman dan Bidze, eski pe annan bann alokasyon bidzeter pe fer arive bann keksoz ki poudir pou arive? Lekel antite ki sipoze responsab pour tel keksoz? Ki zistans in arive? Ki son target final?

Mon krwar alor koumsa, i pa ava vin en zafer ki ler in ariv la nou annan 18 mwan, i reste avan i reste 18an avan 2040, ki nou pa ava esper *at the last minute* apre poudir be non nou pa'n kapab enplimant sa alor nou bezwen *postpone* li pour 2050.

Donk mon sa ki mon ti ava kontan dir, se ki i annan en *task force* nasyonal ki ganny kree, avek tou bann parti konsernen pou asir *follow-up* sa *master plan*. Setadir si nou bezwen re-vizit li pou vwar si i annan keksoz ki nou merit sanze, ouswa i annan keksoz ki manke.

Kote son sours finansman pou sorti? Lekel dimoun ki dwatet fer kwa? Kwa keksoz ki akseptab pou fer ouswa pa fer. E mon pa vwar rezon akoz Victoria parey lezot gran lavil dan lemonn, i pa kapab egzekit en plan ki'n deza met an aplikasyon. Sa ki

mon ti ava kontan partaze lo sa Mosyon Mr Speaker. Mersi.

MR SPEAKER

Mersi. Mersi Onorab mon a donn laparol Onorab Romain.

HON GEORGES ROMAIN

Mersi Mr Speaker. Bonn apre midi Mr Speaker. Bonn apre midi tou koleg Onorab e tou dimoun a lekout.

Mr Speaker mersi pou donn mwan laparol pou kontribye lo sa Mosyon, aköz mon santi Mosyon anmennen par Onorab William, i enn ki kapab donn Gouvernman e osi lezot antite lide lo la fason pou amelyor lefikasite bann aktivite komersyal, ki pe ganny ofer otour nou lavil Victoria.

Parey nou tou nou konnen, ki Victoria i parmi enn bann pli pti kapital dan lemonn, e alor i enportan ki sa landrwa i enn ki donn en servis ki efikas. Nou konnen ki *parking* i en gro problem e trafik dan lavil i fer bokou konsesyon e alor si nou ti kapab revwar fason donn servis sorti kot sa bann *service providers*, sa ti pou en eleman ki tre favorab.

Mr Speaker parey nou tou nou konnen, la mazorite servis ki biro Gouvernman i ofer, i ganny trouve dan sant lavil. Dan bokou lenstans ki dimoun pe rod en servis i vwar

li pe al dan laliny e i annan landrwa kot dimoun i esper en kantite letan pou kapab ganny sa servis. E enn bann lezot set aköz sa servis i ganny trouve zis dan lavil.

E nou konnen ki si nou desantraliz enn de sa bann servis, i pou ede deblok akse dimoun a kapab rod sa servis o nivo rezyonnal e kot i ava tir en pe presyon lo zis en pwen kot sa servis ti pe ganny ofer. I annan landrwa ki frenm zot lofis midi, ki en letan kot travayer i profite pou al rod en servis. E aköz ban ler ouver ki pa fleksib, bokou i bezwen rod fason pou sorti dan zot ler travay pou kapab ganny sa servis.

Pou mwan Mr Speaker dan sa monn *digital* ek teknolozi ki nou pe viv ladan, i nesese ki nou ankouraz tou bann biro Gouvernman e osi bann letablisman komersyal, pou servi loportinite pou ofer en servis *online*;- en platform kot dimoun i a kapab enterakte direktteman, fer zot laplikasyon lo bann *website*, ranpli zot from e fer soumisyon *online* e menm fer zot peyman. Sa i a ede pou ogmant lefikasite pou tou dimoun e tir fristrasyon kot pa nesese.

Mr Speaker mon konnen ki bokou in abitye avek papye e vwar li pli fasil e petet zot pli asire ler zot sa keksoz i ganny

fizikman fer devan zot. Me nou bezwen komans bouze, pou anmenn sa transformasyon teknoloji dan pou kwen nou bann servis. E se la ki nou pou vwar ki mannyer sa pou anmenn lefikasite dan sistenm, fer keksoz bouz pli vit e fer lavi pli fasil.

Mr Speaker e la mon pou fer en demann avek bann *service providers*, pou osi mazine anmenn kreol koman en opsyon langaz ki kapab ganny servi, an vi ki i annan dimoun ki pou pli konpran son Kreol. La Mr Speaker en lot laspe servis se kot dimoun ler pe vin fer en peyman i annan landrwa ki dir ki zot ki 2er ou menm 3er sot lakes in fini fermen. E alor ou bezwen vin demen.

Dir mwan Mr Speaker, ki landrwa biznes kot ou pou ale ki ou pou fer en peyman, kot zot pou refize e dir ou pas demen? En keksoz ki mon demande, set aköz nou napa en pe plis fleksibilite pou servi en manm piblik, ler in fini ariv devan ou espesyalman si sa dimoun i sorti lwen. Annou pran en pe plis konsiderasyon pou ed nou frer.

Mr Speaker ler nou vwar par egzanzp *cruise ship* i vin dan Por Victoria e tou laboutik 4er pe frenmen. Aköz nou pa kapab re entrodwir *night shopping* e plis aktivite ki met lanbyans dan nou kapital, ki

ava ede pou Seselwa ganny plis loportinite dan zot biznes?

Mr Speaker, enn bann keksoz ki nou vwar dan lavil ki poz serten danze pou motoris e menm pyeton, se bann gran veikil ki pe transport bann *container* - parey loter Mosyon in fer sorti pli boner - ki nou vwar lo semen dan bann moman *peak hours*.

Mon lopinyon se ki sa bann transpor ti merit ganny en restriksyon e mouvman i merit reste swa lo granmaten, ouswa an deor *peak hours*. Sa i a ede pou redwir risk, amelyor mouvman trafik e redwir konsesyon dan sa bann letan.

Mr Speaker mon krwar mouvman trafik dan lavil enner i en gran problemm. Souvandfwa nou vwar gard dan bann *peak hours* pe esey deblok trafik, me si nou ti annan plis *traffic lights* ki byen kordinen, sa ti pou ede retir en pe bann blokaz ki nou vwar dan lavil e amelyor trafik signifkaman.

Petet la nou devret revwar sa nide pou redwir bann veikil ki pe ante dan lavil. Dan lepase ti annan en lesej kot zot ti ofer transpor ki park an deor lavil e servi en *free shuttle*, ki ti ganny ofer pou transport dimoun dan lavil. Be Mr Speaker sa pa'n marse, aköz ler ou ti pe kit ou transpor deryer ti napa okenn

sekirite an plas pou sofgard ou veikil.

E alor petet en tel nide kot i ava annan en fasilite *indoor parking*, kot drayver i ava peye e sa landrwa i annan sekirite, sa i ava donn lasirans pou drayver servi sa opsyon.

Mr Speaker parey bokou i get Sesel koman en sanpyon dan lanvironnman, nou osi bezwen demontre sa valer dan nou lavil. Bokou de fwa nou vwar bokou salte tel ki bann bwat *take away* e ganny zete dan sant lavil. Menm dan nou bazar e an deor i annan lespas pou netwaye e met li lo en pli o nivo lizyenn. Sa i merit en louvraz kontinyel e kot bann touris e menm nou Seselwa, a kapab vwar li dan en landrwa pli prop e nou ava fyer pou sa.

Kwa ki pe anpes nou pran nou responsabilite pou gard sa lapropte dan lavil? Kwa ki anpes nou pou pran nou responsabilite koman en endividi pou pa zet salte e polye lanvironnman dan lavil? Kwa ki pe anpes nou pran nou responsabilite pou pa zet salte dan larivyer ki pas dan lavil?

E la mon bezwen demande, eski annan kek travay ki'n ganny fer pou vwar si i annan ase bin dan lavil, ki probableman i a ede pou redwir bann salte? Eski bann antite ki annan responsabilite pou netway lavil, eski zot pe fer sa travay byen? Tousala

nou bezwen demande Mr Speaker. Annou mazine ki i annan bokou lisyen eran dan lavil ki ede osi pou trenn salte partou. E la en travay i merit ganny fer pou retir sa bann lisyen dan lavil, akoz i pa donn en bon limaz.

Pou terminen Mr Speaker sa ki nou devret pe targete, se vwar en lavil ki son servis i vremen efikas mouvman trafik i bon lanvironnman i prop ek en lavil ki vivan. Mon servi sa loportinite pou remersi bann ki'n deza pe donn en koudmen pou kontinyen anbelir nou lavil. Sa ki nou pe devret targete se ki tou lorganizasyon en endividi ki donn en servis dan nou lavil, i zwe zot rol pou anmenn sa transformasyon ki nou pe rode.

Tou zefor i enportan e nou pa devret pe zis esper Gouvernman vin avek en solisyon. Responsabilite i lo nou tou, pou asire ki nou kapital i kontinyen bouze dan en bon direksyon e kot nou a kapab fyer pou apel li nou kapital. Mersi Mr Speaker.

MR SPEAKER

Mersi Onorab. Mon ava donn laparol Onorab Labonte.

HON ANDY LABONTE

Mersi Mr Speaker. Bonn apre midi Mr Speaker. Tou manm koleg Onorab e tou dimoun ki

a lekout. Mr Speaker *comme d'habitude* mon pa pou long, me selman mon krwar ki i enportan ki mon fer mon lentervansyon lo en tel Mosyon ki enportan.

Akoz mwan koman en Manm ki'n ganny elekte ki reprezant en distrik ki form parti *ADV*, ki boner Onorab Depite Speaker in koz lo la. *ADV* i vedir lasosyasyon pou bann distrik ki from parti Victoria.

Mon pou siport sa Mosyon anmennen par Onorab William. E enn bann rezon prensipal aköz mon pou siport sa Mosyon i aköz sa Mosyon pe fer referans a nou Manifesto ki *LDS* ti prezant avek pep Seselwa dan sa dernyen eleksyon Oktob 2022.

Mr Speaker paz 32 e 33 i koz lo en pli bon striktir pou mye devlop lenfrastriktir nou pei e mwan mon santi ki sa Mosyon i osi annan keksoz pou fer avek lenfrastriktir dan nou pei.

E ankor Mr Speaker mon pou oblize felisit L'Egzekitiv pou kontinyen gard son promes e pou promes nou Parti *LDS* anver pep Seselwa, ki ti met tou zot konfyans dan nou parti. Mon anvi reasir pep Seselwa ki nou Parti *LDS* i reste touzour premyerman; konekte avek Lepep. dezyenmman; ekout Lepep e trwazyenmman, pran bann

desizyon ki dan faver pep Seselwa.

E en konsey pou pep Seselwa e lazenes Seselwa an zeneral, pa krwar sa ki serten oportinis e endividi ki pa vot lo Bidze, apre dir ki zot pe siport trezyenm mwan saler. Mr Speaker atraver ou, mon anvi dir avek Onorab Cosgrow mwan mon ti vot lo Bidze e ler mon vot lo Bidze savedir mon siport trezyenm mwan saler. Me ou, ou pa ti vot lo la alor ou napa drwa koz lo la!

E pou al pli lwen apre nou war bann aktivis i vin lo televizyon i koz katar, sa ki mon apel katar. E sa se larealite. E larealite se ki *a new US* i dezespere e i pa oule ki Seselwa i vwar zot lanbisyon. Parey en proverb ki dir "en move mesaz i anmenn maler, me en mesaz fidel i anmenn gerizon."

Mr Speaker gerizon se Gouvernman *LDS* ki pe anmennen pou pep Seselwa, atraver sa transformasyon apre ki sa sanzman ki ti arive an Oktob 2022. E pou retourn lo sa Mosyon Mr Speaker ...

MR SPEAKER

Mersi.

HON ANDY LABONTE

Atraver striktir ki *SIA*, (*Seychelles Infrastructure Agency*) ki'n ganny koz lo la pli boner se sa bann tel desizyon

ki pou ede byen striktir bann devlopman, pa zis dan lavil Victoria, me dan pei an zeneral. E ankor malgre lot kote pa pou kontan, mon pou bezwen felisit nou CEO Mr Jitesh Shah, ki pe fer en bon travay. Mon pou dir li kontinyen fer sa bon travay, e atraver sa Mosyon nou pe siporte e pou meyer desarz sa responsabilite an faver nou pei e ou popilasyon.

Mr Speaker bokou in ganny dir. E en keksoz osi ki enportan se ki Onorab Romain in koz lo la, se ki bann striktir gouvènmantal ensi byen ki prive, nou vwar ki plizyer bann biznes, bann servis esansyel, zot tou zot fer menm ler e sirtou midi ler ki dimoun i ganny *lunch*.

E nou parey nou bann Manm Onorab nou toultan travay. Nou travay ki nou kapab dir 24 lo 24. Akoz nou telefonn i sonnen nou pran, e ni bezwen kontinyen ganny kontak ki rann repons. E ler sa bann lofis i fermen, so nou pa kapab donn repons nou kontan ki vreman anvi e ki ti vot pou en sanzman.

Mr Speaker ankor enn fwa mon pou dir pep Seselwa sa sanzman ki nou ti fer an Oktob 2022, i enn ki enportan. E mon pou dir ou kontinyen selebre e ou annan tou rezon pou selebre!

Avek sa de mo mon pou siport sa Mosyon. Mersi Mr Speaker.

MR SPEAKER

Mersi. Mon a pran Onorab Roucou.

HON MICHEL ROUCOU

Mersi Mr Speaker. Bonn apre midi a tous. Mr Speaker mon pis tou mon pa pou long lo sa Mosyon anmennen par Onorab William. Mon anvi zis tous lo sa detrwa pti pwen ki li menm li Onorab William in tous lo la.

Mr Speaker apre midi dan nou *lunchtime*, mon pran en pti moman letan pou mon al en pti kou anvil pou mon fer en pti vitre tournen. E en problem ki mon war nou rankontre se ki i annan nou laboutik i fermen. E parey zot konnen se ki ou bezwen retournen avan 2er pou nou retourn lo travay, zis 2er ler ou pe get lo sa bann laboutik sanmenm ler ki zot, zot pe ouver.

E nou'n, nou pe demande sa i bann keksoz ki nou panse ki bann boutikye - bann ki dan biznes zot bezwen pran li en pti pe o serye, akoz dan ler travay pa tou dimoun ki annan sa letan pou zot pran sa letan, pou al rod serten keksoz ki petet zot ti bezwen anvil.

Mr Speaker apre osi tou lo kote sa Mosyon en pti pe lo

kote trafik li menm li. Parey zot konnen e mon reprezant distrik Mont Fleuri e nou, nou distrik ki baliz avek lavil. Li menm nou vwar se ki mon ganny afekte avek sa probleman trafik aköz mazorite Lepep Seselwa zot desann zot landrwa travay i anvil aköz laplipar biro i la.

E la mon pou war kot sa i kre sa konzasyon trafik ki afekte nou distrik e nou, nou panse se ki si ti annan desantralizasyon menm lo kote bann biro Gouvernman menm prive, petet sa ti ava kapab ede. Aköz nou'n vwar poudir Gouvernman in fer son mye dan lepase pou agrandi semen menm azout bann *lane* avek ki sa *in the end* apre i kapab ede.

E ler mon pe koz lo kote trafik Mr Speaker ennler dan bomaten nou menm nou drayver nou pa korpore ek kanmarad. Sirtou kot bann *roundabout* la nou war poudir i annan bann landrwa kot drayver si i war poudir en lot transpor pe al dan en lot direksyon, zot pa korpor aköz zot vini zot tant pou bloke dan plas donn semenn pou sa enn ki pe al dan sa lot direksyon.

E osi ler mon pe koz lo kote trafik li menm Mr Speaker i annan bann drayver ki dan bomaten swa zot vin *drop off* enn zot manm fanmir kot la ler zot pe *drop off* zot

pran sitan bokou letan. Kot lanmenm ler zot pou get dan lizye, zot pou anbrase, zot pou gete si vre i pe antre dan biro.

E sa i tant pou kre sa konzasyon trafik li menm li e kot la nou pe demande ki petet bann zofisye Trafik ki la zot kapab ranforsi en pti pe plis lo kote sa zafer kot dimoun i park bann landrwa, kot i ede pou kre sa konzasyon trafik.

Mr Speaker en lot pwenn ankor ki Onorab William in tous lo la. Nou'n war poudir dan bann letan kot ti annan *COVID* li menm li bokou bann landrwa ti frenmen e laplipar travayer ri pe *work from home*. Onorab Henrie in tous en pti pe lo la kot nou war poudir aprezan nou tou nou'n bliye. Kot keksoz pe retourn parey i ti ete oparavan.

E petet sa bann alternativ ki nou ti pran dan sa bann letan petet i ti a kapab ede lo kote letan li menm li ouswa lo kote bann ler travay ki dimoun i antre travay ouswa fini travay li menm li. E osi petet sa ti ava kapab soulaz en pti pe an term mouvman dan semen.

E osi en pli gro probleman ankor ki nou war dan nou lavil Mr Speaker, se ki i annan bokou biznes ki sirtou laboutik li menm li ouswa bann biro - me selman ler ou pe al dan kek biro oubyen kek laboutik, napa en sou *parking*.

Sa osi i ede kot ou kapab war kot dimoun i park en pti pe partou.

E nou, nou pe gete se ki si i annan sa desantralizasyon petet sa i ava ede. E osi bann departman, oubyen bann biro, oubyen bann lofis, si zot ti kapab met an plas serten fason kominikasyon dan plas en dimoun i pou desann pou li vin dan serten lofis, ti i annan en dimoun petet ti ava kit sa kominikasyon avek zot.

Dan plas zot pou desann zis pou vin rod sis en senp pti klarifikasyon petet ti ava ede dizon zis en legzanp: en dimoun i fer serten laplikasyon dan kek biro i ekspekte poudir dan en serten dele letan i annan biro in dir ek li koumsa be madanm oubyen msye nou pou pran kontak avek ou.

Dizon ankor dan en semenn dan sa semen i pa ganny en larepons i war li avek serten fristrasyon kot i bezwen desann vini vin asize pou espere pou li ganny sa serten lenformasyon.

Menm souvandfwa nou war kot sa lenformasyon ki petet zot ti'n devret pe gannyen zot pa pe gannyen akoz zot ankor pe esper serten desizyon. Si petet ti annan sa kominikasyon ant bann dimoun ki travay dan diferan seksyon *be it* Gouvernman oubyen prive, sa ti ava ede pou

anpese ki bann dimoun li menm li i vin fer ou war zot vin depans bokou letan dan lavil.

Mr Speaker, mon osi mon akey sa lanons kot bann labank in reouver Sanmdi. Kot sa i kapab ede menm pou tir en pti pe sa presyon dan lasemenn, kot bann dimoun ki petet i bizi kot pe fer keksoz vitman pou zot kapab desann dan lavil li menm li pou zot vin fer an tranzaksyon.

Espesyalman nou bann dimoun aze ki souvandfwa laplipar zot, nou konnen poudir zot vey bann letan ki napa bokou trafik li menm li, ki sa i plifere dan Sanmdi pou zot desann al fer zot pti *shopping*.

E la ankor Mr Speaker bokou in koz en pti pe lo bann gro transpor parey bann transpor ki anmenn *container*, ler ki zot pas dan semen. *Star* nou ti war poudir zot ti'n komans en nouvo *schedule* kot zot komans granmaten, be nou pa konnen akoz la aprezan nou war zot pe retourn ankor en pti pe bann ler, kot sa i ede pou fer serten problemn trafik. Akoz ler zot pe fer zot louvraz zot bezwen park en serten landrwa kot napa *parking facilities* pou zot.

Mr Speaker ankor en lot pwen se ki mwan annefe mon ti a voudre tous lo sa Mosyon Onorab William, i sete ler ou pe get en pti pe fason ki

bann lenfrastriktir i ete, nou pe war poudir i annan bokou *improvement* an term lo kote semen.

Plizyer opsyon i annan, plizyer opsyon i annan, be selman petet parey mon'n dir oparavan petet atraver *planning*, annou vwar poudir se ki sak batiman parey *Maison de Colette* i annan kot si ou pe vin dan serten lofis, ou kapab war poudir se ki i annan son *park and facilities* laba, ki ou peye. E osi petet met en pti pe plis dan bann laboutik bann kart, ki ou kapab park bann landrwa kot i peye, ki souvandfwa ou pa war ou pe vire dan lavil pou ou kapab al rod enn sa.

Mr Speaker sa Mosyon i vremen enportan. E osi nou bezwen revwar, eski i annan serten fasilite ki deza dan lavil li menm li, dan santral lavil, eski pa'n ler pou nou bouz zot serten landrwa ki nou krwar i ava kapab ede li osi tou pou degaz en pti pe lasasen dan lavil?

Zis parey lo kote nou bazar li menm li, eski nou war poudir i annan plizyer bazar dan distrik, be selman bokou dimoun i war li en pti pe pli meyer zot kontan vin bazar kot i ete la.

Be selman eski i pa'n ariv sa ler pou nou vwar eski si nou kapab ganny en landrwa kot petet nou war poudir dan

granmaten peser i bezwen saroy zot pwason petet en landrwa en pti pe pli pre. Kot la zot desarz zot pwason en dimoun i vini i aste lanmenm la.

E ler nou pe koz an term bann travayer trafik li menm li mou war poudir Lapolis i fer en bout. E osi i annan seksyon lo kote transpor osi ki zot pe fer zot bout. Ennler en pti pe mon demann mon lekor en pti pe fason ki zot stasyonnen pou zot kapab *manage* trafik.

Ennler ou kapab pase dizon ou desann la kot *Barrel* sa bout la zis dan larantre pou ou la Bel Air, i annan en zofisye la ki vremen ideal. Ou war li sitan byen. Apre ler ou pou desann en pti pe pli ba, ler ou desann kot an kitan *Barrel* la, la i annan en lot zofisye. Be selman apre ler ou ariv en pti pe pli devan kot sa *zebra crossing* la ou war poudir i annan en lot zofisye ki pe ede pou dimoun koup semen.

Me selman an term kot i annan landrwa kot ou bezwen en zofisye pou ede an term trafik ou pa pe war, petet sa osi ti kapab ganny revwar.

Mr Speaker mon dernyen pwen ki mon pou tous lo la an vi ki Mont Fleuri i en distrik ki baliz avek lavil, mon ti ganny sans fer en vizit avek Departman Transpor kot zot in eksplik nou en pti pe zot plan en term kot laboutik

Weeling la i zis vizavi avek semen Mr Jumeau, kot la pou annan sa nouvo *roundabout* la.

Yer swar ler mon ti pe get reportaz lo televizyon, Mont Fleuri i ganny nonmen en distrik kot i annan en pti pe plis aksidan. E mon mazine la avek sa nouvo *roundabout* ki pou annan la, petet sa i ava ede pou fer desann enn pti pe sa zafer aksidan la.

E osi nou pe war poudir semen pou agrandi parey bann dimoun pe vwar *bus shelter* pe ganny bouze. E i pou annan son *lane* ki pou ede ki pou bann lekol kapab antre kot zot sipoze ale ki sa i a kapab soulaz en pti pe sa problem trafik dan nou distrik.

E osi mon pou siport sa *overhead bridge*, mon krwar i an en an mi ki'n koz lo la. Mon'n koz detrwa fwa mon kapab ganny en dyalog avek *CEO SLTA* lo la, kot zot ti'n menm war zot ti'n met dan Mosyon en serten letan kot zot ti pe rod en dimoun pou konsiltan pou donn zot en pti pe sa nide ki mannyer.

Mon mazine poudir i en plan ki deza lo latab Mr Speaker ki i kapab ede demen akoz mon war poudir Bois de Rose i annan bokou dimoun ki zot pe koup semen bann landrwa kot pa merite. Sirtou bann madanm ennler mon en

pti pe per pou zot, ler mon war zot pe koup semen ek vites transpor ki vini, i kapab koz zot kot zot menm perdi zot lavi.

Mr Speaker mwan mon pou donn mon sipor lo kote sa Mosyon. Pou mwan fini pou mon dir ek Onorab William mersi pou sa Mosyon e kont lo mwan. Mersi.

MR SPEAKER

Mersi Onorab. Bon nou a pran en poz la. Nou a rebran deba 4er 5.

(BREAK)

MR SPEAKER

Bon nou a rebran. Mon a termin deba avek bann manm ki'n demann laparol e nou a kapab fini dan letan reglemanter. Mon ava apel Onorab Loze.

HON JOHAN LOZE

Mersi Mr Speaker. Mr Speaker mon pa pou long e mon sertenman pou napa 9 pwen mon pou plito konsantre otour en size. Me selman zis an pasan Mr Speaker, mon anvi not en keksoz ki tanzantan i retournen dan Lasanble. E ozordi si mon pou swiv lozik ki'n ganny avanse se ki letan ou pou vot lo *Third Reading* e mon pou dir klerman *Third Reading Bidze* ou en katar. Sa ki mon'n ganny, ki mon'n

tande ki mon *walk away from* sa deba boner.

Akoz sa ki'n ganny dir Mr Speaker e mon krwar ou pou agree avek mwan Mr Speaker ki Onorab Wavel Ramkalawan in dan Lasanble pandan en trantenn lannen e zanmen in vot lo *Third Reading* Bidze a leksepsyon en fwa kot i ti'n al negosye logmantasyon son prop saler.

So oule dir mwan konmsi nou'n elekte en katar par lozik ki Onorab in fer la boner ler ou pa vot lo *Third Reading* - ou en katar koman Prezidan pei? Mon poz sa avek Onorab Labonte koman en kestyon Mr Speaker aköz le ou pa vot lo *Third Reading* Bidze ou en katar.

E zot, zot in toultan konn eksplik sa zot, poudir zot vot lo tou *heads*.

MR SPEAKER

Annou pa al pli lwen lo apelasyon Prezidan. Ou'n fer ou pwen.

HON JOHAN LOZE

Non napa lo apelasyon. Mon'n fini avek mon'n poz li koman en kestyon Mr Speaker.

MR SPEAKER

Tre byen. Annou kontinyen. Mersi.

HON JOHAN LOZE

Selman mon pe dir zot in toultan konn eksplik zot vot ki zot vot lo tou *heads*, lo tou Bidze *heads* ki vini. Me zot rezerv zot vot lo *Third Reading* Bidze ki menm pratik ki nou, nou pe fer. Mersi Mr Speaker.

Mr Speaker resaman mon ti al kot en laboutik elektronik, mon ti pe rod en *earphone* e letan mon ti dan sa laboutik mon ti zwenn, ti annan 2 zenn *homme* mon krwar zot travay la tou le de. E prezan ler mon ti'n fini rod mon *earphone*, mon ti zis poz en kestyon sa enn ki lo lakes la. Mon ti demann li si i kapab enport nenport ki lekipman elektronik. In dir mwan wi zot fer li *on demand* e mon ti demann li mon'n dir li mon ti pe rod en lekipman partikilye mon ti pe rode - mon pe rod en *cryptocurrency hardware wallet* enn an partikilye mark *Ledger*.

Prezan li deswit i vire i dir mwan zot apel sa en *cold storage unit* mon krwar. Mon dir li wi sanmenm, prezan sa garson i dir mwan mon annan enn i pa *Ledger* selman mon annan enn pou vann si oule si ou enterese mon annan enn dan lakour. Prezan mon dir li *I hope* i pa en *seeded wallet* i dir mwan non pa ankor dekaste i ankor sele dan son *package*.

Ok mon kontrakte ou par *WhatsApp* mon a fer ou ganny pri. Son zanmi i o bor li prezan

i pe dir mwan be li osi i annan *wallet* e prezan i dir mwan i annan en pe *tether* pou li vann. *Tether* i *USDT* en *stable crypto coin*. I dir mwan i annan en pe *tether* pou vann si mon enterese pou aste;- nou'n koz lo *crypto space* nou'n koz lo *cryptocurrency proto cause*, e mon'n sorti dan sa konversasyon en pti pe eblouir.

Enn sa zenn *homme* i ti pe asize avek son *cask scooter very young man* e en keksoz enteresan ki i ti dir mwan i dir mwan be Onorab mwan ler mon *travel*, mon pa al ek Dolar mwan. Mon al avek mon *cold storage* ek mon *USDT* lo la, mwan zanmen mon *travel* ek larzan letan mon al *Dubai*, mon toultan al ek *crypto currency*.

Mon'n al lo la aköz i annan en kestyon zot ti poz mwan. Enn ti demann mwan i dir mon be Onorab kan eski nou pou *digitize* Sesel? En bon kestyon kan eski nou pou *digitize* Sesel? E i enteresan ozordi dan deba ki pe leve e pou realize ki nou osi anndan, nou *light years* par deryer lazenes Seselwa an se moman. E mon pe dir sa koman en zom 50an ki *fully immersed in the digital space*. Be nou par deryer zot.

Nou lazenes zot annan demann, zot bann bezwen, zot bann laspirasyon, i vreman

lwen avek sa ki nou isi anndan nou pe menm *entertain* pou avans devan. So Mosyon mon krwar i pe al dan bon direksyon. Be tan ki nou pa fer sa ki sa bann zenn pe demande pou nimeriz Sesel, pou komans *provide* en maksimonm *possible service online*, sirtou sa ki annan tou sa ki annan pou fer avek peyman e menm nou bezwen koman bouz dan direksyon Sesel dimoun ki pa anvi leve al dan en laboutik.

Dimoun ki pa anvi sorti desann *STC* or *whatever* laboutik kot i kapab fer son *shopping online*. E ganny son *shopping delivered*, swa lo en *scooter* swa lo *by whatever means*. Ki ava ede pou kre sa desantralizasyon e tir sa konsantrasyon trafik e sa volim mouvman dan lavil ki Onorab pe reserse.

E nimerasyon Sesel, i pou ofer solisyon dan plis domenn ki nou menm pe mazinez ozordi avek sa Mosyon. Solman si ti annan en sizesyon ki mon ti pou fer se ki nou koman Lasanble nou koman senserman egzamin bann Bidze proze e Prozedlwa ki ganny anmennen par sirtou *DICT*, e tou sa ki annan pou fer avek telekominikasyon dan nou pei.

E ti a byen si nou kapab *further* nou resers, pou nou menm nou al rode eksplere e

serse kwa ki annan *available* dan sa monn ozordi. E kwa ki kapab ganny lokalize domestike dan nou pei ki kapab ganny servi ki ava ede avans bann azanda parey ki Onorab pwen serse atraver son Mosyon.

Be mwan mon santi ki solisyon avan nou al fer, tou sa ki mon'n dir la egzamin Bidze *whatever* ki bann Minister i anmennen, mon krwar nou bezwen koz ek nou zenn. Nou bezwen sorti e koz avek lazenes Seselwa lo sa bann size ki posibleman i konplike pou nou. E familyariz nou lekor avek sa lemonn e lavites lavi a ki zot, zot pe viv e sa lemonn ki zot, zot imerze ladan.

Nou bezwen sers pou konpran si nou anvi anmenn Lezislasyon propozisyon ki pou benefisyé zot. Akoz tan ki nou pa emerzan nou dan sa lemonn ki zot, zot ladan nou posib kontinyen anmenn bann propoz ki zot, zot pou kontinyen lazenes i kontinyen santi li dekonekte avek. So sa i mon propozisyon. Apre si mon pa tronpe Onorab Aglae ti anmenn en Mosyon dan Sizyenm Lasanble konsernan ler travay.

Mon pe zis *wonder* ki mannyer *LDS* ti vote lo la zot mon pa tro rapel. Mon a demann Aglae *at some point* i pa en keksoz ki vreman

enportan la be selman ti deza annan sa.

Apre an terminan Mr Speaker mon ti promet ou mon pa ti pou long e mon pa pou sers tro bokou kontrovers. Onorab in lev kestyon poudir zot pa sa lafors ki pe avans son lekor koman sel opsyon pou Sesel, zot fer tout opsyon ki byen, mon kontan.

Be Onorab mwan mon envit ou Dimans le 6 vini Anse Boileau e vin gete si nou pa sel opsyon pou Sesel e pou a konfirman pou ou menm e mon envit tou dimoun vini.

E la tou dimoun a nobou konfirman poudir se vre *United Seychelles* ki sel opsyon pou Sesel! Mersi Mr Speaker.

(APPLAUSE)

MR SPEAKER

Mersi. Onorab Samynadin.

HON KELLY SAMYNADIN

Mersi Mr Speaker. Bonn apre midi tou mon bann koleg Onorab e tou dimoun a lekout. Mr Speaker diferan antite gouvènmantal ensi ki prive, i bezwen antreprann bann aktivite komersyal afen ki zot ava kapab akimil reveni e ki pei i kapab bouze ekonomikman.

E transportasyon i enn bann eleman kle ki nou'n bezwen pran kont pour ki sa i

kapab arive e byensir sa bann tranzaksyon i vin avek en kou ki parfwa i tre eleve. Me kestyon ki pe ganny poze atraver sa ki Mosyon anmennen par Onorab William, se dan ki fason ki bann diferan aktivite komersyal e gouvènmantal i ganny zere dan rezyon lavil Victoria?

Dapre en letid ki mon ti pe lir, letan ki mon ti pe prepar mon konvansyon lo sa Mosyon lo devlopman bann aktivite komersyal dan bann sant lavil, triyang komersyal *Athens* kapital Lagres, i sertifye ki dan nenport ki ka bann lavil konpri en lespas kot dimoun avek diferan konteks sosyal, ekonomik e politik i zwenn, antan ki zot en size persepsyon e leksperyans.

Bann lavil i bann landrwa kot nide i ganny partaze e osi kot mouvman dimoun i pran plas. Sak group sosyal ki ganny defini par serten karakteristik i tant pou ganny *polarize*. Setadir nou kapab apersevwar zot dan zot kwen respektif ki dan nou konteks lokal, i kapab ganny klase dapre zot bann lorizin kiltirel tel ki bann Endyen e bann azyatik. E dan Lari Bazar par egzantp i annan en kwen partikilye ki mon kapab apersevwar zot.

Mr Speaker an rezilta mouvman sa bann diferan

aktivite prive, ensi ki bann gouvènmantal, pour ki a lafen nou koman bann sitwayen, nou kapab akeyir bann diferan servis a ler, e dan en fason efikas plizyer lenkonvenyans i kapab ganny rankontre.

Premyerman nou bezwen pran kont poudir i annan sa ki nou pel *peak hours* - sa parti lazournen kot konzasyon trafik i lo son *peak*. E dan nou konteks Sesel sa i prensipalman ant 6er e 9er bomaten e ant 4er a 6er diswar.

Avek bokou mouvman dan sa bann ler, sa i anmenn bokou lenkonvenyans lo plizyer group dimoun, sirtou bann motoris, kot i kre bokou konsesyon aköz zot bezwen ariv dan lavil swa pou al travay, oubyen pou al ganny akse avek plizyer servis ki i pa desantralize.

Ti ava byen si bann ki kapab materyaliz zot bann diferan aktivite an deor *peak hours* pou komans mazin dan sa laliny. Mon oule rekonnèt ki *SEYPEC* par egzantp, i enn bann lakonpanyen ki fer sa kot desarzan gas ek *fuel* dan sant lavil i normalman ganny fer lo granmaten, oubyen apre ler avan ki sirkilasyon trafik i komans anpire. Mon panse ki petet i annan ankor lorganizasyon ki pe fer sa e mon egalman felisit zot pou sa.

Dezyenman Mr Speaker, parey bann Manm ki'n koze ava mwan in mansyonnen, sa size lanbouteyaz li menm i pli gran faktor par ki ban aktivite komersyal e gouvènmantal i ganny afekte e rankontre bokou retar.

Me par kont mon oule felisit Gouvènmant, pli prensipalman Minister transpor e SLTA pou bann travay ki zot pe fer pou alez sityasyon trafik, sirtou dan bann *peak hours* afen ki motoris avek kapab satisfè. Enn parmi plizyer rezon pou selebre lakonplisman sa Gouvènmant apre 2an.

E enn de landrwa ki enportan pou ganny fer resorti kot travay remarkab in ganny fer, se *dual carriageway* Providence dan rezyon *Intelvision* e tou resaman Bois De Rose kot en trwazyenm *lane* in ganny enstale. Mon swete ki demars pou met en katriyenm *lane* ava ganny fer tre byento, afen ki pa zis motoris ki pe al ver lavil ava benefisye me osi sa ki pe fer direksyon was ek sid.

Mr Speaker malgre ki semen Pointe Larue pa sitye dan rezyon lavil, mon santi ki i osi enportan pou Gouvènmant anplifye travay ki'n ganny planifye pou fer lo la, aköz sa distrik i osi ganny afekte avek konzèsyon trafik,

aköz zabitan Au Cap osi i ganny afekte. Dan bomaten e dan aswar e i egalman ankadre bann travayer Gouvènmant e prive e byensir bokou aktivite komersyal i ganny fer sirtou dan zanmerant *Airport*.

Avan mon terminen Mr Speaker mon ti a kontan demann avek bann diferan departman piblik pou revwar la fason ki zot fonksyonnen. Mon konnen ki avek *COVID-19* orer bokou travayer ki swa prive ou piblik ti sanze, kot bokou ti vwar zot pe travay dan lakour, oubyen zot bann ler travay ti vin pli fleksib.

E sa in ganny prouve koman en mwayen efektiv kot travayer pa bezwen desann lofis pou vin travay, me plito menm nivo prodiktivite ti pran plas dan lakour. Me par kont avek bann restriksyon ki'n ganny retire, serten sa bann sanzman i nepli evidan.

Sa i enn bann mezir ki ti'n kapab kontinyelman ganny adopte avek bi pou limit gaspiyaz resours, e dekouraz konsèsyon trafik sirtou dan rezyon lavil, oubyen dan bann lezot landrwa komersyal ou gouvènmantal.

Mr Speaker mon osi santi ki ler fonksyonman dan sekter piblik i osi en pwen konsern. Anba *Employment Act* spesifikman anba *conditions of employment* i

spesifye klerman anba *schedule 3(2)* e mon site; -

“The hours referred to in sub-regulation (1) include an aggregate of a half-hour’s break per day but do not include any longer break which may be given for meals or any other purpose”.

Plizyer fwa dan mon travay koman en reprezantan distrik, mon trouv mwan pe *call* bann diferan biro Gouvernman pou ganny akse ek servis pou en dimoun, e parfwa i arive ki sa i ant midi a 1er. E ki mon remarke se ki swa *operator* i pas ou dan sa lofis kot ou bezwen servis, e telefonn i zis sonnen oubyen i dir ou sa dimoun in al *lunch call* 1er.

Pou mwan Mr Speaker sa i pa normal, pandan 8erdtan travay 1erdtan i ganny *seized*. Mr Speaker mon pe demande ki parey sekter prive i fer, bann Departman Sekter Piblik i devret trouv bann alternatif, pour ki servis pa ganny sispann ant midi ek 1er par konsekan servis pa ganny donnen.

Tel ki parey en sistenm rotasyon i ganny met an plas, pour ki servis ou bann kliyan pa ganny enteronpe pandan sa 8erdtan ki ganny konsidere koman ler travay, e sa i ava an retour evit fristrasyon e anplifye prodiktivite.

Avek sa de mo Mr Speaker, mon pe anmenn mon sipor pou sa Mosyon. Mersi.

MR SPEAKER

Mersi Onorab. Aprezan Onorab Esparon.

HON REGINA ESPARON

Mersi Mr Speaker pou donn mwan sa loportinite, pou dir de mo lo sa Mosyon ki devan nou Lasanble. E parey loter Mosyon in fer resorti, sa Mosyon in ganny anmenn pou er Lotorite konsernen realize ki kantite lenkonvenyans ki annan en pe partou dan lavil dan lazournen, pou nenport endividi ki vin akse servis dan lavil.

Mr Speaker i vre ki sa bann sityasyon blokaz i anmenn avek li en defi ekonomi, kot dimoun ki pe *run* zot biznes i war zot pe perdi kantite letan swa par bann prosedir birokrasi, kot zot bezwen monte desann pou fer bann prosedir e sa ti a kapab ganny rezourd si nou ti annan en sistenm *e-governance* oubyen sistenm nimerik parey loter Mosyon in mansyonnen.

Mosyon pe osi demande, ki i annan serten azisteman ki ganny fer pou retir en pe sa bann fristrasyon e lenkonvenyans ki dimoun i rankontre. Annou fer en tourdorizon lo kwa ki kapab sanze pou benefis bann

dimoun ki annan biznes dan lavil.

Premye dilenn se sa zafer trafik bloke, ki tou dimoun i konplent, e parey nou'n tann bann Manm avan mwan, in koz lo la. E sa i ganny okazyonnen pou diferan rezon.

Mr Speaker annou gete kwa ki blok sirkilasyon trafik dan lavil. Dimoun deplizanpli i vin pli iresponsab e zot park an bonnavini aköz napa ase *parking* dan lavil. Ki menm lo laliny zonn kot i enterdi zot park. sa ki park dan bann landrwa kot mark *loading* ek *unloading*.

E ler sa enn ki annan biznes i vin *unload* son *parking* in fini ganny okipe, e la li an retour ki in pey son *pickup* pou *unload* i park kot i arive pou fer son traze. Aköz si li sa biznes i fer sa *pickup* ale ek son *load* i pou kout li en lot kours. E demen i pou pas sa lo konsonmater. Fodre ki dimoun i vin pli responsab.

De lot kote Mr Speaker, si li sa biznes i ti annan en swa pou li tir son marsandiz apre ler e kot i fer livrezon zot ler travay apartir 8er a 4er, petet la sa biznes ti ava swazir pou li tir son kargo apre 4er kot sirkilasyon trafik ti ava pli leze e i pa ti ava perdi letan.

E la Mr Speaker sa i anmenn mon lo mon dezyenn pwen ki en ler travay pli

fleksib. Parey loter Mosyon in fer resorti. Nou konnen ki ozordi bokou Departman Gouvernman i travay 8er 4er en model ki bokou lezot lenstitisyon malgre pa en Departman Gouvernman zot osi zot in adopte sa model pou diferan rezon. Pou *ease of doing business*, labank ler ki i ouver, *Licensing* ler ki i ouver, plizyer lezot servis i bezwen pou li fer marse son biznes, i dan lavil e fonksyonn dan sa letan 8er - 4er.

E nou pou osi konstate Mr Speaker ki ozordi bokou departman ki dil ek finans, i annan en ler ki zot aret pran peyman. E sa i neserer pou zot kapab ganny sifizaman letan pou zot rekonsilye zot kont, avan ki lazournen i terminen e avan ki zot fermen.

Nou osi annan bann biznes ki ti annan bann gro konminyon ki blok sirkilasyon e sirtou bann konminyon *containers* e bann gran *trailers*, ki pa zis blok trafik, e parfwa ganny bloke.

Legzanp tipik Mr Speaker - zis taler pandan letan *lunch* mon pe koz en *businessman* kot labank, ki ti pe montre son fristrasyon. I dir mwan Mr Speaker zis pran la kot *Marine Charter* kot sa *takeaway* Sinwan loto i park tou dilon lo sa laliny zonn pou zot aste zot *take away*. Kot zot blok konpletman en kote *lane*. E

dan sa menm letan bann *trailers* ki anmenn *container* lasose pe ale vini. E la i annan lenstans ki i bloke konpletman. E parfwa ou osi ganny konplet ki zot fer bokou *speed*, ki port danze lo lezot veikil e pyeton ki servi sa semen.

En lot *issue* Mr Speaker, kot sa i kapab anmenn en perd pou biznes e lekonomi, pran par egzant sa drayver *taxi* ki'n pran en kours lasose e son *schedule* i sere, akoz i annan en lot kours pou li fer e kliyan pe espere. I fristre le i war li pli deryer enn sa bann gro *trailers* ou en *container* konman i sorti lasose, i kapab war li pe perdi en lot kours letan i pe tat, tatonnen deryer sa bann gro *trailers*. E osi i kapab dezapwent sa kliyan ki pe esper li.

Mr Speaker ozordi i annan bokou Departman Gouvernman, ki ankor pe servi en kantite form pou ed en kliyan. Pran lo par egzant en leksplikasyon *ASP* - nou koz lo desantralizasyon. Ou bezwen ranpli en form dan distrik, apre sa form i bezwen ganny fizikman ganny anmennen kot lofis anvil.

Me si s ti'n ganny fer *digitally*, ti pou evite ki sa travayer i bezwen deplase ki sa fizikman pou li vin anmenn sa form e keksoz ki ti pou bouz pli vit e son larepons osi ti kapab

ganny anvoye atraver en *email*. Akoz parfwa kliyan i vin war ou ler ou sey *follow-up* ou ganny dir son form pa ankor desann.

Ler nou koz desantralizasyon sa i devret ganny fer lo son totalite non pa *piecemeal*, pour ki sa dimoun pa war li pe monte desann en bout servis i dan distrik e lot bout i danm lavil. Annou ankouraz plis peyman *online*. E ankouraz labank pou annan plis *ATM* dan bann distrik, pou fasilite lavi bann dimoun dan lakanpanyi akse ek zot larzan e osi fer zot *banking* san ki zot bezwen desann anvil.

Ozordi en legzanp desantralizasyon se sa i *Cable* avek *Airtel* pe ofer, ou kapab pey ou telefonn dan distrik e si in koupe ou reganny ou koneksyon deswit san ki ou bezwen vin anvil zis pou pey sa bil. E *PUC* osi pa ti a kapab ofer plis servis dan distrik ou lo nivo rezyon?

Mr Speaker letan mon pe koz lo bann lakonpanyen *telecom*, la osi Gouvernman i bezwen travay pres ek zot pou vwar si nou anvi promot *digitalization* e nou anvi bouz *digital* parey loter Mosyon pe antisipe, bann lakonpanyen i bezwen revwar kalite *speed internet* ki zot pe ofer ki pou permet sa arive.

E ki en kliyan pa war li pe gaspiy plis letan pou esper

server load pour ki sa dimoun ki pe servi li i ganny en form pou ranpli. Sa osi i pou tre enportan dan sa demars ver *digitalization*.

En lot size se *national planning* parey nou'n tann loter Mosyon dir, pou vwar ki fason nou *redesign* nou lavil pour ki napa bokou konzesyon. Par egzantp *design* landrwa pou bann gro transpor pase, otan ki posib zot evite pas dan lavil sirtou dan bann letan *peak hours*.

Annan bann *one-stop shop* pour ki dimoun i kapab akse plis ki en servis anba en twa, olye ki en servis deparpiye en pe partou. E la mon kontan sa nide *Government House* ki pou abrit plizoumwenn bann Minister e Departman Gouvernman.

Mr Speaker letan nou pe koz lo *flexible working hours*, sa laspe ler ki laboutik i ouver li osi i bezwen ganny konsidere. Mon rapel parey mon'n tande Onorab in mansyonnen taler, mon rapel dan lepase ti annan sa zafer *night shopping*, mon pa konnen si ozordi nou pou ankor kapab fer sa.

Annou ankouraze ki serten magazen les dir i komans travay dan 10er ou midi, e i reste ouver en pe pli tar pou donn loportinite dimoun ganny sa servis pli tar.

Olye ki tou dimoun pe taye dan sa bann letan *peak hours*.

Vi ki nou pe koz lo konzesyon Mr Speaker mon pou osi profite pou dir Lotorite get osi dan Providence, kot i annan sa lesey pou desantraliz enn de servis parey *Licensing*, labank, lasirans e menm pour lapas e lezot. Me selman ou fer fas ek trafik bloke, akoz kot i annan zis en *lane* sorti ki demontre move planifikasyon.

Mon swete ki avek konstriksyon sa *exit road* lo zone 6 ki Gouvernman dizour pe konstrir apre 13an plizyer, sa i a ede deblok en pe trafik laba. E an terminan Mr Speaker mon ti a kontan souliny de pwen koman rekomandasyon;

Mr Speaker mon ti a sizere ki i annan pli bon zesyon trafik dan lavil e pour neser ki *Planning* ek *Land Transport* i travay pre ansanm. E ler travay ki pli fleksib pou travayer ki dan prive, ki dan Gouvernman. Bouz bann servis ki kapab dan distrik; ankouraz dimoun pou servi bann servis *online* annou bouz *digital*.

Avek sa de mo mon pou donn mon sipor sa Mosyon Mr Speaker. Mersi.

MR SPEAKER

Mersi Onorab. Onorab Lemiel.

HON SYLVANNE LEMIEL

Mersi Mr Speaker. Bonn apre midi tou dimoun a lekout. Mr speaker mwan mon lentervansyon ni vreman, vreman kourt.

Zis pou mwan aport mon kontribisyon pou sa Mosyon, mwan mon oule tous spesifikman sa bout desantralizasyon ki loter Mosyon in koz lo la. E ki mon vwar desantralizasyon li menm i en keksoz ki vreman enportan in deza komanse e mon pou pran legzanp dan mon distrik.

So ler nou regard en distrik parey Anse Royale i en landrwa ki vreman en *hub* kot ou kapab dir, kot nou kapab anmenn desantralizasyon diferan servis. Sa ti'n deza komanse e mon vwar en regresyon lo la. Se sa ki pe fer mwan ganny lavi entervenir en pti kou.

Nou annan en *land use plan* ki ankor pe *go back and forth*, avek ki'n fini determinen kote pou annan bann diferan devlopman e ki sa ti pou ede petet *solve* en pti pe problem ki loter Mosyon pe anmennen. Mwan mon oule tous zis sa bout lo kote kot i konsern desantralizasyon servis, ki mwan mon vwar i vreman primordyal, e pli enportan sirtou pou bann dimoun dan sid.

E wa osi i ti kapab servi sa bann servis zot desann dan

sid e zot servi sa bann servis e sa i ti ava ede pou minimiz en pe bann konzesyon, ki nou pe konplent lo la i annan anvil. Nou vwar *SRC* in komans en sistenm desantralizasyon kot en fwa tou le mwan, i mont dan distrik i al dan biro kot *PUC* - zot nouvo lofis ki'n ouver - e kot zot fer bann dimoun vini pou vin fer bann diferan peyman *or whatever* ki zot annan.

Me selman ou remarke ki i annan ase piblisite lo la, e petet statistik ki kantite dimoun ki pe ki okouran e ki pe reservi sa loportinite desantralizasyon en tel servis. Nou vwar i annan *CSB building*;- *CSB building* ti en lofis kot mon lofis li menm i ti ete, nou'n ganny demande pou sorti al dan sant kominoter pou al travay. E ozordi ki ou remarke? droger in anvair sa *building*.

Sa landrwa in ganny dir ki i ti pou en *hub* pou bann Departman Minister Lazans, spesifikman Biro *Attorney Zeneral* sipoze bann en lofis la. Mon konpran *Youth, SNYC* i sipoze annan en lofis la e i annan en lot lofis ankor Gouvernman ki ti sipoze vin la dan sa landrwa. Me ki nou pe vwar ozordi? Droger in antre, kas sa batiman. *MLUH* i monte tanzantan i aranze, kot sa *building* i vreman sal, i pa pe ganny mentenir.

I demande Mr Speaker atraver sa Mosyon, ki en latansyon i ganny pran avek sa *building* ek sa batiman. E ki petet Lapolis osi i zwen en rol dan fer patrol sa landrwa. Akoz si nou pe dir sa landrwa i pou vin *turn in to a Government House* sa ki mon'n ganny dir. Me dan plan Mr Speaker dan *land use plan* Anse Royale, i annan propozisyon pou en *Government House* ki sipoze kot sant kominoter i ete e son plan i la, in fini pare.

Me par kont letan Minis Gouvernman lokal ti'n vin en vizit en fwa, pou montre mwan kot mon biro i sipoze ete, i annan gro renovasyon ki sipoze ganny fer dan sant kominoter Anse Royale ki mon krwar son *roof* i sipoze ariv *over R1million* ki nou pe esper larzan sorti kot Fon Endyen pa ankor gannyen.

So mon ti met sa devan li pou dir Minister eski i *wise* pou nou al fer en tel devlopman, la ki i annan R1milyon ou pou al depanse lo en *roof*? Me la ti sipoze *Government House* kot tou Lazans, Departman, Minister enkli *elected MNA*, i ganny en lofis dan sa batiman. E apre sa ti pou annan bann lezot konpartman dan batiman li menm, kot ti pou annan bann lezot aktivite ki i

ti pou pe ganny ki ti pou konsantre dan sa landrwa.

So Minis ti fer mwan konpran ki i krwar pa si donn Gouvernman pe al ladan. Me selman mon krwar ki sa ti en bon nide pou annan sa desantralizasyon kot nou pe rod desantralizasyon servis, Anse Royale li menm li i ankor pe kontinyelman ganny dir i pou ganny konsidere koman dezyenm lavil - *on and on* nou pe kontinyen dir sa.

Me avek en tel demann kot nou pe demann desantraliz en pe sirtou servis gouvènmantal ki parey loter Mosyon pe demande, mon krwar si konsiderasyon Gouvernman i pran sa konsiderasyon, i ganny *funding*, i konsidere pou annan en *Government House* osi Anse Royale. Letan ki ler nou oule ki i vin sa lavil ki i pe demande.

Ler nou pe koz desantralizasyon servis ankor loter Mosyon nou ti annan bann servis parey *housing*. ASP nou ti annan, mon war in trounen nou ti bezwen al Au Cap la in retournen Anse Royale.

Housing; - *Housing Officer* ti vin dan distrik ti donn bann servis desantralize. Ozordi nou war zot in retourn santral ankor e kot dimoun i ganny bokou problem pou zot kapab war en zofisye

Housing ozordi kot pou zot kapab konplent. Zot ganny randevou, randevou i ganny anvoye zanmen fini. Me si sa servis ti kapab retoun ankor dan distrik, mon krwar la keksoz in ouver, distrik i annan lofis *available*. So sa bann servis ler nou pe koz desantralizasyon, nou pe koz lo Lasanble i demann Gouvernman pou revwar lafason ki i fer aktivite komersyal e gouvènmantal - li loter Mosyon i pe koz dan lavil.

Me ki pe fer mwan koz lo sa zafer desantralizasyon, se akòz loter Mosyon menm ki'n vin koz lo la, kot in dir si nou desantraliz sa bann servis li menm, i krwar ki sa pou aranz la fason ki keksoz i ganny deroule dan lavil.

Mwens sirkilasyon trafik, mwens lanbouteyaz ki i ava annan anvil e nou ava war sa bann servis i ganny anmennen dan rezyon sid laba. E ki i ava annan en balans e en partaz lo kote sirkilasyon trafik. E lo kote bann diferan, diferan servis ki anvil pe donner, e nou a konnen poudir Anse Royale osi i ava annan.

Par kont la prezan ki mon mazin dan en lot sa konpartman *building* ti sipoze annan SRC menm mon krwar ki sipoze vin permanan. So mwan mon ti ava lans en lapel la avan mon terminen ,pou

mwan dir Minis pou *MLUH*, si zot kapab met lavi avek sa *building* an kolaborasyon avek Lapolis, annou travay pou tir sa bann droger la anba sa *building*.

E mon krwar ki ler sa *building* li menm pou pe ganny okipe, i ava *busy* dan sa *area*, i ava annan i ava minimiz sa lakantite ale, vini bann vagabon ki la anba sa *building* parfwa, ki dimoun vin lo *ATM*.

Dimoun i ganny *harass* zot pe debout lanmenm dimoun i per pou tir larzan lo en *ATM*. Me mon krwar li ler *MLUH* i ava vini, i ava okip sa *building*, servis desantralize i ava arive lo kote rezyon sid - mon krwar ki i ava minimiz en pti pe sa bann problem ki distrik Anse Royale pe fer fas avek. So mersi Mr Speaker.

MR SPEAKER

Mersi Onorab. Onorab William ou repons lo deba e konklizyon? Ou annan mikro Onorab?

HON WAVEN WILLIAM

Mersi Mr Speaker. I resanble sa mikro i mars letan ou koze. *(laughter)* Akòz sak fwa ki mon koze i pa vin *on*, me letan ou dir si mikro pa vin *on*, i vin *on*. *(laughter)*

Mr Speaker mon oule remerci tou dabor tou bann Manm ki'n koz lo sa Mosyon ki'n fer ban kontribisyon

vreman valab e zot in vwar merit dan size sa Mosyon.

Mr Speaker mon pou osi siport sa rekomandasyon ki Deputy Speaker in avans devan, ki apre en Mosyon sitan *forward looking* dan devlopman Sesel pou kreasyon plis larises ki i pou enportan ki en *task force* i ganny et an plas pou kapab annan kontinite dan sa diskisyon e an menm tan pou ed Gouvernman an menm tan Sekter Prive, dan evalyasyon size sa Mosyon pou nou koman met bann target.

Akoz Mr Speaker, mon santi pou dir i annan bann target ki kapab ganny zwenn vitman, aköz baz in fini ganny kree i pa pou pran nou bokou letan. E mon ti ava swete osi ki nou war *task force* ki Lasanble osi serten reprezantan lo bann Komite apropiye, ti ava osi prezan pou zot aport kontribisyon pou fer sir ki zot pe *conduct oversight* lo sa parkour pou nou kapab zwenn sa bann target.

Mr Speaker mon osi siport sa sizesyon anmenn par Onorab Georges Romain ki wi, par lefe ki nou devlopman imen, zenes ozordi zot panse ki zot fason fer i pa parey Mr Speaker parey bann dan nou laz. E Kreol, lalang Kreol wi mon krwar i devret form parti sa bann lalang lo platform

nimerik ki a fasilite nou popilasyon.

Mr Speaker i enteresan ki dan parkour pandemik *COVID*, in fer nou sanz nou lapros, mon krwar nou devret servi sa koman la baz pou nou regarde kwa anplis ki nou kapab fer letan nou pe bouz dan sa sistenm nimerik. Mr Speaker mon reste konformite ki ozordi mon war ki bokou zenn zot enplike dan plizyer bann aktivite nimerik ek bann platform, pou zot kapab ofer bann servis. E sa Mosyon pe demann zot pou vin devan - pou vin devan pou aport zot kontribisyon aköz Gouvernman vizyon i la, me nou bezwen Seselwa, zenes, pou zot osi avans devan pou montre kwa ki zot kapab fer. Alors platform e bann sans i la.

Mr Speaker lo nide *Government House*, Mr Speaker i annan en nide ki pe ganny avans devan, pou annan en santralize. Be ler ou regard devlopman ki nou pe pas atraver, mwan osi mon krwar e mon siport sa nide ki ti a bon revwar. Dan plas fer li santralize ki nou konsider rezyonnal e sa i ava minimiz lo kote sirkilasyon a perd letan.

Mr Speaker, mon sezi sa lokazyon osi pou nou felisitou sa bann zenn e bann dimoun ki enplike pou devlop bann program e platform

nimerik ozordi dan Sesel Mr Speaker. I gou pou tande e vwar, ki fason nou bann zenn e direksyon ki zot pe ale.

E mon demande ki atraver *curriculum* lekol depi dan primer, lanfaz i ganny mete lo sistenm nimerik ki nou bann zenn ki pe monte pli tar Mr Speaker, parey mon'n dir se zot ki pou vin bann *movers and shakers*, koman bann azan sanzman dan devlopman sosyoekonomik pei.

Mr Speaker ozordi i domaz ki serten nou bann sitwayen zot azir dan en fason negligan Mr Speaker. Par egzanp mon a donn en senp legzanp kot *Marine Charter* la i annan en *take away*, me ou vwar ki dan letan *lunch break* i annan bann transpor ki park ki ler ou regarde i kre bann anbouteyaz Mr Speaker pou trafik ki sipoze *flow*. E la mon vwar poudir wi i annan sa demann pou plis *parking*.

Me an menm tan Mr Speaker, mwan mon krwar - fermeman krwar ki ozordi dan lavil avek progre dan teknoloji, ki bann *overhead bridge overpass* avek *underpass* i kapab ganny fer Mr Speaker. I kapab ganny fer aköz si ozordi nou'n kapab fer *Eden Island* nou annan lakonpanyen i kapab fer sa bann kalite travay. Nou annan zenn ozordi ki'n byen

train koman enzenyer. Mon santi nou kapab bouz dan sa bann direksyon.

Mr Speaker wi, nou devret annan plis servis *online*. E la mon lans en lapel la, ki tou bann dimoun ki *involve* dan sistenm nimerik, ki zot kapab ofer ankor plis servis. I pou non pou sosyete i pou minimiz perd letan e osi vin pli ekonomik.

Mr Speaker ti annan sa koze dan lepase pou entrodwir en *monorail* Mr speaker petet nou devret pe re pans lo la osi tou. Ti annan koze osi tou pou kapab petet pran bann dimoun anvil dan bato, depoz zot dan serten rezyon dan bann distrik, pou fasilite ankor plis transportasyon. E fer lavi dimoun vin pli fasil.

Mr Speaker mon vwar ki Gouvernman dizour ki responsab, in komans sa travay. E mon annan bokou lespwar ki sa diskisyon ki atraver sa Mosyon ki nou pe anmennen, nou pou vwar bokou fri dan lavenir.

Mr Speaker me fodre dir ki tou bann akter konsernen ki enplike dan devlopman sosyoekonomik Sesel, zot bezwen angaze senserman lo bann nivo ki pou anmenn nou benefis.

Mr Speaker avan terminen, par sa lefe ki sa mon dernyen Mosyon pou sa lannen lo azanda Lasanble - e

mon'n konstate ki i annan en lot Onorab lot kote latab, ki tanzantan pe anvoy en pti makadanm avek mwan. Mr Speaker e mon krwar nou an bezwen donn mwan sa pri loportinite pou mon kapab met serten keksoz lo latab.

Mr Speaker Onorab Loze in envit mwan pou form parti pou ranpli sa tren envizib le 6 - mon pou dir li non mersi. Rezon aköz mon pou dir li non mersi. Mr Speaker bann Anvoye Spesyal US detrwa zenn pase dan mon distrik, in pase, me zot pa'n azir koman bann Diplomat. Dezyenmman papye ki zot in donner avek lenvitasyon, ti ranpli ek mansonz ek lalang *comme* dir Claudette.

Trwazyenmman Mr Speaker, la ki diskour Bidze pe ganny prezante Vandredi le 4 zot pe panik, per pangar sa tren envizib ava en gro gaspiyaz resours parey Mosyon pe dir. Zot sel opsyon sa parti ese en *burger* ek en labyer ouswa en limonnad.

(laughter)

(APPLAUSE)

(Interruption)

MR SPEAKER

Onorab! Onorab! Arete! *Order!* Onorab ou deza *way-off* of ou Mosyon.

(laughter)

(Interruption)

HON WAVEN WILLIAM

Mr Speaker ...

MR SPEAKER

Mon ti krwar ou pe zis fer en pti fraz pou koriz en *misapprehension*. So mon pe dir ou la konmela terminen *close* avek ou Mosyon silvouple. Retourn lo ou Mosyon.

HON WAVEN WILLIAM

Mr Speaker, lo mon Mosyon ki mon santi Gouvernman pe prezant devan bokou bann opsyon, mon pou envit Seselwa pou ekout atantivman sa Bidze, ki pe ofer bokou opsyon pou pep Seselwa pou 2023.

E Mr Speaker parey zot in selebre pandan semenn Festival Kreol, zot pou annan plis rezon ankor pou al selebre. Mersi.

(APPLAUSE)

MR SPEAKER

Mersi. Mon ava apel bann Manm pou vot lo Mosyon

silvouple. Manm ki an faver lev lanmen? Mersi. Manm ki kont? Mersi.

Onorab William kekfwa si ou ti'n al amikal lo dernyen moman ou ti a ganny *full* sipor. Bon. Lo Mosyon Onorab William ki lir;

Swivan lelan devlopman e lenkonvenyans tel parey gaspiyaz resours dan rezyon lavil Victoria, Lasanble in demann Gouvernman pou revwar lafason i aktivite komersyal e gouvènmantal i ganny fer dan lavil. 16 Manm in vot pour, 0 kont e 8 abstansyon.

HON SEBASTIEN PILLAY

(Off-Mic)

MR SPEAKER

Onorab Pillay mon pa pe pran okenn entervansyon. Mersi.

(laughter)

(Interruption)

MR SPEAKER

Terminen! Mersi.

(Off-Mic)

MR SPEAKER

Non! Mosyon in terminen. Nou pe *adjourn*. Lasanble pou rezwenn Vandredi 9er.

(Interruption)

MR SPEAKER

Onorab Pillay mon pe demann ou gard lord silvouple! Gard lord! *Adjourn!*

(ADJOURNMENT)

